

دكتور ستوكهولم

عنوان الكتاب: دكتور ستوكهولم

الموضوع: روايات

التأليف: أحمد عزت

إخراج فني: عمرو سالم سواج

تصميم الغلاف: بلال محمد

رقم الإيداع: 2019/ 26901

الترقيم الدولي: 978-977-6639-77-5

الناشر: دار تويته للنشر والتوزيع

[www.facebook.com/Tweetforpublish](http://www.facebook.com/Tweetforpublish)

[tweetpublishing2017@gmail.com](mailto:tweetpublishing2017@gmail.com)

7ش محمد أبوالعطا- محطة العريش- فيصل- الجيزة

رئيس مجلس الإدارة: م/ أحمد عبد العزيز

المدير العام: أ/ رشا العمري

 01017799799

01225762066

  
Tweeta

للنشر و التوزيع

#غرد\_ للعالم

جميع حقوق الطبع والنشر محفوظة

# دكتور ستوكهولم

روايۃ

أحمد عزت



إِهْدَاءً

وهقولك ..

إني لهكون على باب الجنة ..

مسنينيكي

أصل الجنة بكل نعيمها ..

مش مكمه تعمم غير ..

بيكي



(١)

يقف أمام المرآة .. يتأمل ملامحه التي اختلفت كثيراً منذ وفاة والدته، حاول اضافة بعض الحيوية على شكله بهذيب ذقنه .. ولكن لم يتغير الكثير. ملامحه الباهتة كما لوحة قديمة عفا عليها الزمن ... ابتسامته المصطنعة التي لم يصدقها هو.. فكيف للناس أن يصدقوها!

وقف " زياد " ينظر إلى بدلته السوداء بتمعن شديد، يتذكر كم كان ينتظر أن يرتديها يوم زفافه، ولكنه اليوم يرتديها لحضور حفل زفاف " ليلي ". كان يرى ذكرياتهما سوياً تتحرك أمام عينيه كما لو أنها حقيقة، كيف قابلها أول مرة عندما كانت أحدث عضو ينضم لأصدقائه ... كانت هادئة، وبالرغم من هدوئها إلا أن شخصيتها القوية تبدو من نظراتها الواثقة .

حاول جاهداً تذكُّر ما دار بينهما من حوار .. إلا إنَّ ذاكرته خانته ... لكنه كان يدرك جيداً أنه وإن لم يكن أحبها منذ المرة الأولى، فبالتأكيد كانت قد استطاعت أن تشغل ذلك الحيز من تفكيره .

يتذكر كيف شاركته حياته بكل تفاصيلها الصغيرة، ويحاول مقارنة أيامهما سوياً بتلك اللحظة، لم يكن يرغب في تصديق أنها ستكون لغيره، ستبسم ببراءتها المعهودة لشخص آخر، ستحب وتغار وتداعب وتكون أمماً لأطفال شخص آخر .

ولكنه وإن رفض تصديق تلك الفكرة، فهي الواقع في النهاية .

أخبرونا في الروايات أن الرجل هو الأكثر قابلية للخيانة، تجري في دمه  
وكأنها جزء من جيناته التي ولد بها، بينما الأنثى هي الطرف المُحب بصدق ...  
ولكن الروايات أخطأت .. فهو لم يخُنّها، وهي لم تحبه بصدق ..، أو لنقل  
أنّها لم تحبه بقدر ما أحبّها .

أخبرونا عن مدى عذاب الأنثى بعد الفراق، ولم يخبرونا عن إحساس  
الرجل، لم يخبرونا إن كان قد انتصر أو انكسر .. أهملوا تفاصيله واهتموا  
بدموعها .. أهملوا شخصًا يسهر مُنفردًا متخليًا عن قوته وضحكاته العالية  
اللاتي يظهر بهنّ أمام الناس لينفرد بنفسه ليلاً ليبيكي . شخص يدعو الله  
بإلحاح طفل صغير يبكي شوقًا لأمه .

إن كانت الأنثى هي الطرف الأضعف في المعادلة، فالرجل هو الطرف  
الأضعف بدونها .

الرجل إن أحبَّ بصدق، صارت حبيبته هي مصدر قوته وسعادته  
وحياته، سيرها ووطنًا، بيتًا، ثورته التي قد يموت في سبيلها، وملجأه الذي لن  
يهرب لغيره .

أما إن رحلت، فلن يبدل مكانها بنات حواء جميعًا وإن اجتمعن .

- ها يا زياد .. جهزت ولا لسه ؟

انتشله صوت أبيه من غفلته، فقام مسرعًا ليكمل ارتداء باقي ملابسه :

- اه يا بابا خلاص ..

قالها وهو يُعَدِّل من وضع كرافتته السوداء .

أنهى زياد إرتداء ملابسه وخرج لأبيه الذي بدت عليه علامات الاشفاق  
على ابنه أو الخوف عليه من قراره .

- إنت متأكد يابني إنك عايز تروح ؟
- اه يا بابا، لو مش قادر تيجي خليك هنا إرتاح
- مش عشاني، أنا مش عايزك إنت تتحط في موقف يضايقك .
- بابا .. إحنا إتكلمنا في الموضوع ده قبل كده .. كلامنا فيه تاني مش هيفير حاجة

- طيب، إللي يريحك .

نزل زياد وأبوه ليستقلا السيارة دون أن ينطق أحدهما بكلمة، حاول والده كسر الصمت بصوت الراديو، ولكن حتى الأغاني لم تستطع أن تخرج زياد من شروده .. كان يحاول البحث عن إجابات لأسئلته .. لماذا رحلت ؟ لماذا لم تبق كما وعدته ؟ لماذا فضّلت غيره عليه ؟ لماذا لم تعطه فرصة ..

هل من المعقول أنّها لم تكن تحبه منذ البداية ؟

لا، من المستحيل لأي انسان أن يتظاهر بإبداء الحب كل تلك السنوات .

ولكن إن كانت أحبت بصدق، فكيف لها أن تتزوج بغيره ؟

لو كنت بس ساعتها عارف إن دي المرة الأخيرة ،

مئة مية كانت هتفرق في الوداع ..

بدأت الأغنية والتي أخذته إلى عالمها ، نعم .. كانت بالتأكيد ستُغير من مجريات اللقاء إن كان يعرف بأنه لقاها الأخير، كان سيحتضنها بقوة، بصدق .. كان سيبكي بشدة لهتز جسده كله مُعلنًا عن ألمه، سيبكي إلى ان تجف عيوننه، كان سيخبرها كم أحبها، كان سيرجوها ألا يكون هذا لقاها الأخير، أن تحاول معه أن يُغيّرأ قدرهما .

وإن رفضت، كان سيحبسها، نعم .. سيحبسها بداخله إلى أن تفتى الأرض  
ومن عليها .

كان سيطيبل النظر إليها، لا يعلم إن كان لأنه سيشتاق إليها، أو لأنه يريد  
الحفاظ على صورتها بداخله .

كم كانت جميلة، كان جمالها مختلف ... نعم لم تكن هي الأجمل ممن  
خلق الله، ولكنه عشق ضلوعه العوجاء التي كانت سببًا في خلق هذه الأنثى ..  
والتي كان يعتقد أنها ملكه ...، لم يكن شعرها حرييرًا، ولكن تموجاته التي  
تشبه أمواج البحر كانت تسحره، عيناها البنيتان الواسعتان اللتان كان  
يعشق النظر إليهما، ويعشق محاولاتها في إخفاءهما . إبتسامتها التي كانت قادرة  
على تغيير حياته كلها إلى الأفضل، براءتها التي تفوق براءة الأطفال، وقدرتها  
على اخراجه من وقاره وهدوئه ليصبح طفلاً صغيراً يلهو معها .

كانت هي المرادف الوحيد للعشق، كانت هي الحياة .

اللعنة على ذكرياتهما التي لم ترحل معها، يتساءل إن كانت هي أيضاً  
تتذكره، أو لا زالت تحبه مثلما كانت تفعل في الماضي .

ولكن كل تلك الأسئلة لم تعد مهمة الآن، فليلى ستزوج، ليلي لم تكن له  
من البداية، أما هو .. فكان مجرد فصل في قصتها سينتهي ليبدأ غيره، فترة  
إنتقالية، مجرد مرحلة عابرة في حياتها قبل استقرارها في بيت زوجها الذي  
لظالما دعا أن يكون هو، ولكن أبواب السماء كانت قد سُدَّتْ أمام دعواته التي  
انهالت تطرق بالحاح راجية تغيير قدره المحتوم .

علمته أمه قديماً أن الدعاء يغير القدر، ولكن صلواته ودعواته  
الخاشعة لم تفلح، لم يكن يعقوباً ولم تعد لتقر عينه بعد سنين من العذاب .

بعد نصف ساعة كانا قد وصلا إلى قاعة الأفراح، كان الهواء باردًا، ثقيلًا..

وبالرغم من كل تلك الأنوار المضاءة، شعر زياد بالمكان مظلم من حوله، وارتسمت على وجهه تعابير شخص ذاهب لتأدية واجب العزاء .

رَبَّتْ أباه على كتفه محاولًا التخفيف عنه ..

- إحنا لسه ما دخلناش، ممكن نمشي عادي

إلتفت زياد إلى أبيه بعد تنهيدة وابتسم دون أن يتكلم، ولكن ابتسامته كانت سببًا أقوى لأبيه لجعله أكثر قلقًا، ولكنه لم يستطع تغيير قرار زياد الذي بدأ في المشي تجاه بوابة القاعة .

كان المكان بالداخل أكثر صخبًا ودفنًا بكثير، الجميع مشغولون بالإحتفال، أما هو فكان مشغولًا بالبحث عنها بعينه، حتى رآها ... كانت تبتسم وهي ترقص مع صديقاتها، مرتدية فستانها الأبيض الطويل، لم يكن الفستان كثير التفاصيل، بسيط كما روحها . كانت جميلة كما اعتاد أن يراها دائمًا .

أما زوجها، فكان أطول قامته منه بقليل، يبدو على عضلاته وشعره القصير أنه أحد الذين تخرَّجوا من كلية حربية .

اختفى بسرعة وسط دائرة من أصدقائه في اللحظة التي سمع فيها زياد أحد يناديه ..

- زياد ..

- مروة، ازيك ؟

- الحمد لله، إنت عامل ايه ؟

- الحمد لله .. مبروك  
- الله يبارك فيك .. تعالى سلم ع الباقي، بقالنا كتير أوي ما نعرفش عنك  
حاجة.

لم تُعْطِه مروة الفرصة للتفكير، كانت قد سحبتَه من يده مُتَّجِهَة به إلى  
الطاولة التي يجلس عليها أصدقاؤهما .  
كانت مروة إحدى أصدقائه القدامى والتي كانت السبب في دخول ليلى إلى  
حياته، فهي مَنْ عرفتَهم عليهما .

عندما وصل إلى الطاولة كانت النظرات كلها تجاهه، منها مَنْ يتعجب من  
وجوده، وأخرى تتحسّر على حاله، بينما البعض مسرورون لرؤيته بخير ..  
نسبيًا .. انهالت عليه الأسئلة عن سبب غيابه وعدم الرد عليهم ولا  
التقاءهم، وكان يجيب بنفس الإجابات الجاهزة التي لم تكن بالمقنعة، ولكنها  
كانت دائمًا تفلح في إنهاء الحوار، إجابات من نوعية " معلىش ظروف " و " المرة  
الجاية إن شاء الله " .

مال عليه " شريف " الجالس بجواره قائلاً :  
- تعالى عايزك .

ذهب شريف يتبعه زياد إلى خارج القاعة، نظر إليه مطوِّلاً قبل أن  
يحتضنه، وكان هذا هو ما يحتاجه زياد ليبدأ في البكاء، لدقائق طويلة كان  
زياد يبكي في صمت، لم يحاول أحدهما التحدُّث، فقط يجلسان بجانب  
بعضهما وشريف يُرَبِّت على كتفه في هدوء .

وبعد أن انتهى زياد، سأله شريف :

- ايه إلكي جابك يا زياد ؟

- وحشتني ..
- إنت كده بتأذي نفسك وبتأذيها، تفتكر جوزها هيقول إيه لما يعرف إن حبيبها القديم جاي يحضر فرحها ؟
- بس .. بس أنا نفسي أشوفها
- نفسك تشوفها بفستانها ؟ نفسك تشوفها مع غيرك ؟ هتترتاح كده ؟
- لم يجد زياد ما يرد به، فقد كان شريف مُحققًا، رؤيتها لم تكن ستزيده إلا أَلْمًا ..
- رَوْح يا زياد .
- قالها شريف بلهجة قاطعة لا تقبل النقاش –
- انا مش جاي أحضر .
- أَمال جاي تعمل ايه ؟
- انا جاي أشوفها .. اه يا شريف أنا نفسي أشوفها بفستان الفرح، مش عايز أبقى بشوفها كده في الحلم وبس، مش عايزه يبقى مجرد خيال .. عايز أسلم عليها للمرة الأخيرة على الأقل .
- إنت بتفكر إزاي يابني إنت؟!!
- أنا ما بفكرش يا شريف .. أنا بحبها .
- قالها زياد وهو يقف مادًّا يده إلى شريف ليساعده على النهوض، ولما وجد شريف أنه لا فائدة من الحديث وقف بجانبه وإتجها للقاعة ..
- حمد الله ع السلامة يا صاحبي .
- بهذه الكلمات أنهى شريف حديثه مع زياد قبل ان يعودا للطاولة .

مرت نصف ساعة قبل أن يعلن ال DJ أن الآن هو وقت البوفيه، وعلى جميع المدعوين التوجه لهنالك .

وجد زياد أنه الوقت الأفضل لهبتها، فهو لا يريد أن يكمل الفرح لآخره ..  
كان فقط يريد أن يراها، والآن فقد حان وقت الرحيل .  
وقف زياد و بدأ في التحرك قبل أن توقفه مروة ..

- رايع فين ؟

- رايع أسلم عليهم .

تبدلت إبتسامتها بنظرة قلقة ..

- بلاش يا زياد .

- عيب . ما ينفعش أبقى هنا و ما أسلّمش

- بس يا زياد إنت كده .....

- أنا كده بعمل الأصول يا مروة .

- قالها زياد وقد بدأ في التحرك ناحية ليلي -

كانت نبضاته تزداد مع كل خطوة يخطوها، يفكر جدياً في الرجوع بسرعة .. ولكن لا، لن يعود قبل أن يوّدعها، إن كان قد خسر فرصة الجلوس بجانبها تلك الليلة، فبالأكيد لن يفوت فرصة للمس يداها للمرة الأخيرة، حتى وإن كان لتهنئتها بالزفاف .

إلتقت عيناها لأول مرة تلك الليلة، أو ربما لأول مرة منذ سنين .. تبدّلت الابتسامة على وجهها إلى نظرة لم يدرك زياد هل هي نظرة خوف، فرحة، أو أنها لم تكن سعيدة لرؤيته .

أما هو، فقد ارتسمت على وجهه ابتسامة واثقة، تقدم إليهما رافعاً رأسه ينظر لهما بثبات وفرحة مصطنعة ماداً يده إليهما .

- الف مبروك يا عريس

- الله يبارك فيك

التفت زياد إليهما، حاول جاهداً أن يخفي نظرات الاشتياق التي كانت واضحة في عينيه ..

- مبروك يا ليلي ..

لم ترد ليلي، حاول زياد اظهار الأمور طبيعية فسأله :

- مش تقولي اسمك ايه يا معلم ؟ تصوّر أنا كل ده مش عارف اسمك

- مروان .. بس ما قولتليش إنت مين بقى ؟

إنّسعت عينا ليلي من الخوف، فابتسم لها زياد قائلاً:

- زياد ، كنت زميل ليلي في الجامعة، بس بقالي فترة مسافر فمعرفتش

أتعرف عليك

- ولا يهملك يا ريس، حمد الله ع السلامة

- طب بقولكوا ايه، ممكن ناخذ صورة كلنا ؟

- طبعا .. يلا يا ليلي

وقف ثلاثتهم أمام الكاميرا وقد اتّسعت ضحكة زياد بشدة، وقفت في

المنتصف بينهما، يضمها مروان ناحيته بينما زياد يضع يديه في جيبه .

سَلَّم عليهما زياد مرة أخرى مُتمنياً لهما حياة سعيدة، داعياً المولى في قلبه

أن تكمل حياتها بجوار مروان بدون ألم كالذي ينهش في قلبه بدونها ... فبرغم

ألم فقدانها، وآلام تفضيلها لغيره عليه .. ستظل هي فتاته الصغيرة المدللة،

التي لن يرضى أبداً أن يصيبها سوء، ألا تفارق الضحكة شفاهها حتى وإن لم تكن تلك الإبتسامة معه .

اتجه إلى الطاولة التي يجلس عليها والده الذي كان يراقب المشهد ..

- يلا يا حاج

- يلا بينا ..

قأماً مُتَّجهين ناحية الباب، مارَّين بطاولة أصدقائه الذين أعطاهم رقمه ووعدهم بالتواصل معهم من جديد .

التفت لينظر لها نظرة أخيرة، نظرة حملت الكثير من الدعوات بالسعادة... والحب .

كعادته منذ فترة .. ظل زياد مُطَّلاً بوجهه خارج النافذة ، ينظر للسماء وكأنَّه يبحث عن شيء ما، لم يحاول أحدهما التحدث، وفي تلك المرة لم يُشغَل أباه الراديو، بل ظلَّ يقود في صمت لم يقطعه سوى صوت الموتور والكلاكسات .

وبعد فترة لم تكن بالقليلة اوقف أباه السيارة أمام النيل قائلاً : إنزل .

لم يسأل عن السبب، خرج زياد خلف أبيه وتبعه إلى حيث يقف .. كانا يقفان في مكان هاديء نسبياً، حين بدأ أباه بالكلام .. :

- عارف يا زياد أنا ليه طاواعتك في إلي حصل النهاردة ؟

لم يجب زياد، فهو لم يكن يدري ما سبب إصراره على المجيء معه .

- عشان أنا كمان بعمل زيك .

عارف، لما أمك بتوحشني بروحها القبر وأفضل قاعد معاها بالساعات ..

ده أنا ساعات بنسى نفسي وأنام هناك .

- ومكنتش بتقوِّي ليه ؟ أنا كمان عايز أزورها معاك
- عشان أنا مكنتش بروحلها على أساس إني أبوك .. أنا بروحلها على أساس إنها حبيبتى، حبيبتى إلي بحبها بقالي ٤٢ سنة .
- كانت هذه أول مرة يرى فيها زياد أبيه يتحدث عن والدته بتلك الطريقة، لم يكن يتخيل أن أباه قد يكون عاشقًا مثله، فهو يراه مثال للأب العظيم والرجل القوي، ولكن صورة أباه وأمه في ذهنه لم تحمل معاني للحب سوى منهما إليه ومنه إليهما، لم يفكر إن كانا يحبان بعضهما أم كان زواجهما تقليديًا، لم يشغل باله بكل تلك التفاصيل ولم تمتليء رأسه بالأسئلة قبل الآن.
- كنت بتحبها ؟
- بحبها؟! يابني أنا ما عرفتش يعني ايه حب غير لما قابلت أمك ...
- مكانش في زيمها في الدنيا، ولا هيبقى في أبدًا .
- عارف، أمك دي كانت أحلى واحدة في الفصل، كنت بذاكر كويس عشان أبان شاطر قدامها، وكنت بتبسط أوي لما المدرس يقولهم يسقّفولي وأشوف أمك بتسقّفلي في وسطهم .. كنت بحس إني راجل ملو هدومه واخذ جائزة م الدولة مع إني كنت لسه عيل في إعدادي .
- إنتوا بتحبوا بعض من إعدادي؟!
- أنا بحبها من إعدادي .. بس عمري ما فكرت أقولها،
- كنت بخاف تقوِّي لأ، كنت خايف من أبويا إنه يعرف ويضربني .
- أمال كنت بتعمل ايه ؟

- أنا عملت كل حاجة ممكن تتخيلها، لعبت رياضة عشان لما أعرف إن حد بيحبها أروح أضربه، وياما اتضربت من عيال أكبر مني .. بس ممكنش هاممني وكنت بتخانق تاني.

وكنت بحاول أبسطها على قد ما أقدر، يعني عارف .. في مرة كنت واقف قريب منها وسمعتها بتقول لصاحبها إنها بتحب الحلاوة، فضلت بحوِّش مصروف الأسبوع عشان أنزل أجبلها ساندوتش حلاوة وأحطهولها في شنطتها والفصل فاضي .. ضحكها لما بتشوفه كانت بترد فيا الروح، كنت ببقى طاير م الفرحة عشان شوفتها مبسوفة .

- كل ده من غير ما تقولها؟! يعني ما زهقتش مثلاً أو لقيت بنت أحلى وبتحبك ف إرتبطت ؟

- يااااه، ده كان في بنات كتير أوي، بس أنا عيني ما كانتش بتتملي غير بأمك، من إعدادي للجامعة وأنا مش عايز غيرها، ولما روحنا الجامعة وقولتلها إني عايز أقابل باباها ووافقت كان أحلى يوم في حياتي، عشان كده اصريت إن فرحنا يبقى نفس اليوم ده .

- إشمعنى أمي طيب ؟ يعني كانت تفرق ايه عن غيرها ؟

- بص يابني، أنا مش هقولك كانت زي القمر، ولا هقولك كلامها وطريقتها وكل الحاجات دي .

أنا اكتشفت بعد الجواز إن في حاجات كتير أهم ... أمك يا زياد كانت ست بميت راجل، كانت شايلة مسؤوليتي أنا وإنت .. أيوة أنا كنت تاعبها زي العيال الصغيرة .

كانت بتعرف تتحملني في وقت عصبيتي، وكانت شايلاني لما الفلوس معايا  
قلّبت . أمك ما كانتش بتحسّسني إن في مشكلة في البيت، كنت برجع ألاقى  
الضحكة مش بتفارق وشها .. كنت بشوفها يابني وأنسى همّ اليوم وقرفه .

أمك كانت بنت ناس و عرفت تربي، ربّتك وربّتي قبليك .. علمتني يعني ايه  
رجولة ويعني ايه مسؤولية ويعني ايه حب ويعني ايه غيره .

أبوك يابني مكنش هيبقى حاجة لو ربنا ما رزقنيش بأمك .

- يعني هي الدنيا كانت وردي كده ؟ مكنش فيه مشاكل خالص بينكوا ؟  
- ياما حصلت مشاكل، بس أصعب يوم كان بيعيّ عليا هو اليوم إلي  
كنت بسببها تنام فيه وهي زعلانة مني .. كنت بحس إنني عملت جريمة ، أصل  
دي مينفعش تزعل، يعني مين عنده قلب يزعلّ النعمة إلي ربنا رزقه بيها دونًا  
عن كل الخلق ؟

- بس إنت ما كانش بيان عليك كل ده يا بابا .

- ولا هيبان .. ده ما كانش ببيان غير قدام أمك وبس، كنا حتى وإحنا  
عواجز كده بس كنت بلاقي نفسي معاها عيل صغير .

كنت بحب فيها شقاوتها إلي ما فارقتهاش لحد ما ماتت، وحنيتها إلي  
كانت بتحسّسني إنها أمي، و النظرة إلي في عينها إلي كانت بتحسّسني إنني  
مالك الدنيا .. أمك يابني ما كانتش من الستات الفاضية إلي لازم عشان  
تتبسط تجيبها حاجة، أمك كانت بتتبسط لو أنا وهي نزلنا اتمشينا في الشارع  
بس، كنا مكّيين بعض، وده إلي خالنا نكمل سوا .

- بتوحشك أوي كده لما بتفتكرها ؟

- أنا ما بنسأهاش أصلًا ..

- الله يرحمك يا أمي، فينك تسمعي الكلام ده ؟  
- أمك لو كانت هنا كانت هتقولك نفس إلي هقولها لك ده ..  
إسمع يا بني، النظرة إلي شوفتها في عينك النهاردة وإنت بتسلم عليها كانت  
نفس النظرة إلي ببص بيها لأمك .  
إنت بتحبها وأنا متأكد من ده، بس هي إتجوزت يا زياد خلاص وما بقتش  
ليك .

- ولا أنا ليها يا حاج، موضوعها خلاص إتقفل .  
- لا ما إتقفلش، وإنت ليها وهتفضل ليها .  
ما تضحكش على نفسك يا بني، إنت عايش عشانها، إنت على قد ما  
اتوجعت لما شوفتها، على قد ما فرحت إنك شوفتها كويسة ومبسوطة .  
- يعني أعمل ايه يا بابا ؟ أروح أخطفها من جوزها ولا أبعت حد يوقع  
بينهم ؟

- إعمل إلي جواك،  
بتحبها ؟ إفضل حبها ..  
لكن إوعى تفكر تدي مكانها لحد تاني، أنا ما إعودتش أشوفك كذاب ولا  
خاين .

ولو إنت فكرت ترتبط أو تتجوز هتبقى كده، لإنك مهما حاولت عمر إلي  
جاية ما هتاخذ حتى ربع مكانها جواك .. هتفضل تفكر وتقارن وتفتكر لحد ما  
تتجنن .

- يعني أفضل كده يا بابا ؟ عاجبك حالي كده ؟ عاجبك الناس وهم  
بيبصولي كإني واحد صعبان عليهم حالته ؟

## دكتور ستوكهولم

- ومين قال إنك كده ؟ وبعدين فيها ايه لو بتحبها ؟ حبها، وإدعي ربنا يسعدها، ويرزقك إنت كمان الفرحة .. صدّقتي كل حاجة هتيجي في وقتها .  
ولو ربنا كاتبلك الخير فيها هتجيلك حتى بعد ما اتجوزت .  
أمك يابني إتخطبت قبل ما أنا أخطبها، وشوف ربنا كان كاتيهالي في الآخر، ولو كاتبلك تتجوز غيرها هيرزقك حبها والراحة معاها وقبل ده هيرزق قلبك النسيان .

- ربنا يقدم إللي فيه الخير يا حاج .

- ربنا يفرحك يابني .

- أمين يا رب

- يلا بينا عشان الوقت إتأخر ..

قالها والده وهو يأخذ بيد ابنه مُتَّجهين للسيارة، ابتسم زياد لأول مرة من داخله بعد أن أعطاه والده دفعة من الأمل حتى وإن كان ضعيفًا .  
ولكنه كان يحتاج إلى بعض الأمل للبقاء على قيد الحياة .

(٢)

٢٠٠٧/٢/٥

- ألو..

- إنتي لسه نايمة !! الساعة ٣ يا هانم

- مش قادرة أنزل خالص والله يا مروة

- يا سلام؟! ليلي ما تهزّيش أنا قايلة لما إني نازلة معاكي

- طيب إديني لحد ٥ كده أكون قمت وفوقت و ..

- الساعة ٥ تكوني عندي .. يلا باي يا حبيبتي

أغلقت مروة الخط دون أن تعطها الفرصة للرد . لم تكن ليلي مُرَجِّبة بالفكرة، لم تكن تريد النزول من بيتها أساسًا، فبي بالكاد تستطيع التعامل مع أصدقائها الذين يعدون على أصابع اليد الواحدة، فكيف لها أن تتعامل مع شخصيات لا تعرفها من الأساس ؟ .. ولكنها رأت في عيني " مروة " لهفة لم تزها في عيني صديقتها من قبل، سمعت تلك الرعشة في نبرات صوتها حينما تتحدث عنه، تتذكر هذا الكم الهائل من السعادة الذي بدى على إبتسامتها وضحكاتها التي تخرج من القلب بعدما ارتبطا سويًا ..

انتابها فضول قوي أن تتعرف على تلك الشخصية التي جعلت صديقتها في تلك الحالة . فالرجال عمومًا لا يستحقون كل ذلك الاهتمام ولا تلك المساحة التي توفرها لهم النساء في حياتهن، نعم يستحقون مساحة وإن كانت في نفس حجم المساحة التي يشغلها الأكل في حياة البشر، أو لا .. ربما أقل قليلًا .

مرت ليلي بالكثير من التجارب التي امتلأت بالرجال الذين يحاولون التقرب منها، فهذا يحاول أن يساعدها في المحاضرات، والآخر يحاول ابهارها بوسامته .. لم يخل الأمر أيضاً من تلك اللقطات الطفولية لذلك الشاب الذي يدفع بأحدهم لمعاكستها ثم يأتي هو كبطل يحاول انقاذاها من براثن هذا الذئب البشري ...

كانت ترى الموضوع مضحك ليس أكثر، فالرجال الشرقيون تشغل المرأة معظم تفكيرهم، وإن كانت تعتقد أنّهن يشغلن تلك المساحة نظراً لأن فطرة الله في خلقه أن عملية التزاوج تقوم بين رجل وامرأة .. أما إن كانت تقوم بين الرجال وبعضهم ، فأقسم أننا لن نشغل في حيز تفكيرهم أكثر مما تشغله مساحة اهتمامهم بأجدد مستحضرات التجميل .

نعم الرجال مهمون في حياة المرأة والعكس صحيح، ولكن وجودهم ينحصر في منطقة الصداقة .. أما إن تطوّر الأمر ووجد الرجل نفسه في منطقة الحبيب أو الزوج، فإن تحكّماته تبدأ في الظهور، وتتحوّل جملة " ما تنزيلش من غيري عشان بخاف عليكي " إلى " مفيش نزول م البيت أساسًا "، تتحول مكالماته الغرامية إلى مكالمات موجّهة بالأساس لأحد برامج الطبخ للسؤال عن طبق اليوم،

أما نظرتة لها فهي لا تتغير كثيراً وإن كانت أكثر قناعة، فهو لا يريد أن يراها " أحلى واحدة في الدنيا " .. يكفيه فقط أن تكون " شبه صافينار " ! .  
لذلك فهي ترى أنه إذا أراد شخص الارتباط بها، فعليه الارتباط بها كلها، بتفاصيلها التي لن يعجبه كلها بالتأكيد، بحريتها التي دائماً ما تسبب للرجال

مشكلة أزلية، بأفكارها التي قد يتوافق مع بعضها ولن يتوافق مع البعض الآخر ..

أما إن كان يظن أنه يُسدى لها خدمة العمر في تحمل أخطائها التي دائماً ما يقول الرجال بأنها تظهر بعد الزواج، فليتذكر أن التضحية متبادلة؛ فهي بطبيعة الحال، ستتقبل بعد الزواج أن يشاركها في زوجها ذلك الشريك المدعو بال"كرش" عن طيب خاطر .

ارتدت ليلى ملابسها والتي كانت بسيطة للغاية، واختارت أن تقوم بترك شعرها مفروّداً خلفها للوراء كموج البحر مع بضع رشات من عطرها الذي ابتاعته لنفسها في عيد مولدها .

خرجت لتجد والدتها تعد الغداء مدنونة مع أنغام أم كلثوم، أحسّت الأم بحركة ليلى خلفها ولكن نظرها لم يتعد عن الإناء أمامها ..

- صباح الخير يا حبيبتي  
- صباح النور يا ماما  
- هتلاقي الفطار متشال في التلاجة، صحيتك عشان تفتري معانا بس  
إنتي ما رضيتيش تصحي

- لا أنا مش هفطر، أنا نازلة مع مروة  
- طب كليلك لقمة قبل ما تنزلي  
- ما إحنا هنقعد في كافيه وهاكل هناك ما تقلقيش . مش عايزة حاجة  
من تحت ؟

- لا سلامتک، بس ما تتأخريش بقي والنبي عشان المرة إلي فاتت ابوكي  
فضل يتخانق معايا أنا .

- حاضر يا أمي ..

قالت لها ليلى وهي تطبع قبلة على خد أمها، أخذت هاتفها ومفاتيح السيارة واتجهت للخارج.

وصلت ليلى متأخرة عشرة دقائق، فبرغم سكنها في حي مصر الجديدة منذ طفولتها، إلا أنها لا زالت تنسى الطرق والشوارع فيها .. دخلت ليلى المكان الذي كان هادئًا بشكل لطيف، الأضواء خافتة بشكل مريح ومتناسب مع تلك الموسيقى الكلاسيكية المنبعثة في الأرجاء .

لم تأخذ ليلى وقتًا طويلاً لتتعرف على مكان جلوسهم، فالمكان لم يكن مزدحمًا، رأت مروة تجلس أمام شابين أحدهما يتبادل النظرات مع مروة بينما يتحدثان والإبتسامة تعلو شفاههما، كان طويلًا، رفيعًا، مُرتب الشعر والثياب، حليق الذقن، بالتأكيد هذا هو شريف .

أما الآخر، فكان نظره موجّه للسقف واضعًا يديه خلف رأسه التي أمالها للوراء، يبدو من وضعيته أنه ليس مستمتعًا بوجوده .. تمامًا كما تشعر ليلى .  
اتجهت ليلى تجاههم مناديةً على مروة التي التفتت إليها بإبتسامة ساخرة..

- هتفضلي لحد إمتى بتتوهي كده ؟

- ما أنا أول مرة آجي المكان ده .. وبعدين ما إتأخرتش كثير أهو

- طيب أعرفك بقى .. ده شريف، وده زياد صاحبنا

مدت ليلى يدها لتصافح شريف الذي وقف مبتسمًا مادًا يده إليها، أما

زياد فقد مد يده إليها بلا مبالاة مع إبتسامة بسيطة وإن كانت مصطنعة .

جلست ليلى في الكرسي المواجه لزيد وبدأت تتجول بعينها في المكان، كان المكان وكأنه غابة صغيرة، الحوائط والأرضيات خشبية، والطاولات كأنها جذوع أشجار كبيرة مع تلك الكراسي المكسوة بقماش أخضر اللون، أما السقف فكانت تتدلى منه أوراق اشجار وأغصان اللبلاب المتسلق مع بعض الورد، نظرت ليلى للنوافذ فوجدتها عبارة عن زجاج ملوّن صغير على طريقة الموزاييك - الفسيفساء - والتي ترسم في كل نافذة لوحة صغيرة وتضاء بضوء الشمس التي كانت قد بدأت في الغروب ممّا أعطى النوافذ منظرًا خلّابًا. أما ما أثار دهشتها بحق هو كيف أنها تستطيع أن تشم رائحة العشب المبلول بقطرات الندى رغم أنه غير موجود بالمكان . كان المكان مدهشًا بحق .

ظَلَّت ليلى تتجوّل بعينها بالمكان حتى انتشلها صوت مروة ..

- ليلى .. هتشرّبي ايه يا بنتي ؟ الراجل واقف بقاله حبة

- معلش ما خدنتش بالي .. ممكن ببيسي .

أخذ العامل الطلبات وابتعد، في الوقت الذي بدأ شريف فيه بالكلام ..

- إنتي زهقانة مننا ولا ايه؟ ، من ساعة ما جيتي وشك في السقف

- لا والله أبدًا، بس المكان ده حلو أوي

- شريف هو إلي عرّفني ع المكان ده ..

" قالتها مروة بنبرة طفلة تفتخر بوالدها "

- ذوقك حلو أوي ..

- لو ذوقي وحش ما كنتش هحب صاحبتك دي

## دكتور ستوكهولم

نظرت ليلى لصديقتها التي كانت قد تلوّنت وجنتاها باللون الأحمر بعد هذه الجملة، وابتسمت في خجل، كتمت ليلى ضحكتها على هذا المنظر الغريب وحاولت تغيير الموضوع ..

- ما قولتليش بقى يا دكتور شريف ناوي تتخصص ايه ؟
- غالبًا عيون، شغلها حلو ومش متعب زي باقي التخصصات، مع إن ده مش رأي زياد خالص.

- انتبه زياد حينما سمع إسمه واعتدل في جلسته :
- بتقول حاجة ؟
- صح النوم يا عم .. كنا بنتكلم ع التخصصات ورأي حضرتك في

### العيون

- مملة ..
- كان زياد يشعل سيجارته بينما يتحدث من جانب فمه قاطعته ليلى .. :
- إنت دكتور برضه ؟
- يعني بيقولوا كده
- طب ومش عارف إن السجاير مُضرة مثلاً ؟
- عارف .. زي ما إنتي عارفة إن البيبيسي مضر ومع ذلك بتشربيه .
- بس ضرر عن ضرر يفرق ..
- المبدأ واحد، الاتنين مضرين والاتنين بنحيمهم .

- زياد ده يا ستي فيلسوف الشلّة، عنده أفكار لوحده كده غير كل البشر .

قالها شريف وهو يضحك مُرَبَّتًا على كتف صديقه بجانبه .

- وناوي تتخصص ايه بقى يا فيلسوف ؟

- طب نفسي .

- دكتور مجانيين يعني ..

قالت ليلى جملتها بنبرة تحمل الكثير من السخرية، أرادت إستفزاز ذلك المغرور كما فعل معها، هو مِن بدأ الحرب والآن .. عليه تحمُّل نتائجها .

ولكن جاء رد زياد بنفس الهدوء الذي يعتليه منذ أن جاءت، قال زياد بعد أن نفث الدخان من فمه :

- اه ، ده يعتبر جزء من شغلي .. ولو إني شايف إن العاقلين هم إللي فعلاً محتاجين دكتور نفسي .

- إزاي يعني ؟

- المجانين خلاص ارتاحوا .. العاقلين هم إللي بيبقوا مضطرين يصحوا كل يوم عشان يواجهوا مشاكلهم الجديدة وهُمَّ لسه بيحاولوا يحلوا مشاكلهم القديمة إللي ما اتقفلتتش، مضطرين يتعاملوا كل يوم مع ناس ما بيحبهموش بعد ما خسروا الناس إللي حبوهم، مضطرين يمشوا في مستقبل مكنش قدامهم فيه فرصة الإختيار .. المجنون كل يوم بيدوّر على أكل و شرب و مكان ينام فيه، إنما العاقل بيدوّر كل يوم على سبب واحد يخليه يعيش .. أو على الأقل ما يتجننش .

- إيه يا عم الكآبة دي .. !! الدنيا فيها حاجات كتير حلوة تخلينا نعيش مبسوطين.

- بالظبط، إحنا محتاجين نعيش مبسوطين .. عشان كده بنعيش طول حياتنا ندور ع الحاجات الحلوة إللي في الدنيا ونبص على نص الكوباية المليون .. لحد ما بييجي يوم بنكتشف فيه إن أساسًا مكنش فيه كوباية .. وساعتها بنتحول من مبسوطين لراضيين، عايشين لمجرد إننا لازم نعيش، وهنا بييجي دوري .. أضحك ع الناس وأفهمهم إنه فيه كوباية وإن فيها نص مليون عشان أدّيلهم أمل في إللي جاي .

- بيتهبالي إنت إللي محتاج تتعالج ..

ابتسم زياد إبتسامة خفيفة، قبل أن يُنهي قهوته ويعود بظهره للوراء من جديد ..

- وإنتي بقى في كلية ايه ؟

- حقوق ..

قالتها ليلي وعيناها مثبتتان على الهاتف بلا اهتمام .

- بجد ؟ ما بيانش عليكي خالص

- إشمعني ؟ دي كمان فيها مشكلة ؟

- مش كده .. بس طريقتك في اللبس واهتمامك بتفاصيله يقول إنك في

كلية غير كده خالص .. فنون جميلة مثلاً .

- وهُمّ بنات حقوق ميهدين ولا ايه ؟

- أنا ما أقصدش كده ..

- أمال تقصد ايه ؟

- أقصد إن شكلك حلو ..

سكتت ليلي للحظة لا تعرف ماذا تقول، خصوصاً وأنَّ عيناها كانتا مثبتتان على عيناها باهتمام، ثم وبابتسامة تلقائية ردت :

- شكراً ..

ابتسم لها زياد إبتسامة خفيفة قبل أن يلتفت لشريف ويتحدثا سوياً .  
عادت ليلي لتتظر لها تفهماً، ولكن هذه المرة بلا تركيز .. في البداية يتعامل بمنتهى السخافة، ثم فجأة وبلا مقدمات يمدحها ويتخطى حدوده ويخبرها أنها.. جميلة .

نعم، أعرف أنني جميلة .. لست أول من يخبرني ولن تكون الأخير، ولكن على غير العادة لم أهاجمه، لم أصده .. بل أشكره !

- روحتي فين يا بنتي ؟

إنتشلها صوت مروة من تفكيرها، لحظة من الصمت مع نظرات تائهة بلا هدف، ثم أجابت :

- ايه ده ؟

- ايه ده؟! ده إنتي ضايعة خالص

- ما خدتش بالي معلش

- طيب إحنا هنمشي، هتمشي معانا ؟

- رايعين فين ؟

- قولنا هتمشي شوية، بس زياد مش عايز بيعي .. فتعال معانا

- لأ أنا هروح

- ليه يا بنتي وراكي إيه ؟

- عشان ما أتأخرش، مش عايزة مشاكل مع بابا
- طب يالا بينا .
- وجدت ليلي شريف ومروة يسلمان على زياد ..
- ايه ده إنت مش هتمشي ؟
- لا أنا قاعد شوية، عجبي المكان بصراحة .
- طيب تمام .. فرصة سعيدة يا دكتور
- أنا أسعد يا أزميرالدا
- أزمي مين ؟
- أزميرالدا .. من أشهر بنات الغجر .. وبما إني عندي مشكلة مع حفظ الأسمي، وبما إنك شبيهها فأنا هسميكي أزميرالدا ..
- غجر؟! ..
- سألت ليلي بحدة، وازدادت حدة نظراتها مع صوت ضحك زياد الذي قال:
- دي مش شتيمة، دول ناس زينا عادي يعني .. إنتي ما شوفتيش أحذب نوتردام ولا ايه ؟
- اه شوفته بس مش فاكراه .. هبقى أشوفه تاني بقى لما أروح .. سلام
- سلام .
- التفتت ليلي و مشت بإتجاه الباب، خرجت وألقت نظرة أخيرة على زياد الذي كان كالعادة مريحًا رأسه على كفيه محلقًا في السقف .. ضحكت ليلي على اسمها الجديد .. " أزميرالدا "

اعتادات أن يناديها الناس باسمها أو الاسماء المعتادة لأي فتاة في مصر من "قمر" و "عسل" مروراً بـ "جميل" ووصولاً لـ "بطل" .. ، لكن ازميرالدا مختلف .. تماماً كما صاحبه .

اختفت إبتسامة ليلى سريعاً بعد أن رفضت السيارة الدوران .. تدير المفتاح، تضغط على دواسة البنزين مرات ومرات .. حتى أنها تضرب الـ "تابلوه" بقبضتها ولكن لا شيء ..

نزلت ليلى من سيارتها بعد أن فتحت الـ "كبتوت"، ووقفت تنظر للسيارة وقتاً ليس بالقليل، لتُفاجأ بصوت من خلفها مباشرة :

- فاتحة الكبوت وعارفة بتعملي ايه ولا بتتفرجي عليه ؟
- كان هذا صوت زياد، بالتأكيد لاحظها من الشباك وهي ما زالت واقفة .
- خضتني حرام عليك
- أزميرالدا ما كانتش بتتخض
- ضحكت ليلى بسخرية وقالت :

- طب تعالى يا عم سوبر مان ساعدني بدل مانت بتتريق
- والله يا بنتي كان نفسي، بس لا بحب العربيات ولا بفهم فيها
- أمال بتتريق ليه طيب من أول ما جيت ؟
- إنتي إلي واقفة قدام الكبوت .. ودي عربيتك إنتي برضه، وبقالك حبة قدام الكبوت بصّاله كأنك هترسميه وما عملتيش فيه حاجة .. يبقى أتريق ولا لأ ؟

سكتت ليلى، ثم نظرت للكبوت نظرة أخيرة قبل أن تغلقه بقوة وتخرج هاتفها لتتصل بأمها، ولكن أتاها صوت السيدة الأكثر إزعاجاً بالدنيا ..

" عفواً، لقد نفذ رصيدكم .. يرجى إعادة شحن البطاقة ومعاودة الاتصال "

- معاك رصيد ؟

- اه إتفضلي ..

أخذت ليلى الموبايل من زياد وأخبرت امها بما حدث، وإنتهت المكالمة على أن والدها سيأتي لاصطحبها بعد ساعة .

- شكراً

- عفواً، على ايه ؟

ظل الصمت مخيماً عليهما ... إلى أن كسره زياد قائلاً:

- تعالي ندخل نقعد جوه بدل وقفنا بره دي .

دخلا سوياً و جلسا بنفس المكان، ظلت ليلى صامته بينما زياد ينقل

بصره بالمكان إلى أن نظر إليها وقال :

- ببسي برضه ؟

- لا مش قادرة شكراً ..

- يبقى ببسي .

وقبل أن تستطيع تكرار رفضها، كان زياد قد طلب الببسي والإيسرسو ..

في الواقع لم تستطع أن تعترض أصلاً بعد أن رن هاتفها برقم مروة ..

- أيوة يا ليلى، روحتي يا حبيبتى ؟

- لالسه ..

- ايه فينك كل ده ؟

- أنا في الكافيه مع ...

نظرت ليلى لزياد محاولة أن تتذكر اسمه، فنظر لها زياد ثم همس :

- سوبرمان .

ضحكت ليلى وهي تفتح مكبر الصوت، ثم قالت :

- أنا في الكافيه مع سوبرمان

- مع مين ؟

- سوبرمان

- إنتي إيجننتي يا ليلى ؟

- ليلى مين ؟ أنا اسمي أزميرالدا

قالتها ليلى و هي تضحك بشدة هي وزياد على مروة التي قالت :

- أنا مش فاهمة حاجة خالص، لما تروحي إبقي كلميني

- ماشي سلام

ظلت ليلى تضحك بعد أن أغلقت مع صديقتها، لم يهديء من ضحكها

سوى أنها إكتشفت أن زياد ينظر لها ويبتسم كإبتسامة اب لطفلة الصغيرة ..

أحست ليلى ببعض الخجل الذي دارته بضحكتها

- ايه بتبصلي كده ليه ؟

- أصلك بتضحكي يعني عادي ..

- وهو حد قالك إني كئيبة ؟

- لا أبدًا .. هو الحقيقة محدش قال لي عنك حاجة خالص، وده كان

أحسن بصراحة

- أحسن؟!!

- طبعًا .. لأن لو مهما حكوا عمرهم ما كانوا هيقولوا إنك شبه أزميرالدا

- إنت ايه حكايتك مع أزميرالدا دي ؟
- أزميرالدا ؟ دي فتاة أحلامي من وأنا صغير ..
- ويا ترى أزميرالدا في الفيلم حبيبها كان دكتور برضه ؟
- لا كان فارس في القصر
- بزمك ده منظر فارس طيب؟!
- ضحكت ليلى على منظره الذي لا يليق أن يكون فارس أبدًا .. جسم نحيف، ذقن خفيفة، شعر طويل غير مرتب بعناية ونظارة نظر .. لا يمكن أن يكون فارس .. ولكنه بالتأكيد .. جذاب .
- رن هاتفها لتجد رقم أيبها، ينتظرها بخارج المحل .. وقفت ليلى تسلم على زياد الذي أمسك بيدها من معصمها وأخرج من جيبه قلم ..
- انت بتعمل ايه ؟
- إستني شوية ..
- نظرت لتجد زياد منهمكًا في الكتابة قبل أن ينظر لها وهو لا يزال ممسكًا بيدها :
- ما تبصيش فيها غير في العربية، إتفقنا ؟
- إنت كتبت ايه ؟
- إتفقنا ؟ ..
- قالها زياد بلهجة لا تحتل النقاش .
- اتفقنا .
- خرجت ليلى قبل أن يندهها زياد :
- أزميرالدا .. ما تنسش تفرج ع الفيلم .

- أكيد هشوفه النهاردة . سلام

ودّعها زياد ملوحًا بيده، ثم عاد للجلوس على كرسيه من جديد مبتسمًا  
هذه المرة مدندناً مع ألحان الاغنية .

ركبت ليلي السيارة مع والدها الذي ظل يعاتبها على اهمالها واستهتارها  
وأنها مضطرين لترك السيارة مكانها حتى اليوم التالي ليأتي ويصلحها ..  
ولكن عقلها لم يكن لا مع والدها ولا مع السيارة، إنتظرت ليلي إلى أن  
إبتعدا عن المكان حتى فتحت يدها لتجد مكتوبًا فيها :

Some Day When I'm Awfully Low

When The World Is Cold

I Will Feel A Glow Just Thinking Of You

And The Way You Look .. Tonight

ظلت ليلي تنظر إلى يديها وهي مبتسمة، أما زياد .. فأول مرة لن يتذكر  
أحد باسمه الذي أعطاه له، بل سيتذكرها هي .. بكل ملامحها وطريقتها  
واسمها .. ليلي .

(٣)

كان صوت فيروز هو الصوت الوحيد بالمكان، وكأن كل الموجودين قد سكتوا إحتراماً لهذا الصوت الملائكي ..

كلّ قد تجاوب مع صوتها بطريقته ...

في آخر المكان كانت تجلس فتاة تبدو في أواخر العشرينيات، ترتدي فستاناً أحمرًا طويلًا هادئًا، برغم أنه بلا شيء مميز إلا أنه جعل منها جاذبة جدًا، شعرها مربوط فوق رأسها مع بعض الخصل على عينيها .. وكانها تضيء على وجهها ظلالًا تزيد جمالها جمالاً ..

كانت تمسك قلمها و ورقتها وترسم وهي تتحرك مع صوت الموسيقى، تشعر لوهلة أنها مندمجة مع الموسيقى وكأنها ترسم كلمات الأغنية .

على الجانب الآخر رجل وامرأة بلغا من العمر ما كان كافيًا بتحويل شعرهما إلى الأبيض، لكنه لم يكن كافيًا ليمحو الإبتسامة من على شفاههما .. ارتدى الرجل بدلة رصاصية اللون مع ربطة عنق زرقاء داكنة بنقاط بيضاء صغيرة ومنديل نفس اللون، أما هي فكانت ترتدي فستانًا قصيرًا بنفس لون ربطة عنق الرجل .. وتركت شعرها القصير ينسدل خلفها تُحرّكه نسيمات الهواء من النافذة بجوارهما .. ضحكت ضحكة طفلة صغيرة حينما قام الرجل من مكانه وأمسك يدها طالبًا مراقبتها، وقامت هي بكل دلالة ترافقه بالرقصة بتلك المساحة الصغيرة بجوار طاولتهما ..

وفي ركن صغير اعتاد الجلوس فيه دائماً، يجلس زياد كالعادة ممسكاً  
بسيجارته يراقبها بين أصابعه على أنغام الاغنية ..  
كان نظره مُثبَّتًا على الباب منذ فترة ليست بقليلة، نظرة وكأنها نظرة أمل،  
أمل في أن يراها مرة أخرى تدخل كما اعتاد أن يراها ..  
كان لدخولها تأثير على المكان كله، وكأن كل الأضواء تخفت خشوعاً  
لضئوبها، رائحتها التي كانت تبعث الحياة في المكان، وابتسامتها التي تبعث  
الحياة في روحه ..  
شعرها المتراقص مع كل خطوة تخطوها، وجودها كان كفيلاً بأن يمحو  
وجود الكل .

كانت هي ..

بكل تفاصيلها وملامحها ، بكل ما قالته يوماً .. وبعدد اللحظات التي  
سكنت فيها ..  
كانت هي ..

الوحيدة التي ملأت قلبه، والوحيدة التي خلقت لتغني لها فيروز .  
في تلك الأثناء دخلت نور، فتاة في منتصف العشرينيات متوسطة  
الطول، قميصها الزيتي المفتوح مع التيشرت الأبيض والبنطلون الأزرق  
الداكن وكأنهم صنعوا من أجلها .  
نعم مقومات الجمال مختلفة من شخص لآخر، ولكن بكل تأكيد كانت  
نور من تلك الفتيات التي تستطيع أن تخطف أنظارك، اتفق أو اختلف مع  
جمالها، ولكن بكل تأكيد سوف تتفق معي أنها جذابة لأبعد الحدود .

وقفت نور أمام الباب وكانها تبحث عن شيء ما، رفع زياد يده لتراه .. رأته واكتسى وجهها بإبتسامة جعلت منها أجمل ما خلق الله في الأرض، ولكن زياد كان يتأمل المشهد كله ..

لم يكن لدخولها نفس تأثير دخول ليلي ..

لم تخفت الاضواء خشوعاً لضوئها ..

لم تبعث إبتسامتها الحياة في روحه ..

نظر زياد إلى يده اليمنى على دبلة خطوبته من نور ..

نعم ، لم تملأ قلبه .. ولم تكن هي التي خلقت لتُغني لها فيروز .

- إتأخرت عليك ؟

- لأ خالص ..

إبتسم زياد ثم أكمل :

- شكلك حلو النهاردة .

إبتسمت نور و حركت عيناها بعيداً ..

- حلو اللبس ؟ ده أنا لسه جايباه إمبراح .

- أنا بحب ذوقك جداً ، والبرفان كمان تحفة .

حاولت نور تغيير الموضوع .. :

- بص الاتنين الحلوين إللي هناك دول ؟ أنا أول ما شوفتهم قولت لما

نكبر أنا وانت هنيقى زيمم كده .

التفت زياد لينظر للزوجين خلفه، رأى زياد نفسه جالساً أمام ليلي،

يحدق بتفاصيل وجهها التي غيَّرت عوازل الزمن، يتأمل ثناياها حين تظهر

بوضوح مع كل ضحكة تضحكها .. رأى نفسه سعيداً .. رأى نفسه " حياً " .

- وأنا كمان .. قولت هنبقى كده .
- طلبت نور الشوكولاتة الساخنة المعتادة، بينما طلب زياد المزيد من القهوة ..
- مش كفاية قهوة كده يا حبيبي ؟ كده هنتعب .
- ما تقلقيش ما فيماش حاجة ..
- خفت صوت الموسيقى إستعدادًا لتجهيزات الحفل، كان المكان يُعدّ تلك الحفلة الشهرية بشكل منتظم ليتيح الفرصة لكل أصحاب المواهب من رواده أن يقدّموا ما لديهم ..
- اعتاد زياد حضور ذلك اليوم ليشاهد المواهب، أو ليراها مجددًا .. يتذكر كيف رآها ذات مرة تعزف على البيانو بأصابعها الرقيقة، وكأنّ السوناتا قد خلقت فقط لتلعبها " ليلى " بأصابعها ...
- يومها كانت تعزف وتوقفت الأرض عن الدوران من حوله، خفتت الأضواء وكانت فقط هي ..
- يومها عرف أنه وجد ضالته .. يومها أحسّ بقلبه وكأنه ينبض لأول مرة مع أنغام البيانو .
- جاءت القهوة والشوكولاتة في الوقت الذي دخل فيه " شريف " و " مروة " المكان ..
- إنت يا بني لازم أشوفك مرة كل سنة ؟
- ضحك زياد و هو يرد :
- والله يا بني ما بمزاجي، الماجستير قاضي عليا .

- أنا مش هتكلم بس عشان نور، إحمد ربنا إنها هنا ، دي شايلة عنك بلاوي

- من غيرها هي ومروة كان زماننا قاتلين بعض غالبًا .  
ضحك الجميع وهم يجلسون، زياد وشريف يتحدثان عن الماجستير ومشاكله، ونور ومروة تتحدثان عن الموضة والماكياج ..  
التفت زياد بوجهه لتقع عينه على الباب، ورآها ..!

كانت في فستانها الأسود الطويل مع شعرها الأسود الذي تكسوه لمعة حمراء بسيطة، اختارت أن تترك شعرها متوسط الطول مموجًا مفروّدًا كما أحبه، وما أدهشه أنها إرتدت الزمردة الحمراء .. تلك التي اشتراها لها حينما كانا سويًا ، يومها أخبرها أنها أجمل من إرتدت حُلّي العجبر .. أخبرها إنها أسرت قلبه بسحر " إزميرالدا " .

أغمض زياد عينونه كي تتلاشى صورتها من جديد، لا بد أن يعتاد على عدم وجودها، لا بد ان يعتاد أنها لم تعد له، لا بد أن يفهم أنّ قلبه أصبح معلقًا بأخرى ..

فتح زياد عينه مرة أخرى، لكن الصورة لم تتلاشى، بل كانت على المائدة تحتضن مروة، بينما كان مروان يشعل سيجارته وهو يتحدث مع شريف ..  
إدًا لقد جاءت، إنها هنا في نفس المكان الذي اعتادا أن يجلسا فيه، تمسك بيد رجلٍ آخر غيره.

- إزيك يا مروان.
- أنا لقيتك مركز، قولت ما أقطعش تركيزك.
- لا خالص أنا معاكو أهو.

- أنا فاكِر إني شوفتك في الفرح بس أعذرني الأسامي بتروح من دماغي
- زياد .. عادي يا معلم ولا يهملك كلنا بنسقط حاجات كثير .
- حبيبي معلش حقك عليا .
- وقف زياد ماداً يده لمصافحة مروان، ثم التفت لليلي .. يقاوم رغبته الجامحة في احتضانها، أو ربما ضربها على تركه من أجل شخص آخر، ومع كل تلك الحرب بداخله ابتسم زياد إبتسامته المصطنعة المعهودة :
- ازيك يا ليلي ؟
- إبتسمت ليلي بثبات وهي تمسك بيده :
- تمام .
- وصل أحد العاملين بالمكان لأخذ طلبات الثنائي الجديد، طلب مروان شاي بينما تحدثت ليلي وهمس زياد في نفس الوقت :
- أنا هاخذ بيبيسي .
  
- أشعل زياد سيجارته ونفخ دخانها محاولاً نفخ الذكريات التي تفتك برأسه، يتذكر إبتساماتها، كلماتها، شرودها بأركان المكان ..
- يتذكر كيف تبدو قوية، واثقة، كيف استطاعت أن تأسر قلبه من اللحظة الأولى، وكيف استطاعت أن تلقي بقلبه إلى بئر ابن يعقوب، لكن هذه المرة لن يشتريه أحد .
- نظر زياد إلى ليلي ونور اللتان جلسا بجوار بعضهما .. لم يكن ليحب غيرها مهما حاول، كانت هي الأولى .. والأخيرة .

اقتربت نور من زياد :

- حبيبي أنا لازم أمشي
- ليه ؟
- محمد أخويا بعثلي ع الواتساب، أروح عشان ما أتأخرش وأنا مش عايزة حوارات في البيت
- ماشي، خدي بالك من نفسك
- إنت مش هتيجي معايا ؟
- معلش بقالي كتير ما قعدتش معاهم، ف شوية كده وهمشي
- ماشي يا حبيبي، وطمني لما تروح
- حاضر
- طبعت نور قبلة على خده، بينما قبَّلها هو على رأسها .. وحاول أن يصدق أنه لمح في عيني " ليلي " نظرة غيرة، او ربما كان يحاول أن يقنع نفسه أنها لا زالت تهتم لأمره من الأساس .
- خرجت نور بعد أن سلمت على الجميع، وأشعل زياد سيجارته في اللحظة التي سأله فيها مروان مازحًا :
- ينفع كده ما تعزموناش ع الخطوبة ؟
- والله الموضوع جيه فجأة، وكان ع الضيق جدًا .. بس أكيد في الفرح مش محتاج أعزمكوا يعني ..
- نظر زياد إلى ليلي ثم أكمل:
- ده انتوا عشرة .

بدأت الحفلة، انتبه زياد ليجد المكان مزدحم بالناس، هذا هو عيب ذلك اليوم، فالمكان عادةً هاديء وهو ما يميزه عن باقي الأماكن الأخرى .  
بدأت أولى المواهب في الغناء ، و قد اختارت أغنية " كيفك إنت " لتشدو  
بها بصوتها ..

تأفف زياد وهو ينفخ دخان سيجارته :

- المفروض يمنعوا الناس إنها تعمل الجريمة دي  
ردت ليلي :

- جريمة إيه ؟

- مش أي حد المفروض يغني لفيروز

ضحك شريف :

- يا عم ما هي صوتها حلو أهي ، مالها ؟

- مش اي حد يغني لفيروز، فيروز دي صوتها ليه قدسية ما ينفعش  
حد يقرب لها، ليها أغاني بصوتها هي وبس تقدر ترجعك لذكريات وتعيّشها لك  
تاني، تقدر تقول كل إللي جواك ومش قادر تقوله .. فيروز لما تقول كيفك إنت  
بتحسها كيفك إنت، في حين إن لو حد تاني غناها ممكن جدًا تحسّها " إزيك  
وإزي امك " .

ضحك الكل على عصبيته، ثم التفت له مروان :

- إنت واضح إنك بتحب فيروز أوي بقى ..

- جدًا .

- طيب ايه أكثر أغنية بتحبها ليها ؟

## دكتور ستوكهولم

سكت زياد للحظة وكأنه يسترجع أغاني فيروز في رأسه، لكنه في الحقيقة كان يبحث عن الأغنية المناسبة التي قد تليق بها، تلك الفاتنة الغجرية .. لم يكن ليليق بها أكثر من :

- أهواك بلا أمل .

- هي حلوة اوي، بس ليه ما إخترتش حاجة تفرح شوية ؟

- الأغنية دي عنوانها في حد ذاته كفاية، قصص كتير أوي إتلخصت في الجملة دي .. ناس كتير حبت وما كملتش، ناس حاولت تفضل وإضطرت تبعد، ناس عارفة إنها بتحب حد عمره ما هيحبها ولا هيبقى ليها .. الناس دي هي إلي فعلياً بتحب بجد .. يمكن تقول عنهم عندهم متلازمة ستوكهولم، بس أنا شايف إن دول أكثر ناس بيحبوا بجد، لأنهم مش مستنيين حاجة من إلي بيحبوه .

- عندهم ايه معلش ؟

- متلازمة ستوكهولم أو Stockholm Syndrome ، دي متلازمة بمعنى إن الشخص بيحب الشيء أو الشخص إلي بيأذيه، هو عارف إنه بيأذيه بس بيحبه ومتعاطف معاه بأي شكل من الأشكال .

- إسمحلي بس ده يبقى اسمه غباء، يعني ايه تبقى عارف إن حد

بيأذيك و تحبه ؟

- خليني أنا أسألك سؤال .. تفتكر أنني جه الأول ؟ الحب ولا الأذى ؟

- بيتيألي الحب .

- بداية ظهور المتلازمة بتقول عكس كده تمامًا، بس العلاقات البشرية بتقول إنه معظم الحالات بيكون الحب فيها الأول .. صدقتي لما تحب حد بجد صعب إنك تكرهه، وصعب أكثر إنك تحب غيره .
- بس ده بيأذيك ..
- يمكن الأذي إنت مش شايفه أذى، يعني لو واحدة بتحب واحد وهو يقول بيحبها بس طريقته بتثبت عكس ده، ما بيعملش حاجة تثبتلها إنه بيحبها أصلاً .. ده ما يقاش اسمه أذى ؟
- يبقى أذى طبعاً ..
- هي بقى مش شايفاه كده، هي هتشوفه مرحلة محتاجة تحدي، هتشوف نفسها هي إلي مقصرة ومش عارفة تحببه فيها، عقلها هيصورلها إن هي إلي غلطانة مع إن هو في الأصل إلي ما بيحبهاش .
- إزاي ده .. ؟
- الموضوع بسيط، الانسان مكون من ٣ حاجات .. قلب، وعقل، وروح . هضربك مثال يشرحك كلامي ..
- وانت صغير ممكن تشوف كوباية شاي شكلها يعجبك فتقرر تمسكها، هتتلسع، وبالتالي عقلك هيصورلك إن الكوباية دي بلون الشاي ده وحشة ما تقربلهاش .. فبالتالي قلبك هيكره الحاجة إلي إتسببت في إنك تتلسع .. في حين إنك لما تكبر ممكن تجرب تشرب الشاي بعد ما يبرد شوية .. تلاقي نفسك بتحبه .
- مش فاهم قصدك بصراحة ..

أشعل زياد سيجارته، ثم قال :

- الفرق بين عقلك وروحك إن روحك هي السليمة، هي إلهي أصلها من ربنا .. فهي إلهي على الفطرة، في حين إن عقلك بتحكم فيه الظروف والبيئة المحيطة ..

الشيء المسيطر على عقلك أو " الأنا " لو شاف إن في حاجة إنت عايزها هيقنعك إنك لازم توصلها، بس عمره ما هيفكر إذا كانت صح أو غلط، تنفع أو متنفعش .. على عكس روحك إلهي دايماً هتختارلك الصح، إلهي لما هتحب هتحب بغض النظر عن شكل إلهي هتجبه أو إلهي هتستفيده منه ايه .

- أنا لحد دلوقتي مش فاهم ايه علاقة ده بالموضوع

- عقلك بيعشق ال Comfort Zone ، سواء كانت شخص أو مكان هيفضل يقنعك إنه أحسن شخص في الدنيا مهما كان فيه العبر .. ليه ؟ لأنه خايف يغيره، خايف يخرج من النطاق المريح مهما كان غير مريح .. إلهي بتحب واحد ما بيعمهاش يمكن مبسوسة بالأمان، أو إنه بيسمع لها، بيفير علمها حتى لو عارفة إنه بيمثل .. هي خايفة تخرج من ده وتروح لواحد، حتى لو بيعمها بجد ما يقاش قادر يديلها نفس الإحساس .

- الموضوع كبير الصراحة ومعقد أوي

- أحب أقولك إن ده موضوع الماجستير بتاعي .

قاطعتهم ليلي :

- و إنت بقى شايف إنك بتحب خطيبتك ولا هي إلهي بتحبك ؟

نظر لها زياد، لم يكن من المعقول أن يخبرها أنه لم يحب غيرها أمام

زوجها ..

فاكتفى زياد بإبتسامة وقال :

- إحنا الاتنين .

عاد زياد بظهره إلى الورا تاركا الأربعة يتحدثون سويا، بينما هو شاردا  
ينفخ دخان سيجارته مكوّنا سحابة فوق رأسه ..

ثم فجأة وقف زياد وبدأ في الخروج من كرسيه ..

سأله شريف :

- رايح فين يا بني ؟

ولكن لم يجد منه إجابة، وكأنه مُنوّم مغناطيسيا .. تحرك زياد ناحية

المسرح وأمسك بالمايك ..

- مساء الخير، أنا اسمي زياد، دكتور طب نفسي ... وللأسف لحد

النهاردة مش عارف أعالج نفسي .

باجي هنا كتير أسمع المواهب إلي بتطلع ع المسرح .. بس عمري ما فكرت

أشارك، معرفش ليه طلعت النهاردة .. والحقيقة مش محضر حاجة أقولها، أنا

مبدأيا كاتب، كنت زمان بكتب مقالات على قدي كده أيام الجامعة .. بس ما

حاولتش أنشرها، حصل موقف في حياتي خلاني لا إراديا كتبت شعر، كتبت

قصايد كتير أوي للبنت إلي كنت بحبها، و النهاردة قررت أقول آخر قصيدة

كتبتها لها و عنوانها " ساعات بشتاق " ..

ساعات بشتاق

لناس في الاصل مش ليا

ولا كان بينا يوم حكايات

لكن بشتاق

اداري الشوق بخاف لبيان  
واخاف تلمع في يوم عيني  
إذا قولتيلي يلا فراق  
منا بشتاق  
ك تايه وسط ضلمة ليل  
وكتني بالنسبالة النور  
عينيك الحلوّة زي بحور  
وأنا بحار  
لكن خايف  
سمعتي فمرة عن بحار يخاف البحر ؟  
يخاف منه لكن حالف ليغرق فيه  
يموت فيكي فيصبح زي ميت فاق  
وأنا مشتاق  
كأعنى اتردله بصره على شوفك  
لعنت ظروفى و ظروفك  
لعنت شجاعتى لو شافت في يوم خوفك  
مطمنتوش  
لعنت دموى يوم ما مشيتى و منزلوش  
وبلعن قلبى ١٠٠ مرة اذا بطل في يوم يشتاق  
منا مشتاق  
وقبلى كتير كانوا عاشقين جمال حسنك

وأنا وحدي لمحت الحسن في التفاصيل  
يشوفوا الضحكة على وشك يحبوكي  
وأنا في الحزن روحي ليكي برضه تميل  
وأقول مواويل  
وارتل روحك الحلوة آيات قرآن  
وارنمها كما الانجيل  
و بحفر صورتك الآية على ضلوعي  
تغيبي ابكيكي بدموعي  
دموع لا بكاها يوم عنتر  
ولا روميو  
ولا واحد من العشاق  
منا مشتاق  
وبدعي المولى يجمعنا في مرة طريق  
وبتعلق في قشة حبك المكسورة زي غريق  
وعارف مش هتقبيلي  
ولا هتكوني ليا في يوم  
فراقك زيه زي الموت مصير محتوم  
بلملم قلب اتكسر ٢٠٠ حنة على ايديكي  
ليلاتي كان يبات غالب  
قصاد عينك يبات مهزوم  
و يكتب اسمه مالشهداء

يعود مشتاق  
ساعات بشتاق  
والشوق ساعات بيكون خطر  
وساعات يبقي ذنب ممنوع يغتفر  
وساعات كتير بيكون هبل  
ومن الهبل  
ان الطرق تكون متقفلة و مفيش امل  
و تقول يجوز  
انك تعيش بالشعر الاسود  
كالعجوز  
انك توافق تنهزم من بعد هيبة  
لاكن لاجلك تكون عيبة  
اذا بطلت يوم اشتاق  
انا مشتاق  
بقلب مازوخي يتعذب على ايديكي  
فيتهي  
و اذا نسيانك الجنة  
هعيش مشتاق .. و اموت مشتاق

سكت زياد وانطلق صوت تصفيق الجمهور يملأ المكان، ابتسم زياد حين  
شاهد الرجل المسن ذو البدلة الكحلية يقف مصفّقاً له بحرارة ..  
وبعد أن هدأ التصفيق، أمسك زياد بالمايك ناظرًا ناحية الطاولة التي  
عليها أصدقائه ..  
القصيدة دي إهداء لهما، لهما لوحدها .. زي قلبي بالظبط .. ولو هي  
سامعاني، أحب أقولها ..

Some Day When I'm Awfully Low

When The World Is Cold

I Will Feel A Glow Just Thinking Of You

And The Way You Look .. Tonight

قالها زياد، ثم ترك المايك وهو ينظر لليلى وكأنه يخبرها أنها هي صاحبة  
الإهداء، صاحبة القصيدة، وصاحبة قلبه ..  
ثم خرج من المكان بدون أي كلمة أخرى .

(٤)

أحسّت ليلي بخيوط الضوء تتسلل من خلف ستائر غرفتها .. ففتحت عينها، خرج مروان لعمله مبكراً ولكن كعادته لم يترك أثراً يدل على وجوده حتى، كان يرتب الغرفة يومياً قبل نزوله .. فهو يعلم كيف تعشق أن يكون كل شيء في مكانه .

كانت الغرفة واسعة، قررت ليلي في بداية زواجهما أن يكون البيت كله مدهوناً بدرجات اللون الأزرق، واختارت لغرفتهما اللون الأزرق الغامق وجميع أثاث الغرفة اختارت له اللون الأبيض .

فوق السرير مباشرة كانت صورها هي ومروان بوضعيات مجنونة يُقلدان فيها بعضهما البعض، أما أمام السرير مباشرة فترى حديقة المنزل من الشباك.. واكتمل صباحها إشراقاً برائحة عطر مروان الرجالي .. أه كم تعشق تلك الرائحة .

خرجت ليلي من غرفتها لتستعد لبدأ يومها، أحضرت كوب قهوتها الصباحية مع اللابتوب وخرجت للشرفة للجلوس ..

فتحت ليلي اللابتوب، تشرب القهوة وتنظر فيه ولكن بلا تركيز، وكأنها تنظر إلى العدم ، أرادت أن تغلقه ولكن يداها منعتها من إغلاقه .. وكأنها تنتظر شيئاً ما ..

قررت تفقّد رسائلها لترى إن كانت إحدى الشركات قد قبلتها، ولكن لا جديد ..

\* ارسال رسالة جديدة \*

" زياد ..

إزيك ؟ يا رب تكون تمام ..

ما تسألنيش أنا بكتبلك الرسالة دي ليه؛ لأن أنا نفسي مش عارفة، وما تحاولش ترد عليها لأن دي آخر رسالة هبعتهالك . بس يمكن حسيت إنك محتاج تسمعني، أو يمكن أنا إلي محتاجة أتكلم معاك ؟ مش عارفة . أنا فعلاً مش عارفة حاجة .. مانت عارفي طول عمري متلخبطة .

عارف يا زياد، معرفش هتصدقني ولا لأ .. بس أنا ما إتفاجئتش لما شوفتك في الفرح .. لسبين ، أولاً لأنك وعدتني لازم هتشوفي بفرح .. وثانياً لأنني كنت متأكدة إنك مش هتقدر تمنع نفسك ما تجيش، يمكن ما نجحتش في إني أفضل معاك ... بس الأكيد إني الوحيدة إلي نجحت إنها مش بس تفهمك .. لأ وتحفظك كمان .

بس خوفت، مش منك لأ، أنا خوفت من نفسي .. خوفت توحشني . ما إنت ما ينفعش توحشني، أنا متجوزة خلاص ..

بس عارف، أنا محتاجة وجودك حتى لو كصديق، محتاجة الراحة إلي بحسها وأنا بتكلم معاك وعمري ما لاقيتها مع غيرك .

على فكرة أنا بحب مروان جداً، بس الحياة ما طلعتش حب وبس زي ما كنا فاكرين، طلع مش شرط إننا عشان بنحب حد نكون بنلاقي كل راحتنا معاه، مش ضروري نقدر نستحمل كل عيوبه .. الفرق بيني وبينك إني قدرت أشوف ده، بس إنت ما قدرتش .

من زمان يا زياد وأنا متعودة أشيل مسؤوليتي بنفسي، ما كنتش من البنات المتدلعين إللي راميين الدنيا ورا زهرهم ويبدوّروا على تفاهات، إنت نفسك قولت عليا إني مختلفة .. بس برغم كل ده انا لما حبيتك بقيت معاك طفلة صغيرة متشعبطة في باباها .. على قد ما كنت بقدر أشيل همّ نفسي، على قد ما كنت مسلماتك إنت الدنيا عشان مطمّنة وأنا معاك وحاسة إني محتاجة أتحامى فيك ..

أنا ما كذبتش عليك لما قولتلك إني حبيتك، أنا حبيتك أوي .. بس عارف المشكلة فين؟ المشكلة إني خوفت .. خوفت لما حسيت إني بحبك أكثر مانتم بتحبني، يمكن غلظت إني ما صارحتكش .. بس خوفت . والخوف أكثر حاجة بتعلم، أنا لما خوفت كبرت، ولما كبرت إتعلمت إني أشيل هي تاني لوحدي .. كبرت في الوقت إللي إنت فضلت شايفني فيه بنتك، كبرت في الوقت إللي إنت ما قدرتش تفهم إني إتغيرت، ولا قدرت تتعامل مع التغيير ده .. إنت فضلت زي مانتم، ودي كانت المشكلة .

كان بيبقى نفسي أقولك، أوقات كتير كان بيبقى نفسي أقولك ما تضيعينيش، أنا بحبك، بس ما كنتش بقدر .. كان دايمًا في حاجة مانعاني إني آجي أتكلم معاك وأحكملك إللي جوايا ..

يمكن خوف، يمكن عارفة إنك مش هتفهمني، وكتير كنت ببقى هتكلم وتسألني والأقي الكلام كله هرب من دماغي .

بعدها إنت فوقت، وفعلاً إتأكدت ساعتها إنك بتحبني أكثر منا بحبك .. بس بيتيألي ده كان السبب إللي خلاني أبعد، لإني عشان بحبك مش هرضالك

أبدًا إنك تكون مع واحدة ما بتحبكش حب قد إيلي إنت بتحبولها ده، ما  
أرضالكش إنك تكون مع واحدة ما تستاهلكش .

عارف يا زياد ... على قد مانت كنت شايفني مختلفة على قد مانا عمري ما  
شفت راجل يشبهك .. حتى مروان .

كلامك غير كلامه ..

دماغك غير دماغه ..

كل حاجة فيك عكسه ..

أنا حبيتك وبحبه، بس عمره ما هياخد مكانك مهما حصل ..

لما جيت الفرح يا زياد أنا للحظة حسيتك إنت العريس مش هو ..

يمكن بعد الفرح نسيت على طول، بس بعد شهر العسل كان نفسي  
أكلمك أحكيك حصل ايه وأحكيك إيلي شوفته، كان نفسي أقولك قد ايه أنا  
مبسوطة مع مروان .. بس كنت عارفة إنك هتضايق، وأنا ما أحبش أبدًا أكون  
السبب في زعلك .

عارف، حتى مروان ما بقيتش مبسوطة معاه زي الأول .. مفيش مشاكل  
بيننا الحمد لله، بس عارف لما تحس إن الحياة بقت عادية ؟ زي ما تقول  
الإنهار إيلي كان في الأول خلص، لمعة الحب بدأت تهدي .. يمكن بفعل الوقت،  
يمكن بسبب المسؤوليات إيلي على كل واحد فينا .. بس الأكيد إنها بتهدى .

مش هخبي عليك هو بيحاول يعمل كل حاجة عشاني، بس برضه ..  
حاسة إني فاضية من جوة، من ناحية كل حاجة .. مش من ناحيته هو بس .

أنا إكتشفت إني ما أنفعث لأي علاقة حب؛ لإني بخاف أحب ، بخاف  
أتكسر .. بس أنا إتكسرت لما حبيتك، وإتكسرت لما حبيت مروان .. بس للأسف

كسرتك . ولما شوفت شكلك بعديا قررت إني مش هعمل كده في حد ثاني، حتى لو هاجي على حساب نفسي .. حتى لو هكمل حياتي مع حد بيحبني أكثر مانا بجه .

عارف يا زياد ... ساعات كان مروان بيحب يخرجني في أماكن خرجنا فيها أنا وإنت زمان وكنت بقوله لأ، بس كثير بروح الأماكن دي وبدعي ما تكونش موجود .. بس أنا كنت فاكرة إحساسي وأنا مرتاحة و بحكيك كل حاجة، دلوقتي أنا ما بقيتش أقدر أحكي أي حاجة، لا ليه ولا لمروة .. ولا حتى لنفسي قدام المرآة ..، أنا عايشة يا زياد، عايشة بس مش مبسوطه .

كنت في مرة قولتلي إن الدكتور النفسي بيقنع مريضه إن في كوباية وإن فيها نص مليون عشان يقدر يعيش، تقدر تقنعي دلوقتي يا زياد إن بعد ما كوبايتي إتكسرت هقدر أحافظ ع المائة دي في كف إيدي من غير ما تروح ؟ صحيح .. ما عرفتش أباركلك على خطوبتك، هي حلوة ما شاء الله، بس مش فاهمك .. يمكن أنا الوحيدة إلي ما صدقتكش لما سألتك مين فيكوا بيحب الثاني وقولتلي إنتوا الاتنين . أنا أكثر واحدة عارفاك يا زياد وعارفة إمتي بتبقى مبسوط وإمتي بتعمل نفسك مبسوط .. عارفة إمتي بتبقى فعلا حابب إلي قدامك وإمتي بتمثل إنك بتحبه، مش بقول إنك وحش أو إنك ظالمها .. بس كذبني لو إنت فعلاً بتحبها، وأشك إنك هتقدر .

القصيدة إمبراح كانت حلوة أوي، أول مرة أعرف إنك بتكتب وأول مرة أسمعك، عارف حسيت للحظة إني نفسي أقف قدام الناس وأقولهم دي مكتوبالي ..

بس في نفس الوقت حسيت إني جرحتك أوي، ويمكن ده سبب من الأسباب إللي مخلياني مش عارفة أعيش طبيعي، مش مخلياني قدرة أرتاح .. وأنا محتاجة أكون مرتاحة .. محتاجة أرجع زي ما كنت .. محتاجة لما أبص لنفسي في المرآة ما أستغربش شكلي .. محتاجة أحس إن روحي لسه عايشة، إني مش مجرد نبض ورقم قومي .. كلام كتير جوايا طلع، بس إللي أكثر منه كتير محبوس جوه .. بس على الأقل إتكلمت .

شكراً ليك إنك سمعتني، شكراً ليك إنك هنا .. وشكراً على إحساس راحة ما حسيتوش بقالي كتير .. وآسفة، آسفة لو كنت سبب في كسرك أو وجعك .. لإني لما بعدت عنك أنا كنت فعلاً بحبك، خد بالك من نفسك يا دكتور.. وبلاش سجاير كتير، زي مانا ما بقيتس بشرب بيبسي كتير كده .. بقيت مدمنة قهوة زيك . .. أزميرالدا "

نظرت ليلى للرسالة، قرأتها مرات ومرات ..

\*Delete\*

مسحت ليلى الرسالة قبل أن ترسلها ..

وبضغطة أخرى بدأت أغنية " The Way You Look Tonight " ومعها تركت ليلى اللابتوب وبدأت في تحضير الغداء لزوجها .. مروان .

(٥)

٢٠١٠/٨/١

المكان : قاعة المؤتمرات بجامعة القاهرة ..

" .. وفي نهاية المؤتمر، لا يسعنا إلا أن نشكر أساتذتنا الكبار وحضوركم الكريم، والآن مع الكلمة الختامية للمؤتمر للدكتور / زياد المصري .. "

بعد حصول زياد على درجة الماجستير، تم اختياره من رئيس القسم لإلقاء الكلمة الختامية للمؤتمر في مفاجأة لم يكن هو نفسه يتوقعها . ولكن ها هو ذا، يقف على هذا المسرح الذي لطالما شاهده من مقاعد المتفرجين ليجد أمامه المقاعد ممتلئة عن آخرها، لم يعرف منهم إلا أبوه و " شريف " و " مروة " والتي كانت ممتلئة البطن في شهور حملها الأخيرة .

أمسك زياد بالميكروفون ووقف ناظرًا للكل وإن كانت نظرتة بلا تركيز، ثم بدأ كلامه مبتسمًا ..

" مساء الخير ..

في البداية حابب أشكر حضراتكم على وجودكم الهادرة، وأخص بالشكر أستاذي إليي سمح لي بشرف الكلمة الختامية للمؤتمر .

مبدئيًا بعذر إنني بتكلم باللغة العامية، بس الندوة دي بتدور أصلًا حوالين الشباب، وبيتهياي إننا لو عايزين نوصلهم رسالة يبقى نتكلم بلغة أسهل بالنسباليهم .. ف أعذروني هخرج من النطاق الأكاديمي واللغة العربية الفصحى .

( المشكلات النفسية لشباب مصر، الأسباب والحلول ) ده عنوان المؤتمر..

بيتهيألي ده مش المؤتمر الأول ولا هيكون الأخير إللي بيتكلم عن نفس الموضوع .. مؤتمرات وأبحاث وندوات وبرامج توعية، عملنا كل حاجة في الدنيا.. بس للأسف أثبتت دراسة من قريب إن المواطن المصري واحد من أكثر المواطنين إللي مُعَرَّضين للإصابة بالإكتئاب .

عارفين المشكلة فين ؟ المشكلة إننا بنسأل نفسنا دايمًا هم ليه بيكتئبوا ؟ بنسأل نفسنا ايه الحل ؟ بس عمرنا ما سألنا نفسنا هو ليه الحلول ما بتجيبش نتيجة .. ليه برغم كل محاولتنا في تحسين حالة الشباب أو الناس عموماً بيفضلوا من أكثر الناس إللي معرضين للإصابة بأمراض نفسية .

بس عارفين ليه بنفشل ؟ عشان إحنا زي أي منظومة مصرية رافضين فكرة الخروج برة جلدة الكتاب، طالما الكلام والنظريات دي من الكتب والمراجع يبقى أكيد صح، وأي محاولة للتصحيح ما هي إلا محاولة فاشلة، ده لو ما إتحاربتش من قبل ما تبدأ أصلاً ..

النظريات إللي في الكتب صح، بس صح لأزمانها ولناسها . صح لناس كانت عايشة مرتاحة، لناس كانت حياتها أبسط كتير من حياتنا، لا النظريات القديمة بظروفها وأسبابها ونتائجها تنفع تتطبق دلوقتي، ولا نظريات إكتبت لشعوب أوروبا وأمريكا ممكن نطبقها هنا .

المشكلة الأكبر إننا بنلوم الشباب على أخطاء مش أخطاءهم، نلوم البنات على لبسها لو إتعاكست، الأب المدخن يلوم ابنه إنه يبشرب سجائر، نضرب الولد وهو صغير ونزعل لو طلع مش واثق في نفسه ومهزوز، نربي ولأدنا بتربية

## دكتور ستوكهولم

اهالينا إلهي ما تنفعلش لجيلهم، نخوِّفهم مننا ونزعل لو ما حكوناش، نقوله إلهي يضربك أضربه ونستغرب لو طلع عدواني . بنزعل أوي لو ولادنا طلعا منطويين على نفسهم ونسينا إن الحب مش فطري ولا فرض، الحب والأمان أحاسيس لو إنت ما زرعتهاش في ابنك ناحيتك عمرك ما هتشوفها منه .. هيجبك اه، بس لمجرد إنك أبوه، مش عشان هو بيجبك بجد .  
خلوني أحكيلكوا قصة ..

قصة شاب أهله ربوه كويس، علموه إزاي يكون راجل .. راجل بكلامه، بأفعاله،

راجل قوي، وعشان تكون قوي إوعى تعيط .. العياط ضعف وإنت لو ضعفت مرة هتفضل ضعيف على طول .

صاحبنا من صغره ما بيعيطش، يحصله إلهي يحصله ويفضل ساكت، بس ما كانش بيتكلم، مش من النوع إلهي بيعرف يوصل إحساسه بالكلام لأهله ولا لأصحابه القليلين أوي، مكنش بيتق في الناس بسرعة، ف إتعود يفضل لوحده .

صاحبنا كبر ومشاكله كبرت معاه، بس لسه زي ما هو .. ما بيعيطش . من وجعه عرف إن المشاكل النفسية أصعب كتير من المرض العادي، وعشان كده قرر يطلع دكتور نفسي، قرر إنه مش هيسيب فرصة يساعد فيها الناس إنها تكون أحسن إلا لما هيعملها .. وفعلاً نجح بمجموع ودخل طب وإتخصص نفسي .

في الفترة دي قابل بنت، بنت قدرت تكسر كل الشروط إلهي في حياته، بنت قدرت تدخل جوا دايرة الثقة الصغير أوي إلهي كانت فاضية،

معاها بس عرف يعني ايه فرحة . بس كان خايف، كان خايف إنه يأذيها .  
 كان خايف عليها من نفسه أكثر ما هو خايف عليها من الناس . كان عارف إنه  
 صعب، وكان بيتعلم إزاي يحب معاها .. كانت مختلفة عن أي بنت قابلها،  
 كانت قوية، واثقة من نفسها، من النوع إلي ما ينفعش تختفي ورا الرجل من  
 غير ما تبان، بس في نفس الوقت تقدر تحسسك إنك راجلها، بتعرف إمتي  
 تبقى حبيبتك بحبها ودلعها، وإمتي تبقى أمك بحنيتها وإحتوائها، وإمتي تبقى  
 بنتك بدلعها وشقاوتها .. كانت بتحبه، وكان بيعشقها .

وزي الطفل الصغير بدأت تعلمه الكلام، بدأ يتكلم قدامها، يحكيها،  
 يقولها اللي جواه كله من غير ما يخبي حاجة، من غير ما يتكسف من مشاكله .  
 وبعد ما كان مقرر يعيش لوحده، شاف إن كلمة لوحده دي تشملها ..  
 لوحده يعني بيها ومالهاش أي معنى تاني .

وفجأة، بنته الصغيرة كبرت .. بس هو مكنش قادر يشوف ده، كان لسه  
 مقتنع إنها صغيرة، وهي ما كانتش شايفة نفسها كده خلاص . إلي كان  
 بيحصل زمان رفضته دلوقتي، بقت مستنية حاجات تانية منه في الوقت إلي  
 هو مكنش فاهم، أو يمكن مكنش قادر يديها إلي كانت محتاجاه .

علمونا زمان إن أي حاجة بتنكمش بالبرودة، وهُمَّ علاقتهم بدأت تبرد،  
 تنكمش لحد ما بقوا مش مستحتملين بعض .. ولإن الملل يولد الانفجار، مكنش  
 ينفع يكمل في العلاقة وهو حاسس إنها مش عايزاه، رجولته ما كانتش  
 تسمحله يحس إنه رامي نفسه عليها .

سابوا بعض، وصاحبنا رفض يعيط، رفض حتى يبين إنه تعبان، كان  
 عايش عادي، لما كان بيتسئل عليها كان بيرد ببرود إنه مفيش نصيب، ربنا

يوقفها و خلاص . بس من جواه كان بيموت، علمته إزاي يتكلم ويأمنلها بس في نفس الوقت نستة إزاي يقدر يكون لوحده، بقى عامل زي العيل التايه، لا منه لاقى أمه ولا منه عارف يرّوح إزاي ..

مع الوقت بقى بارد، عايش يوم بيومه، إحساسه لحظي، يفرح أو يزعل في ساعتها وبعدين يرجع لنفس حالته تاني .. كل الناس لاحظت ده بما فهم هو، بس هو مكنش جواه طاقة يغيّر ده .. قالوله العياط بيريح، وكان نفسه يعيط بس ما يعرفش إزاي، كان بيعرف إزاي يطبطب بس عمره ما حب حد يطبطب عليه، كان شايف نفسه أقوى من كده، وهو عارف إنه أضعف واحد في الدنيا .

صاحبنا الدكتور النفساني لما حاول يطبّق نظريات كتبه شاف إنه مريض نفسي، إالي كان نفسه يساعد الناس بقى محتاج إالي يساعده . بس هو كفر بالطب وبالكتب وبالنظريات وكابر، هو أقوى من إنه يبقى مريض نفسي، وأغبي من إنه يقتنع إن عنده مشكلة .. حتى لو كل الناس شايفها .

خلاصة الكلام، الموضوع مش محتاج دكتور نفسي عشان يحللك مشاكلك، ممكن تروح لألف دكتور وتفضل زي مانت، وممكن تقابل حد يحتويك ويفهمك كويس، حد يقبلك بعيوبك ويحبك بجد .. فتلاقي نفسك بقيت كويس . ممكن يكون أبوك أو أمك، أخوك أو أختك أو صاحبك أو صحبتك، حبيبتك .. ممكن يكون أي حد، بس عمره ما هيكون نفسك .

ما حدش بيقدر يعيش لوحده، الوحدة إنتحار .. دَوّر ع الحلو في الناس، الحلو إالي يخليك تفضل جنهم، زي ما هُمّ هيدوّروا ع الحلو إالي جواك . لان

صدقني مهما كانت عيوبك هتفضل جواك حاجة حلوة إنت مش شايفها في نفسك، لازم الناس هم إلي يشوفوها .

الحب هو الحل، حب نفسك و دَوَّر عِ إلي يحبك وتحبه بجد، إلي يسمعك ويشيل عنك في تعبك، إلي تشوف فرحتك في عينيه، وإلي ما تتكسفش لو شافك في ضعفك أو وانت بتعيط.

وإوعي، إوعي مهما حصل تكتم دموعك جواك ..

" الحمد لله صاحبنا إلي ما عيطش طول حياته، عرف إزاي يعيط ..  
يمكن ما بتريحوش، بس أكيد لو ما إرتاحش أحسن بكتير من إنه ينفجر ..  
شكرًا "

قال زياد جملته الأخيرة وهو يبكي، تارگًا الميكروفون غير قادر على الحركة.. وقف الجميع البعض يصفق بحرارة والبعض الآخر يمسح دموعه التي انهمرت .

رفع زياد رأسه للأعلى، أخذ نفسًا عميقًا محاولًا إيقاف دموعه .. ثم أعطى ظهره للجمهور واختفى ..

(٦)

كانت عقارب الساعة تشير إلى التاسعة وبضعة دقائق صباحًا حينما وصلت ليلى إلى الكافيه ، إعتادت على المجيء يوميًا لإحتساء قهوتها الصباحية بعد سفر مروان منذ أسبوع تقريبًا .. دخلت ليلى لتجد المكان كعادته فارغًا إلا من ذاك الشخص الخمسيني ببذلته السوداء يحتسي قهوته ويده سيجارته، يجلس في ركن بعيد من المكان محدقًا بالشباك بشرود .

كان أكثر ما يعجبها بهذا المكان وخصوصًا بالصباح هو رائحة القهوة الخالصة، فلا زحام من العطور ينافسها ولا دخان السجائر الكثيف يختلط بها .. فقط القهوة مع مقطوعات موسيقية هادئة تجعلك تبدأ نهارك بسعادة وطاقاة كافية لإنهاء اليوم .. على الأقل .

أما اليوم، فقد اختاروا إن يبدأ اليوم على أنغام Louis Armstrong وهو يتغنى برائعته What A Wonderful World

- صباح الخير يا أنسة يا ليلى

- صباح النور يا إسلام

- الإسبرسو بتاعة كل يوم ؟

- اه ياريت .. و Brownies يا إسلام ما تنساش.

جلست ليلى على طاولتها المفضلة تنظر بعينها إلى الفراغ، لم تكن تعرف لماذا عادت إلى الظهور في هذا المكان من جديد .. فهذا المكان لم تكن تدخله إلا

مع زياد أو في وجوده، ولكن ولسبب ما فهي لم تشعر بتلك الراحة التي تشعر بها هنا في أي مكان آخر .

هل هي الموسيقى ؟ هل هو هدوء هذا المكان ؟ هل هو الديكور ؟ هل هي الذكريات .. ؟

مر أمام عينيها أول مرة تأتي لهذا المكان .. كيف تاهت في الطريق، وكيف تاهت في عينيه، ذلك الذي لم يترك فرصة لإستفزازها إلا واستغلها، وبكل تأكيد لم يعطها الفرصة إلا لتشعر بالإنجذاب نحوه منذ اللحظة الأولى .. تتذكر كيف كانت أيزميرالدا، تلك العجربة التي كانت فتنته، في أحد المرات سألته :

- إشمعنى إيزميرالدا ؟
- شوفتي أحذب نوتردام الأول ؟
- اه ، بس مفهمتش قصدك .
- أيزميرالدا كانت م العجر .. والعجر دول معروفين ..
- تاني هيقولي عجر .
- قالتها ليلي وهي تضربه في كتفه وتعض على شفتمها، ما جعله يضحك على تلك الطفلة الصغيرة .
- يا بنتي إفهبي، العجربين دول كانوا مشهورين بالسحر ، هي كانت شيهك بلامحها بتفاصيلها، ولولا إني أعرفك كنت قولت إللي رسم الشخصية ده كان يقصدك إنتي .
- أيوة شكلي يعني ؟ مش عارفة ما حسيتهاش أوي .

- مش شكل بس، هي شهك في كل حاجة، طريقته وكلامها وشجاعتها  
ولماضتها

- لماضتي دي هي إليي حبيتك فيا أصلاً

- هو بغض النظر عن إن لماضتك دي هتجيب أجلي .. بس أنا فعلاً  
بحبك من غير سبب . يعني لو في كل أسباب الدنيا إليي تخليني ما أحكيكش  
هفضل بحبك برضه .

سكتت ليلى ونظرت للطاولة بخدين في لون الورد وإبتسامة خجل زادتها  
جمالاً .

- بس عارفة يا ليلى، كل مرة بشوف الفيلم بخاف

- مني ؟

- لا .. من مصيري .

- إزاي يعني ؟

- أيزميرالدا في الفيلم بتحب الفارس، مع إن من أول الفيلم " كوازيمودو " هو إليي بيحبها، وأنا عمري ما كنت فارس يا ليلى، ولا كان يهمني  
إني أكون فارس في يوم من الأيام .. بس المرة دي أول مرة أبقى خايف ما أبقاش  
الفارس ده، أول مرة أبقى مرعوب أفضل زي مانا طول عمري .. " كوازيمودو " .  
أفاقت ليلى على صوت إسلام وهو يضع القهوة و ال Brownies أمامها ،  
نظرت له بابتسامة خفيفة ولم تعلق ، ظلت ليلى تحرك الفنجان بأصابعها  
دون النظر إليه ..

- خدي دوقى هتعجبك ..

- ما بحبش القهوة والله ما بحبش القهوة

- عشان خاطري

أخذتها ليلي وشممتها في البداية، نظرت لزياد وكأنها تتوسل إليه ألا يجبرها على شرب هذا الشيء، ولكن لا فائدة.. لا بُد لها أن تتذوقها .  
رفعت الكوب لشفاهها قبل أن تغمض عينيها وتبدأ في نوبة من السعال  
وكأنها تختنق ..

- حمد الله ع السلامة ..

قالها زياد وهو يضحك .

- إسكتت خالص .. ايه القرف إلي بتشربه ده ؟

- هي في الأول بتبقى وحشة، بس بعد كده بتعودي عليها وهتحبها .

- مستحيل .

- هتشوفي ..

نعم ، لقد أحببتها .. مثلما أحبته .

كم إشتاقت أن يجلسا سوياً لشرب القهوة من جديد، أحياناً تجلس مع مروان ليشربا القهوة، ولكن مروان لم يكن زياد ، لم يكن ذلك الشخص الذي يعشق القهوة إلى درجة القدسية، لم يكن ذلك الذي يهتم بأصغر التفاصيل في كوبه والذي وإن إختل أحدها إستطاع أن يعكر مزاجه إلى آخر اليوم، لم يكن ذلك الشخص الذي يتغزل فيها ويقارنها بكوب من القهوة ..

- بتحبني يا زياد ؟

- جدًا ..

- جدًا دي كلمة مطّاطة اوي، قد ايه برضه ؟

- بحبك زي ما بحب كوباية القهوة دي بالظبط

- كوابية القهوة ؟

- طبعًا .. مبدئيًا أنا معرفش أبدأ يومي من غيرها .. ومش متخيل نفسي ببدأ يومي من غيرك، مجرد ما بدوقها بحس إني قادر أفكر وأكمل .. وأنا عمري ما حسيت الإحساس ده من حد غيرك، الناس إللي ما بتحبش القهوة بتقول إنها وحشة عشان مُرّة .. يمكن ده بالنسباليهم شيء مختلف، بس أنا بحبك عشان مختلفة، عشان إنتي مش شبه أي حد . وبحبك - زي القهوة - سادة ، لأن أي حاجة هتزيد عليكوا مش هيبقى ليها أي قيمة جنب جمالكوا .. إنتي لوحدك أحلى واحدة في الدنيا .

مثلما كانت مختلفة في عينه، كان هو أكثر الرجال اكتمالاً في عينها . فهو الوحيد من بين كل أبناء آدم الذي استطاع أن يجعلها .. تحبه .

ولكن ما فائدة الحب الآن ؟ هي متزوجة وهو خاطب .. لم تعلم لماذا و لكن إحساسها بأنه سوف يكون مع امرأة أخرى وكأنه يحرقها من الداخل . هل ملأت مكانها هي ؟ نعم تشعر أنه لا يحبها، ولكن ماذا وإن أحبها ؟ هي أحبت مروان ، نعم لم تحبه كما أحبت زياد .. ولكن كبرياء المرأة بداخلها يرفض تمامًا فكرة أن يملأ قلبه أي أنثى سواها، هذا القلب يومًا كان مملكتها .. هذا القلب هو مَنْ سَمَّاهَا " إيزميرالدا "، ولن يكون هناك إيزميرالدا غيرها .

أفاقت ليلى من دوامة الذكريات التي تاهت بداخلها على صوت إسلام :

- أستاذ زياد إزيك .

لا، بكل تأكيد ليس هو، بقدر ما تمنّت بأن تراه بقدر ما تمنّت ألا يكون هو، شعرت بالخوف حين وجدته يقترب ولكنه كان متوجهًا إلى الرجل الخمسيني خلفها، نظرت ليلى بطرف عينها لتجده يحتضنه ويجلس معه مرتباً

على يديه، ظلاً سويًا لبضعة دقائق أرادت ليلى أن تغادر فيهم المكان، ولكن لم تقوَ قدماها على الوقوف .

نظرت من جديد لتجد زياد يجلس على طاولة قريبة منها، رأته كعادته، ممسكًا سيجارته يحركها على أنغام الموسيقى، مهممًا في الكتابة .

تلقت زياد ليراها تنظر له، حاولت جاهدة ألا تطيل النظر إليه ولكنه رآها .. نظر لها زياد مبتسمًا إبتسامته المعهودة لتبادلته الإبتسامة قبل أن يعود للنظر أمامه من جديد .

تعجبت ليلى من ردة فعله، ولكن ربما هي " نور "، ربما لا تحبه أن يتحدث مع أي امرأة أخرى .. وبصراحة لن تلومها، فهي حينما كانت مكانها كانت تغار عليه من أي من بنات حواء .. فقط، حينما كانت .

اتخذت ليلى قرارها، وقفت واتجهت نحو طاولته حتى وقفت في مواجهته مباشرة:

- هو أنا لو ما جيتش أسلم مش هتيجي ؟
- رفع زياد عينه ناظرًا إليها :
- قولت تكوني مستنية حد أو حاجة، وبعدين مش عارف مروان عادي ولا ايه وما حبيتش أعمل بينكوا مشاكل .
- مروان مش هيتضايق، هو عارفك وعارف إننا صحاب .
- قالتها ليلى وهي تسحب الكرسي لتجلس، ابتسم زياد هي تجلس مكرراً :
- عارف إننا صحاب .. !
- سحب زياد سيجارة من علبته حين فاجأته ليلى بالسؤال :
- زياد ممكن سيجارة ؟

- إنتي بقيتي تشربي ؟
- لا ، بس عايزة سيجارة
- لا طبعًا، يعني ما رضيتش أديها لك زمان، ايه هيخليني أديها لك دلوقتي؟
- معلش واحدة بس .. ما تقاش رخم وبدون مقدمات سحبت ليلى العلبة من أمامه واضعة سيجارة في فمها لتشعلها .
- قولي صحيح مين الراجل إلي كنت قاعد معاه ده ؟
- ده أستاذ عبد الله، صاحب شركة إستيراد وتصدير وبيجي هنا الكافيه كل يوم، كان بيعي هو ومراته الله يرحمها سوا وبيفضلوا يرقصوا على نفس التراييزة إلي هو قاعد عندها دي .
- الله يرحمها ..
- شوفتهم مرة بيرقصوا هنا وقعدت معاهم ، من يوم ما ماتت وهو بيعي هنا يقعد على نفس التراييزة ويخليهم يشغلوا Louis Armstrong عشان هي كانت بتحبه .
- ربنا يريح قلبه .. شكله كان بيعيها .
- نظر زياد لليلي طويلاً قبل أن يقول :
- أوي ..
- حاولت ليلى تغيير الموضوع :
- أخبار الماجستير ايه ؟
- الحمد لله خلصته .

- ايه ده ! مبروك، في ستوكهولم برضه ؟
- اه هي
- طب يلا يا سيدي عقبال الدكتوراه
- آمين يا رب. قوليلي إنتي عاملة ايه ؟
- أهو الحمد لله مفيش جديد، كل يوم نفس الكلام .. بس بدأت أعمل ديزاينات الفساتين إللي كان نفسي أعملها
- طب ما فكرتيش تنفذهم أو تكبري الموضوع ويبقى مشروع ؟
- والله يا زياد مش عارفة، أوقات بحس إنه اه نفسي أعمل كده، وأوقات بحس إنه لا شغلي مش حلو للدرجة .
- طبعًا مش محتاج أقولك رأيي عشان إنتي عارفة أنا رأيي ايه في شغلك من زمان، بس أنا هقولك إن حلمك فعلاً يستاهل إنك تكلمي فيه .
- قاطعهما إسلام وهو يحضر القهوة إلى زياد .. أشعل زياد سيجارته، ومع أول رشفة من القهوة أغمض عينيه متلذذًا بكل نقطة تلمس شفاته قبل أن يتمتم " صباح الخير " .
- ضحكت ليلي على طريقته ..
- ما إتغيرتش خالص يا زياد
- وعمرى ما هتغير ع القهوة أبدًا .. قوليلي صحيح، أخبار مروان ايه ؟
- سكتت ليلي وكأنها صُدمت من السؤال ..
- كويس الحمد لله
- هو مش جاي ؟
- لا مسافر تبع الشغل ..

- اه . ربنا يوفقه .
- وانت عامل ايه مع نور ؟
- الحمد لله
- أيوة ما إختلفناش ، الحمد لله بس الحمد لله ايه ؟
- سحب زياد نفسًا من سيجارته قبل أن يرد وهو ينفث الدخان :
- كويسين .
- وليه بتقولها وانت مش مبسوط ؟
- فاكرة زمان أول مرة شوفتك ؟ ساعتها قولتلك إن أحيانًا الدنيا بتجبرنا نتحول من مبسوطين لراضيين . بيتيألي أنا إتعلمت إزاي أكون راضي .
- وانت ايه إللي ما يخليكش مبسوط ؟ خلصت ماجيستريك وشغال وخاطب بنوتة زي القمر ، ايه إللي يخليك مش مبسوط ؟؟
- في فرق بين إنك تنجح وإنك تحلم يا ليلي ، النجاح ده مش ضروري يكون في حاجة بتحميها أو نفسك فيها ، يعني إنتي مثلاً خريجة حقوق والحمد لله نجحتي فيها .. بس دلوقتي قرررتي تحققي حلمك وتعملي تصاميم فساتين .. في حقوق أكيد كنتي راضية عن نجاحك ، بس أكيد ما حسيتيش بالفرحة غير لما بدأتي تحققي حلمك .
- وانت بقى حلمك ايه ؟
- أنا بطلت أحلم يا ليلي ، بطلت أتمنى أي حاجة .. أنا كل إللي طالبه إني أنجح ، أنجح في حياتي ، في شغلي ، مش مهم ده إللي كان نفسي فيه ولا أسوأ الإختيارات ... المهم إني أنجح فيه .
- ليه كده ؟ ده إنت إللي علمتني إزاي احلم ..

- عشان الحلم على قد ما هو كبير بالنسبالك على قد ما قادر يكسرك، انا عمري في حياتي ما حلمت بحاجة وتحققت يا ليلي .. كان زمان نفسي اطلع لعيب كورة وما حصلش .. كان نفسي أعرف أرسم، ومن بين كل المواهب في الدنيا الوحيدة إللي فشلت فيها كانت الرسم ، بس كل ده كان عادي و كنت قادر أعديّه .. بس المرة الوحيدة إللي حلمت فيها حلم وكنت طاير بيه السما هي المرة الوحيدة إللي وقعت فيها على جدور رقبتى، كانت أول وآخر مرة أحس إني لما خسرت حلم ووقعت إتكسر .. وأنا مش مستعد أتكسر تاني يا ليلي .

سكتت ليلي وهي تنظر إليه مباشرة، فهي تعلم أنها كانت الحلم، هي مَنْ كانت جناحين ترفعه إلى السماء السابعة وحينها توقفت عن التحليق لتسقط به إلى الأرض ..

- بس بيتيألي ربنا عَوْضك بالأحسن ..

- الأحسن ؟ من وجهة نظر مين ؟ الأحسن ده المفروض يكون في عيني أنا .. هي فعلاً بنت كويسة وجميلة، بس هي عمرها ما كانت ولا هتكون إنتي يا ليلي .

لم تجد ليلي الكلمات المناسبة واكتفت بالنظر للطاولة وهي تحرك ولاعته يميناً ويساراً، نعم كانت تعلم أنه يقصدها، نعم كانت تتحدث عن نفسها حين أخبرته أن الله قد عَوْضه بالأفضل، ولكن لم تكن تملك القدرة على الحديث عن الموضوع بهذه الصراحة .. لن تقدر على الوقوف أمامه بعدما حاولت جاهدة طوال تلك الفترة أن تتجنبه، فهو - ومهما حدث - سيظل .. حبيبها.

حاولت ليلي استجماع شجاعته لتقول :

- بيتهياًلي إن الموضوع ده خلص من زمان يا زياد، وكل واحد مننا شاف طريقه .

- صح ، بس هل ده معناه إننا شفنا طريقنا إليلي كنا مختارينه زمان ؟

- أنا إخترت مروان ..

- متأكدة إنك إخترتيه يا ليلي ؟

- يعني ايه ؟

- أصل لو إخترتيه ايه إليلي خلاكي تقعدني معايا دلوقتي ؟ وايه مخليكي

لحد النهاردة لسه لابسة السلسلة إليلي جبتها لك ؟

وضعت ليلي يدها على صدرها ممسكة بالزمردة الحمراء .. نعم لقد كانت

آخر ما يربطه بها، كانت آخر وسيلة لتشعر بوجوده .

حاولت ليلي إيجاد رد مناسب، فزياد وكأنه يملطها بالكلام بدون أن

يعطيها الفرصة حتى للرد ..

- عشان إحنا صحاب

- صحاب ؟ من إمتي يا ليلي كنا صحاب ؟ إحنا عمرنا ما عرفنا نكون

صحاب .. لو عرفتي؛ أحبيكي على ده، بس أنا عمري ما عرفت ولا هعرف

أشوفك غير حبيبة، عقلي رافض يقبل إنك مش ليا، رافض يشوفك أي حاجة

غير إيزميرالدا .

- ولنفترض إنه صح الكلام .. ده مش هينفع، إحنا كده بنجرح ناس

تانية بيحبونا لمجرد إننا بنحب بعض بس إختراهم .

- وهو ايه إلي كان يصح وحصل يا ليلي ؟ إني يوم ما أحب فعلاً  
تسيبيني ؟ إني أشوفك في فستان فرحك جنب راجل غيري ؟ إني أبقى عارف  
إنه بيحبك، يرجع البيت يلاقيكي قدامه ؟ إني أبقى عارف إنكوا بتاكلوا  
وتشربوا وتناموا سوا ؟ أبقى عارف إن في يوم من الأيام هيبقى ده أبو ولادك ؟  
أنا آسف يا ليلي .. بس مش كل إلي يصح بيحصل، بيتيألي إلي ما  
بيصحش بس هو إلي بيحصل، وأنا مضطر أقبله لأن هو ده الوضع .

- بس يا زياد .....

- مش بس يا ليلي، أنا عمري ما عرفت أشوفك صاحبة .

أنا كل يوم بنام بحلم بيكي، بحلم بتفاصيلنا وكل لحظة عيشناها سوا،  
بس الفرق إني كل مرة ما بقولكيش غير ليه، ليه بعدتي ؟ ليه هتسيبيني  
لوحدي .. كل مرة بمسك فيكي زي العيل إلي خايف يتوه، وكل مرة بتمشي ..  
أنا عمري ما هعرف أشوفك صاحبتني يا ليلي .. أنا من يوم ما شوفتك وأنا  
عارف إنك غير أي حد عددي عليا، عارف إنك الوحيدة إلي دخلتي مكان جوايا  
عمر ما حد دخله ولا هيدخله .. إنك أكثر حد في الدنيا إتعلقت بيه وإستقويت  
بيه، وأكثر حد في الدنيا كسرتني .

بس عارفة المشكلة فين ؟ المشكلة إني وبرغم كل ده مش قادر أبطل  
أحبك يا ليلي، مكانك في قلبي لسه زي ما هو .. وهيفضل زي ما هو لحد ما  
أموت، محدش في الدنيا هيقدر يعوضه .. عارفة، أنا لحد النهاردة مش قادر  
أقول لنور كلمة "حبيبتني" ، بحس نفسي كداب وأنا عمري ما حببت الكذب،  
الكلمة دي ربنا خلقها بالنسبالي عشان تتقالك إنتي وبس يا ليلي .. إنتي وبس .

- حاولت ليلى جاهدة كتم كل تلك الدموع بداخلها، ولكن اللعنة على تلك الهاربة التي أفلتت من بين جفنيها لتسير ببطء على خدها ..
- ومين قالك يا زياد إني بطلت أحبك ؟ بس أنا خوفت .. خوفت وأنا ما إتعودتش إني أخاف، أنا عمري ما كنت ضعيفة وعمري ما شوفت نفسي ضعيفة غير معاك .
- ودلوقتي مبسوفة ؟ كان بيتنا مشاكل ؟ اه .. أي اتنين ممكن يبقى بينهم مشاكل، بس أنا كنت كل مرة بقول هتتحل .. مهما زعلت منك كنت عارف إنه إحنا لبعض، وإن كل المشاكل هنعديها سوا .. لكن عمري ما حطيت فكرة إننا نبعد دي كإختيار متاح . المشكلة يا ليلى إنك لما بعدتي أنا توهت، لا بقيت عارف أرجع مكان ما بدأت .. ولا عارف أكمل الطريق للآخر .. خليتيني لعنت قلبي ألف مرة إنه حبك أوي كده، وألعه مليون مرة لو بطل في يوم يحبك لحظة .
- أنا مكنتش عارفة أكمل يا زياد، مكنتش هقدر .. وكنت دايمًا بتجنب أي مواجهة بيبي وبينك، بخاف أضعف تاني .. يمكن في الأول كان ينفع بس دلوقتي في مروان وأنا بحبه ..
- بتحبيه ممكن .. لكن تبقي كذابة لو قولتيلي إنك بتحبيه قد ما حبتيني.
- كفاية يا زياد ..
- ما هو كفاية فعلاً يا ليلى .. كفاية وجع، بس عشان أنا غبي فعلاً ... قد مانا مكسور منك على قد مانا مبسوط إني قاعد معاكي .. على قد مانا نفسي أقولك أمشي على قد ما نفسي آخذك في حضني .. على قد مانا عارف إنه ما

ينفعش على قد ما نفسي أقولك نهرب بعيد، بس كله ما ينفعش يا ليلي .. كل ده ما ينفعش؛ لأن زي ما قولتي حاجات كتير إتغيرت ..

أنا خلاص يا ليلي عارف سكتي ايه، عارف إننا مش هنبقى لبعض ومتعايش مع الوضع .. بس الفرق بيني وبينك يا ليلي إني ما بضحكش على نفسي، ما بقولش إني إخترت طريق أنا عمري ما إخترتة، ولو كان الطريق ده متاح وإنتي موجودة عمري ما كنت هختاره زي ما بيتيألي إنتي كمان ما كُنْتِش هتعملي كده .. الفرق إني متصالح مع فكرة إني لسه بحبك في الوقت إلي إنتي بتحاولي تموتي الإحساس ده جواكي كل يوم ..

- عشان أنا مش خاينة يا زياد، تفتكر إحساسهم هيكون ايه وهُمَّ عارفين إننا بنحب ناس غيرهم ؟ ..

قالتها ليلي وهي تطلق العنان لدموعها

- إنتي بتحبيه وأنا بجمها .. بس ده مش معناه إن حد هيعرف ياخد مكانك جوايا، مكانك ده أكبر بكتير أوي من إن أي حد مهما كان يقرب منه .. المشكلة إن قلبي زي حياتي بالظبط فضيوا بعدك، حاولت أعمل زيك و أملاهم بس فشلت .. أنا فعلاً بحبيكي على ده، بحبيكي إنك أقوى بكتير مني .

نظر زياد لليلي، حرك يديه ليمسح دموعها، وحينها أغلقت ليلي عينها وكأنها قد استسلمت لإحساس الدفء، أمسكت كفا يديه تقرّبهما من خدها أكثر لتشعر معها أنها أخيراً قد وجدت ضالتها .. كم اشتاقت لتلك اللمسة، لذلك الإحساس بالأمان الذي لم ولن تشعر به مع غيره ..

- أنا بحبك يا زياد ..

- عارفة، دي أول مرة ما أبقاش عارف أرد على الجملة دي ..  
قالها زياد وهو بيتسم موجِّهًا نظره لعيني ليلي مباشرة، متمنيًا أن  
تستطيع قراءتها في عينيه .  
بدأ زياد في الملمة هاتفه وعلبة السجائر معلنًا عن رحيله ..  
أمسكت ليلي بيده بقوة وكأنها تتمسك بآخر أمل لها في البقاء على قيد  
الحياة ..

- أرجوك ما تمشيش ..  
- ما ينفعش يا ليلي .. المرة دي أنا إليي خايف أضعف . أنا مش مستعد  
أتعلق بأمل تاني يا ليلي، مش مستعد أتعلق بيكي تاني وأنا عارف إنك مش ليا ..  
سحب زياد يده من يد ليلي، نظرت له والدموع تنسال بسلاسة على  
خدها تشق طريقًا من الوجد والخوف، وقف زياد أمامها طابعًا قبلة على  
جبهتها .. ثم أدار ظهره لها وإتجه للباب تاركًا ليلي وحيدة في المكان .. تمامًا كما  
تركته في المرة الأولى، ولكن هذه المرة هي من شعرت بالضعف، هي من تأكدت  
أنها لن تستطيع - مهما حاولت - أن تزيحه من تفكيرها أو أن تسكن قلبها  
غيره ..

نعم أحبته، ولن تحب غيره أبدًا .  
ركب زياد سيارته لا يعلم إلى أين، تائهًا بين الطرقات، بين رغبته في العودة  
إليها وبين الصواب .. اللعنة على تلك الظروف التي تجعل من احتوائها بداخل  
حضنه خطأً، اللعنة على الظروف التي تجعل من فراقهما أمرًا حتميًا، اللعنة  
على الحياة التي دائمًا ما ترفض أن تكون النهاية سعيدة .

عاد زياد إلى البيت مُحاطًا بنظرات أبيه القلقة التي قابلها بإبتسامة وقبله حانية على جبينه قبل أن يدخل غرفته ويُغلق بابها عليه، ألقى بجسده على السرير مقاومًا صورتها التي كانت أمام عينيه أينما ألقى بنظره .

كانت محاولات نومه متضطربة، متقطعة، مملوءة بأحلام عنها .. تارة يرى نفسه معها في فرحهما الذي لا طالما حلما به، كان يقف أمام البحر الذي ؛ ولتحبيتهما ازدادت مياهه زرقاة وصفاء، من خلفه كانت الزهور البيضاء المفضلة لديها والتي اكتست بها الرمال راسمة الطريق إلى المكان الذي يقف فيه ... وأمامه إصطف المدعوين على كراسيمهم .

أما في الخلفية فكانت الفرقة الموسيقية تلعب إحدى مقطوعات السوناتا التي رقصا عليها لأول مرة .. ثم جاءت هي ممسكة بذراع أبيها .. بفستانها الأبيض المنقوش بالورود الصغيرة الذي كشف عن كتفين رقيقتين، وطرحتها التي تغطي وجهها ولم تداري تلك الإبتسامة على شفيتها، كانت كما لطالما تخيلها .. ملاكًا يمشي مُتَّجِهًا إليه .

يقف ناظرًا إليها وكأنَّ كل مَنْ في المكان قد إختفوا ولم يتبقَّ سواها، تقرب منه .. فتزداد ضربات قلبه وكأنَّه يرقص بداخله، وصلت أمامه مودعة أبيها .. محتضنةً إياه .. ماسحة دموعه التي هربت من عيناه، فيها هو سترك محبوبته الصغيرة ترحل عنه، لأول مرة ستبيت في بيت ليس بيته، لأول مرة سيسيقظ ليلاً ليجد غرفتها فارغة بدونها، ستركها ترحل إلى رجل آخر .. تلك الفرحة الممزوجة بالغيرة، و الألم .

تتجه نحو زياد الذي يمد يده إليها ليمسك بيدها، ولكنه يجد يد أخرى تمتد من خلاله، تمسك ليلي بتلك اليد .. لينظر زياد خلفه ليجد أنها تمسك

بيد مروان، تقف أمامه بعينين مملوءتين بالفرحة، يصرخ زياد ولكن بلا صوت، يحاول أن يدفع مروان بعيداً، أن يخنقه، أن يهرب بعيداً، ولكن وكأنّ قدميه قد رُبطت بالأرض مانعةً إياه من الذهاب قبل أن يتمزّق قلبه تماماً ..

ثم يتغير المشهد، يجد نفسه في الكافية على الطاولة مع شريف ومروة، يحاول التأكد هذه المرة أنّه موجود .. فيتحدث مع شريف الذي يجيبه، ثم تدخل هي، مرتدية قميصها الأسود .. تاركَةً شعرها المموج ورائها يطفو وكأنّه موج البحر، يمد يده ليسلم عليها، فتبتسم وتبادلته السلام، تجلس أمامه مباشرةً ... فتبدأ مروة بالكلام :

- زياد صاحبي أنا وشريف من زمان، ليلي صاحبة عمري .

ابتسم زياد قبل أن يرد شريف :

- معلش يا ليلي والله كان نفسي أحضر الخطوبة، بس أكيد مروة قالتلك الشغل كان عامل إزاي .

تبدّلت الإبتسامة على وجه زياد الذي قاطعه :

- إنتي مخطوبة ؟

- اه

أحس بأنّ قلبه يسقط من جسده، يسقط إلى هاوية ليس لها قاع حين بدأت الصورة في التلاشي، ثم كانت هي مجدداً، فقط تنظر له وتبتسم ..

- ليه يا ليلي ؟ ليه ؟

قالها زياد وهو يبكي بجسد هزيل يهتز بكبكاء الأطفال، لم تتبدّل الإبتسامة من على وجهها وما أن اقتربت منه شيئاً فشيئاً حتى إحتضنته .. مما زاد من بكاؤه ومن سؤاله الذي ظل يردده بلا توقف حتى فتح عيناه ..

وجد المخدة مُبتلة وكأنه كان يبكي أنهارًا من الدموع .

نظر زياد إلى ساعته فوجدها تشير إلى العاشرة وبضع دقائق، قام متجهًا إلى الحمام ليقف تحت المياه المنهمرة على جسده؛ علّمها تبرد تلك النار المستعرة بداخله، علّمها تغسله من خطايا تعلّق قلبه بها، علّمها تمحي صورتها من رأسه .. ولكن كيف للماء أن يمحو شيئًا حفر في ثنايا قلبه ؟ كيف له أن يزيل آثارًا قد إمتزجت بدمائه ؟ كيف له أن يزيح ذكريات يراها أينما ذهب ؟

خرج زياد مرتديًا ثيابه لا يعرف وجهته، يريد الهروب فقط ..

ظل يتجوّل بسيارته حتى وجد نفسه على الكورنيش، في نفس البقعة التي وقف فيها مع والده يوم زفافها، ذلك المكان الذي أخبره والده أنه كان يجلس فيه هو ووالدته ..

كانت الساعة تشير إلى منتصف الليل حين خرج زياد من السيارة وبفعل البرد والشتاء كان المكان شبه خاليًا .

وقف زياد لدقائق لم يحصّها ناظرًا للماء بلا هدف، ثم أشعل سيجارته لينفث دخانها حين إنفكّ لسانه .. :

" إزيك يا أمي .. عارفة، يمكن ما كنتش بقولها لك كثير زمان بس إنتي وحشتيني أوي، وحشني حضنك إللي كان يساع الدنيا كلها، معرفش كنت أنا إللي بتطمّن جواه ولا إنتي إللي بتطمني بيا وأنا فيه .. بس متأكد إني محتاجه . يمكن زي حاجات كثير أوي ما بنعرفش قيمتها غير لما تروح، بس واجعني أوي إنك رُحتي .

كان نفسي أقولك بحبك، كان نفسي أبوس إيدك ورجلك كل يوم ، كان نفسي تبقي هنا يا أمي ..

عارفة يا أمي .. من يوم ما رُحتي وأنا زاهد الدنيا، ما بقاش ليا نفس في أي حاجة، حتى الحاجات إلي كنت بحبها زمان بقت عادية، كل فرحة بقت ناقصة ضحككتك، كل مشكلة بقت ناقصة إيدك الحنينة إلي بتطبطب، البيت بقى وحش أوي من غيرك، بصراحة بابا مش مقصّر في أي حاجة ..  
بالعكس هو بيعمل كل حاجة عشان يحسّسني إني مش لوحدي، بس جوة كل واحد فينا كلام مش قادر يقوله، دموع بنبص لبعض وإحنا شايفينها وبنداريمها .. بنضحك عشان ما نضعفش، الدنيا بعديكى باهتة يا أمي .. دبلانة..  
إلي مصبّرني إني عارف إني لما أموت يمكن هشوفك، يمكن ساعتها هحضنك، يمكن ربنا يسامحني ويخليني أدخل الجنة حتى لو هدخل بس أزورك وأمشي تاني .

ابنك إتخرّج يا ست الكل، بقى دكتور أهو زي ما كان نفسك تشوفيه، عايزك بقى في الجنة تتباهي بيّا وتقوليلهم أنا أم الدكتور ..  
أه صحيح مش أنا خطبت ؟ واحدة كده بنت حلال وزى القمر، بتحبني أوي يا أمي .. ولو كنتي شوفتها كنتي أكيد هتحبها زي ما بابا بيحبها بالطبط، فمها من ملامحك بس هتفضلي في عيني انتي أحلى واحدة يا ست الستات .  
بس بصراحة أنا مش عارف أنا بحبها ولا لأ، هي طيبة وبننت ناس وأنا مرتاح معاها، بس مش عارف أنا بحبها ولا لسه مش قادر أنسى ليلي ..  
إنتي فاكرة ليلي يا ماما صح ؟

عارفة، من بعد ما روحتي ليلي دي جت تطبطب على قلبي، جت تلصّم روحي إلي إتكسرت بعديكى، كانت حلوة أوي يا ماما لدرجة حسّستني إن إنتي

إللي دعيتي ربنا إني أقابلها .. بس مشيت، مشيت وخذت معاها إللي باقي جوايا من روح .

هي ما فضلتش ليه ؟ ليه مكتوب علينا إن كل حاجة نتعلق بيها تروح ؟ ليه لازم نرضى بالأمر الواقع والمكتوب إللي دايماً ناقص ؟ ليه لازم نرضى بالمفروض مش المرغوب ؟ ليه مكتوبلي أعيش بخسر ما بكسبش ؟ ما تسألني ربنا يا ماما .. إنتي مش جنبه .. ؟

قوليله ليه ؟ السؤال مش حرام يأمًا، الحرام بجد هو الوجع إللي بينهش في قلبي ليل نهار من غيرها، الحرام بجد الروح إللي بتموت ألف مرة في اليوم من غيرها، يعني عايزة تقوليلي إني أشوفها لراجل غيري بتحبه وقابلة إنها تعيش معاها بعد ما كانت ليا، ده حلال ... وكلمة ليه هي إللي حرام ؟

أنا فاكركويس إنك قولتيلي ربنا دايماً بيكتبلنا الخير .. بس ليه ما كانتش هي الخير ؟ ليه أقابلها وقلبي يتعلق بيها وبعدين تمشي ؟

منا كنت لوحدي يأمًا، ما كنتش عايز حاجة ولا عايز حد، كنت عايش راضي بالحال وما بتكلمش، ليه تيجي تصحيني؟ عشان تموتني بالبطيء ؟

هو ده الحلال يا أمي ؟ هي دي الرحمة إللي دايماً كنتي بتقوليلي علمها ! والله يا حبيبتي أنا ما بقيتش عارف أنا عايز ايه، ما بقيتش عارف أنا نفسي أخذها في حضني وأهرب جواه ولا نفسي أهرب منها، ما بقيتش عارف أنا نفسي تبقى ليا ولا إتعودت على فراقها، ما بقيتش فاهم أنا بحبها ولا لا ..

أنا تايه يا أمي، ضايع من غيرها ..

حاسس إن ربنا شال البنات كلهم من عيني عشان ما يفضلش غيرها، بس المشكلة إن صورتها دايماً جوايا ما بتفارقش صورة جوزها،

## دكتور ستوكهولم

ما تخافيش .. ابنتك عارف الصح م الغلط وعمره ما هيوَقَع بين اتنين متجوزين، بس أنا تعبان يا أم زياد، تعبان ومش عارف أشكي لمين غيرك .  
إنتي حاسة بيا صح ؟ أنا مش عارف أقول ايه .. بس أنا عارف إنك حاسة بيا، عارف إنك سامعاني وشايفاني ..  
أمانة عليكي يا ست الكل إدعيلي، خليكي جنبي و ما تسبينييش ..  
بابا بيبعتلك السلام كل يوم، أكيد بيوصلك .. بس برضه أنا عايز أوصلهولك بنفسي، وبيقولك إنه بيحبك أوي .  
وأنا كمان يا أمي بحبك، بحبك أوي ..  
خدي بالك من نفسك يا ست الكل، وخدي بالك مني ..  
ابنتك مهما كبر هيفضل العيل الصغير إلي كان بيجري عليكي في كل وقت..

سلام يا حبيبتي ."

وقف زياد رافعاً رأسه للسماء مبتسماً، قبل أن يطفئ سيجارته ويعود لسيارته مُتجهاً للبيت.

(٧)

- صباح الخير يا حبيبتى ، يلا قومي أنا عاملك الفطار .
- فتحت ليلى عينها على قبلة حانية من مروان لمست جبينها، لتبتسم له قبل أن يكمل وهو مُتجهًا للمطبخ :
- قومي إغسلي وشك يلا بسرعة، أنا واقع م الجوع ومش هاكل من غيرك .
- مرت دقائق قبل أن تقوم ليلى من سريرها لتقف أمام المرأة ، ملامحها التي لم تتغير كثيرًا وإن كانت قد خسرت بعض الوزن بسبب قلة إهتمامها بالأكل في الفترة الأخيرة، ووجهها الذي أصبح خاليًا من التعبير في معظم الأوقات ..
- تنظر إلى صدرها المزين بالزمردة الحمراء التي لم تجرؤ على خلعها أبدًا، فربما هي الشيء الوحيد المُتبقّي من زياد، احتضنتها بيدها وكأَنَّها تخشى أن تخسرها كما خسرتَه يومًا ما ..
- قامت ليلى لتغتسل، ثم دخلت المطبخ لتجد مروان يجلس في انتظارها بعد أن أعد لها الفطور وكوب النسكافيه الصباحي مستقبلاً إياها بإبتسامة :
- ده ياريت كل الناس لما تصحى تبقى حلوة كده والله .
- ضحكت ليلى :
- حلوة فين بس ؟ ده أنا بالبيجاما وشكلي غريب خالص
- برضه هتفضلي في عيني أحلى واحدة في الدنيا

أمسك مروان بيدها مُقبلاً إياها وهي تجلس لتبتسم ليلى بخجل، مر الفطور وهما يتبادلان الحديث، أخبرها ببعض المواقف في عمله .. بينما هي لم تمتلك الكثير لتخبره به، فمنذ رحيله وبعد أن قابلت زياد لم تخرج من المنزل إلا للضرورة، فقط زيارات قليلة من أمها أو مروة، أما هي فأهملت تصاميمها وقضت معظم وقتها في السرير أمام التلفاز الذي لم تكن حتى تنتبه إليه كثيراً.

- إنتي عارفة إنك وحشتيني ؟

- وإنت كمان وحشتني اوي

- أنا عارف إنني مقصّر معاكي، بس والله مش بإيدي، لكن النهاردة بقى

أنا عازمك ع الغدا برة.

- ما تخلينا في البيت يا مروان، أنا اليومين دول مش قادرة أخرج

خالص.

- مالك يا حبيبتي ؟ تعبانة ؟

- لا بس حاسة نفسي مجهددة شوية، وماليش تقل ع الخروج أوي.

- إحنا بقالنا كتير ما خرجناش، وأنا نفسي أخرج معاكي، والصراحة أنا

مش هقبل أسمع لا خالص يعني، ف انا عايز القمر بقى يلبس فستان حلو

كده عشان أنا محضّر لليوم ده من بدري ماشي ؟ ماشي إتفقنا.

لم يترك مروان لها فرصة الرد ، فإبتسمت مُعقبة : ماشي .

إنهيا من تناول الفطور، فقامت ليلى لتأخذ الأطباق لتنظيفها قبل أن

يمسك مروان بيدها :

- لأ، انتي النهاردة ما تعمليش حاجة خالص، سيبيلي الحاجة دي أنا

هعملها.

- أنا هحطهم في غسالة الأطباق أساسًا .. مش هعمل حاجة يعني.
- حتى لو، إقعدني إرتاحي وأنا هغسلهم، وشوفي بقى غسيلي ولا غسيل الغسالة دي.

أخذ مروان الأطباق ليغسلها، وجلست ليلي تشاهده مستمعين إلى فيروز سويًا، كان مروان لا يترك فرصة ليُعَبِّرَ فيها عن حبه لها إلا واستغلمها، كان يهتم بتفاصيلها الصغيرة التي ربما لم تكن هي تلتفت لها أصلًا، يُدَلِّلُها وكأنها ابنته، ويهرب إليها كطفلٍ صغيرٍ يهرب إلى حضن أمه، يعود إلى المنزل بإبتسامة لا تفارقه بمجرد أن يراها مهما كان متعبًا، حتى في المشاكل التي يمرّان بها .. لا تتذكر أنه رفع صوته عليها، بل كان يأتي ليصالحها " ما هو أنا مش متعود إني أنام وإنتي مش في حضني " ..

كان مثاليًا في كل شيء، لكنه لم يكن "زيد".

أنهى مروان غسل الأطباق، وجلسا يشاهدان التلفزيون سويًا .. ثم دخل مروان ليستحم إستعدادًا للزول، إختار مروان بدلته الرصاصية بقميص أبيض وربطة عنق سوداء، أما هي فدخلت لتفتش في فساتينها لتختار في النهاية فستانًا أزرقًا داكنًا بأكمام قصيرة .. ذات قماشة شفافة مطرزة بالورود، وتركت شعرها ينساب خلفها، وضعت من العطر الذي أهداه لها مروان مع لمسات خفيفة من المكياج الذي اختارت أن تترنّ بأحمر شفاه يتماشى مع الزمردة في رقبتهما.

## دكتور ستوكهولم

بعد نصف ساعة وصلا إلى أحد المطاعم الكلاسيكية الشهيرة ذات البوابات الخشبية، والتي توحى بأنك في طريقك لدخول إحدى الأماكن الملكية بلندن ..

إكتست الحوائط بلون بيج متماشياً مع الأرضية الخشبية، ومزينة بتلك المصابيح التي تضيء المكان بضوء خفيف على استحياء، استقبلهما النادل بإبتسامة ترحيب ليرشدهما إلى طاولتهما ليجلسا، كانت عينها تجوب المكان متأملة إياه لفترة قبل أن تلتقي عينها بعيني مروان الذي كان ينظر لها مبتسماً:

- كنت عارف إنك هتجبي المكان، أنا عارف إنك بتجبي الحاجات الهادية دي

- أنا بحب الحاجات الكلاسيك جداً.

- منا عارف.

- يا سلام، و عارف إيه كمان ؟

- عارف إنك أحلى ست في المكان كله.

إبتسمت ليلى في خجل قبل أن يمسك مروان بيدها مُقبلاً إياها ..

إختارا الطعام وإنتظراه وهما يتحدثان على أنغام مقطوعات شوبان، حديث لم يخلُ من نظرات مروان التي ركَزَت في عينها مباشرة معلنان استسلامه لتلك الفاتنة أمامه، والكثير من كلمات المدح في جمالها الذي لم ولن يرى غيره أبداً .

بعد أن أكلا إستأذنها مروان للقيام للحظات، ظلت فيها تتأمل المكان وهي تشرب قهوتها.

- رأت مروان يتحدث مع النادل قبل أن يعود ليقف أمامها :
- أنا عارف إنك بتحبي المزيكا دي، ودي أول مرة ليا بصراحة أعمل كده.. بس تسمحي لي بالرقصة دي ؟
- قالها و هو ماداً يده لها لتمسك بيده وليرقصا ..
- عارفة يا ليلي، أنا عمري ما كنت أتصور إني ممكن أحب واحدة الحب ده كله
- بس إنت كنت تعرف بنات كتير يعني .. ما حبيتهمش ليه ؟
- معرفش، أنا فعلاً معرفش ايه خلاني أحبك أوي كده، لو قولتلك سبب أبقى كذاب .. بس أنا إلي أعرفه إني فعلاً بحبك وعمري ما حسيت إني مبسوط غير وأنا معاكي .
- ابتسمت ليلي له قبل أن يكمل ..
- أنا عارف إني يمكن مش راجل مثالي، بغيب كتير وبسيبك وأكيد فيا عيوب .. بس كلنا بشر وأنا على قد ما أقدر بحاول أكون أحسن عشانك، مش هخبي عليك .. أنا زمان مكنتش كده، كنت أوحش بكتير .. بس إنتي جيتي خليتيني أحسن، خليتيني لأول مرة أبقى عارف أنا عايز إيه .
- بس أنا مش حلوة كده يا مروان، أنا كمان فيا عيوب .. ويمكن أنا إلي مش عارفة أبين لك حبي ليك ..
- وأنا مش محتاجك تبينهمولي، أنا مش عايز غير إني أشوفك مبسوطه، مش عايز غير إني أرجع البيت كل يوم أشوفك ..
- عارفة، أنا أكثر وقت بحس إني عملت فيه حاجة حلوة هو لما بعمل حاجة أشوفك بتضحكي بسببها، ساعتها فعلاً بحس إني ليا قيمة .

سكتت ليلي ، ليكمل:

- بحكم شغلي إتعودت ما أخافش لأنه ما ينفعش أخاف، بس أنا ما بقيتش بخاف من أي حاجة قد إني أصحى ف يوم من النوم وما ألاقيكيش جنبي، على قد منا ما إتعودتش أخاف .. على قد منا مرعوب إني أخسرك يا ليلي .

أخفت ليلي رأسها بحضنه قبل أن يُقبّل رأسها ويكمل ..:

- أنا بحبك أوي يا ليلي  
- وأنا كمان بحبك يا مروان  
- إوعي تمشي وتسيبيني، أنا فعلاً ماليش غيرك  
- إنت إللي ما تسيبنيش يا مروان، إنت مش عارف أنا من غيرك كنت حاسة بإيه، أنا مطمئة بوجودك .  
- أوعدك إني هفضل موجود، وهفضل عايش بس عشان أسعدك، أوعدك اني عمري ما هاجي عليكى أبدًا مهما حصل، إني هبقى راجلك مش هبقى راجل عليكى، وإني هعيش بحبك لحد ما أموت .  
لم تتمالك ليلي نفسها لتفلت من عينها دمة قبل أن يمسحها مروان بيديه طابعًا قبلة حانية على خدها ..

- مالك يا حبيبتي ؟  
- أنا خايضة يا مروان، خايضة أحس إني ما أستاهلكش، والإحساس ده جوايا بقاله كتير، مش عارفة أعبرلك إني بحبك ودايمًا حاسة إنك بتحبني أوي بشكل أنا ما أستاهلش أتحب بيه .. أنا يمكن مش حلوة اوي زي مانت شايفني..  
- إنتي أحلى ست في الدنيا يا ليلي ..

- لا يا مروان، أنا مش أحلى ست في الدنيا، أنا مش حلوة .. أنا جوايا حاجات كتير أوي وحشة .. ويمكن ما أبقاش الست الحلوة إللي في عينك دي، جوايا كل حاجة وعكسها، بس أنا جوايا قلب بيحبك، جوايا خوف من إنك تشوفني بعينيا وتعرف قد ايه أنا كارهاني،

جوايا اتنين .. واحدة بتحاول تبعدك عنها عشان عارفة إنك تستاهل حد أحسن مني بكتير، والتانية متشعبطة فيك مش عايزاك تسيبها ثانية

- وأنا عمري ما هسيبك مهما حصل، حتى لو في بينا مشاكل هنعديها سوا ، بيتيآلي يا ليلي إنتي إللي محتاجة تشوفي نفسك بعيني عشان تعرفي أنا بحبك إزاي .. حتى الحاجات إللي إنتي بتشوفها وحشة فيكي دي أنا بحبها، أنا ممكن أخسر الدنيا كلها وساعتها مش هحس إني خسرت حاجة، بس هحس إني خسرت الدنيا كلها لو بعدتي عني يا ليلي .

- بجد ؟

- بجد يا حبيبي .. أنا مش عايزك تخافي طول منا عايش، وجودي جنبك ده من المسلمات كده، ولو حتى حصلت بينا أي حاجة، أنا هعافر عشان ألاقي طريقة نحلها بيها، مش عشان ألاقي طريقة أبعد عنك بيها .. أنا ماسك فيكي وبحبك أكثر ما أي حد في الدنيا ممكن يكون حب حد، أنا واحد بيدعي ربنا كل يوم إنه زي ما رزقني بيكي في الدنيا يرزقني بيكي في الآخرة،

تفتكري ده واحد يقدر في مرة يفكر بس إنه يبعد عنك ؟

- أنا بحبك أوي يا مروان ..

- وأنا بحبك يا روح قلب مروان .

إنهت الرقصة لتمسك بذراعه متجهين إلى السيارة ليعودا للمنزل، دخلا المنزل .. لتتجه ليلى إلى الحمام وأغلقت الباب عليها قبل أن تنظر في المرأة .. لأول مرة تشعر ليلى بالإطمئنان، تشعر أن قلبها ينبض بحب هذا الرجل، لأول مرة تشعر أنها أخيراً تقف على أرض ثابتة بعد أن كانت تدور بها لفترة طويلة، بين حبهما القديم لزياد، وشعورها بالذنب ناحية مروان .. لأول مرة، تستطيع ليلى الآن أن تجزم أنها تحب مروان، مروان فقط .. لأول مرة منذ سنين، قررت ليلى أنه حان الوقت لتتخطى حبهما لزياد .. نظرت ليلى في المرأة قبل أن تمد يدها خلف رقبتها لتخلع – ولأول مرة – الزمردة الحمراء، آخر شيء كان يربطها بزياد .. فهي ملك لزوجها وحده قلباً وروحاً ..

خرجت ليلى متجهة إلى حضن زوجها ، والذي تستطيع الآن أن تدعوه بكل راحة .. بيتها .

كانت عقارب الساعة تشير إلى الحادية عشرة مساءً حين سمع زياد صوت جرس الباب، لم يكن من عادته أن ينام مبكراً .. لكنه اعتذر عن مقابلة شريف مُفضلاً النوم بعد أن كان يشعر بالصداع ينهش في رأسه مانعاً إياه من النهوض، تكرر الرنين على الجرس كمطارق تضرب رأسه بإيقاع هاديء منتظم، ليخرج من غرفته لاعتناً الجرس والصداع وتلك المسكنات التي فشلت في إيقاف ألمه.

وجد زياد الشقة مظلمة تمامًا إلا من ضوء صغير يشع من الصالة على غير العادة، ففي هذا الوقت كان والده يتابع التلفاز يوميًا بصوت عالٍ يمكن للجيران بأول الشارع سماعه .

إتجه زياد لغرفة والده ليجدها فارغة، بحث زياد في جيبه عن هاتفه .. إلا أنه وجده مغلقًا في اللحظة التي تذكر فيها جرس الباب فذهب مسرعًا ليفتح، نظر بالعين السحرية ليجد امرأة تقف أمام المصعد إستعدادًا للنزول . فتح زياد الباب ليجدها أمامه، التفتت ليلي لتنظر له بدون أن تتحرك ..

- أنا إفتكرت مفيش حد وكنت همشي

سكت زياد للحظات بفعل الصدمة، فهو لم يعتد قدومها إلى بيته، شعر زياد بضرورة أن يتحدث بعد هذا الصمت الطويل، فخرجت كلماته متقطعة :

- اه .. لا .. أنا لوحدي .. كنت نايم.

- طيب معلش صحيتك، أنا أصلاً مكنش المفروض آجي ..

- لا أبدًا إفضلي .

ترددت ليلي للحظة قبل أن تدخل، فتح زياد النور لتجلس بالصالة، إكتست الحوائط بلون أخضر فاتح يكاد يقترب من الأبيض .. رصَّ أمامه الأثاث بخشب بني اللون .. مع قماش بيج بنفس لون الستائر، أمام الكنبة التي جلست عليها ليلي كانت المكتبة التي إمتلأت بالكتب مع بعض التحف الصغيرة .. و في المنتصف صورة جمعت زياد بوالده و والدته، كانا يجلسان بينما زياد يقف في المنتصف واضحًا ذراعيه على كتفهما .. مبتسمين بسعادة لم ترها ليلي على وجه زياد منذ فترة طويلة .

انتشلها زياد من شرودها سائلاً :

- تشربي ايه ؟
- ولا حاجة أنا همشي على طول
- يبقى قهوة .

قالها زياد وهو يلتفت بدون أن يترك لها الفرصة للرد، اتجه زياد إلى المكتبة فاتحاً باباً صغيراً بالأسفل ليفتح جهاز تشغيل الأغاني الذي بدأ يشدو في أرجاء البيت بانغام Frank Sinatra .

دخل زياد المطبخ، بينما جلست ليلي تستمع إلى الموسيقى وهي تتجول بعينها في المكان بشرود، اتجهت للمكتبة لإلقاء نظرة على الكتب، في الصف الأعلى كانت الكتب الدينية، تحتها كانت بعض الكتب ذات الموضوعات العامة...

أما بالصف الأخير فكانت الروايات، والتي رصت بترتيب الكتاب .. بين الروايات كان هناك كتاباً بغلاف جلدي لم يكن عليه أي معلومات، انتابها الفضول لتفتحه لتجد الكتاب مليئاً بعبارات كتبها زياد بخط يده مقتبساً إياها من الروايات والكتب ...

قرأت بعضها ، ثم بدأت تقلب في الصفحات لتجد صورتها، مرسومة بالرصاص بشكل يُشعرك وكان الصورة قد تنطق ..

نظرت لتجد بالصفحة المواجهة لها جملة كتبها زياد بخط زخرفي ..

" تُشهِينَ اللَّيْلَةَ الَّتِي يَمُوتُ فِيهَا الطُّغَاءُ وَتُنْتَصِرُ الثُّورَةُ " ..

ابتسمت ليلي حينما رأتها، وازدادت إبتسامتها حينما تذكرت كم أخبرها بأنها وطنه، بأنها ثورته الأولى .

كان دائماً يُشبهها بتشبيهات لم تسمعها من قبل، كانت تحب كلماته التي دائماً ما كانت تُشعرها بأنها مختلفة .. فهو لم يُلقي على أسماعها كلمات الغزل التي دائماً ما كانت تسمعها بالأفلام، كان مختلفاً عن البقية، ذلك العاشق الذي لطالما رأت نفسها جميلة في عينيه كجمال القمر، كاملة الأوصاف كالملائكة، كانت ترى نفسها دائماً .. ثورته .

قلبت ليلي بين الصفحات لتجد صوراً لهما لصقت على الورق، كان يتسم بنفس الإبتسامة الصادقة كتلك التي على الصورة المعلقة على الحائط، ابتسامة لم تُعد تراها في عينيه ..

قلبت ليلي الصفحات لتجد صفحة خالية إلا من تاريخ كانت تعرفه جيداً، يوم أن افترقا، مع عبارة صغيرة ..  
" لو كنتي إستنيتي شوية "

لم تجد ليلي شيئاً بعد تلك الصفحة، مسحت ليلي دمعة فرّت من عينها قبل أن تُغلق الكتاب واضعة إياه في مكانه، لتقف أمام الصورة ..  
حينما أتى زياد ..

- كان نفسي تقابلها  
- الله يرحمها، أنا كمان كان نفسي أقابلها  
- كانت جميلة أوي، مفيش ست في الدنيا زيبا .  
ساد الصمت للحظات قبل أن يجلسا على الكنبة، حين أشعل زياد سيجارته ..

- ايه أخبارك ؟  
- الحمد لله كويسة .. إنت عامل ايه ؟

- أهو زي مانتي شايفة .. ماشية الدنيا .
- إرتشفت ليلي قهوتها لتضم شفيتها عليها :
- حلوة أوي القهوة دي
- هو أنا بعمل حاجة وحشة ؟
- قالها زياد و هو يضحك ..
- ابتسمت ليلي لتكمل شرب قهوتها في صمت فرض نفسه عليهما، فهي لأول مرة تدخل بيته وللمفارقة فهي لم تدخله إلا حينما تزوجت، دارت الأفكار برأسها بسرعة منعتها من الإمساك بأي منها ،
- أرادت الرحيل، أرادت أن تخبره كم اشتاقت له، أرادت أن تعاتبه على عدم محاولته للرجوع لها، على عدم منعه لها من الرحيل من الأساس، أن ترتبي بعضنه لتختبي من الدنيا، أن تضربه، أن تخبره كم تحبه ..
- مالك يا ليلي ؟
- مفيش ..
- الكلام ده تقوليه لحد ما يعرفكيش، مش ليا أنا
- بجد مفيش
- يعني عايزة تقنعيني إنك جيتي هنا النهاردة وسرحانة عشان "مفيش"؟
- صمتت ليلي، فهي تعرف جيداً أنها لم تنجح أبداً في أن تداري مشاعرها أمامه، كانت دائماً تفرح أنها تبوح أمامه ككتاب مفتوح يقرأ ما فيه بدون أن تحتاج إلى الكلام، فليس كل ما نشعر به يمكن أن يُقال، ولكن يمكن دائماً ان يُحس ..
- أنا تايهة يا زياد، ما بقيتش عارفة حاجة.

- في مشكلة مع مروان ؟
- بالعكس، مروان كويس أوي معايا ومش محببّسني بأي مشكلة، دايماً بيحاول يبسطني .. مع إني باجي عليه كتير
- أمال في ايه ؟
- المشكلة فيّأ أنا يا زياد، أنا إلي ما بقيتش فاهمة حاجة .. عارف لما تبقى ماشي في طريق إنت اخترته عشان شوفته صح وفي نصه بدأت تحس إن ده مش طريقك ؟
- إنك غريب عن المكان ؟
- أنا حاسة إني ماشية في طريق مش طريقي ومش ده إلي أنا مرتاحة فيه ، والمشكلة إني لا مني عارفة أكمله للآخر ولا مني عارفة أرجع تاني ..
- عارف ..
- عارف يا زياد، أنا ما بحبش أتوه، ما بكرهش في حياتي قد إني أحس إني خيفة ، بس أنا مرعوبة .
- سكت زياد حينما أمسكت ليلى بسجائره لتشعل واحدة لها قبل أن تكمل:
- أنا خيفة أظلم مروان،
- بحبه ؟ ما أنكرش .. بس مش الحب إلي يخليني قادرة أكمل، ومش قليل لدرجة إني أبعد، وللأسف في كل الأحوال أنا بظلمه .
- إزاي ؟
- عشان أنا مش مرتاحة، وده بيخليه كل ما يحاول يقرب أنا بهرب .

- عارف، مروان نفسه نخلف وأنا إليّ دايماً بقول لأ، على قد مانا نفسي  
أحس إني أم على قد مانا مش عايزة حاجة تربطني بيه بالشكل ده ..
- أنا شهادتي في الموضوع مجروحة، فمش عارف أقولك ايه
  - ما تقولش، أنا مش عايزاك تقول حاجة .. أنا بس محتاجة أحس إن حد فاهمني، مش عايزة أحس إني لوحدي تاني يا زياد .
- لما بعدنا أنا كنت زي العيلة الصغيرة إليّ مش لاقية أهلها في مكان غريب، كنت خايفة من كل حاجة .. أنا مش عايزة أخاف تاني .
- لم تستطع سدود جفونها من الوقوف أمام ذلك التيار من الدموع، مسح زياد دموعها بيده قبل أن يرفع رأسها لينظر في عينها مباشرة :
- أنا هنا يا ليلي، حتى لو مش مكتوبلنا نكون سوا أنا دايماً جنبك .
- ابتسم لها مطمئناً بإبتسامة أب لإبنته الصغيرة التي ابتسمت إبتسامة صغيرة مع دموعها التي تسيل على خدها، وقف زياد ممسكاً بيدها :
- تسمحي لي بالرقصة دي ؟
- نظرت له بشرود قبل أن تبتسم وهي تقف لتمسك بيده .. بينما يده الأخرى كانت تلتف حول خصرها حين بدأت أغنية Killing Me Softly .
- كانا يرقصان بهدوء على أنغام الأغنية .. حينما خبّأت ليلي رأسها بحضنه، بينما هو فقد أفلت يدها ليضعها على رأسها مُحركاً أصابعه بين خصلات شعرها ..
- ما تخافيش، أنا عمري ما هسيبك لوحديك مهما حصل.
  - أنا بحبك يا زياد.

رفعت ليلي رأسها لتنظر لعينيه، إحتضنها زياد بقوة وهو ينظر لعينها حين قرر الاستسلام، لطالما صمد كثيراً أمام عينها مانعاً نفسه من اخبارها كم يحبها، كم يعشق تفاصيلها الصغيرة التي لم يجرؤ على نسيانها أبداً .. كانت تلك هي اللحظة المناسبة لتعلن جيوشه عن استسلامها، ليرفع رايته البيضاء وينحني أمام مشاعره التي لم ينجح الوقت أو بنات حواء مجتمعين في محوها أو حتى إخفائها ..

أمسك زياد برأسها بكلتا يديه، لمس شفيتها بشفتيه قبل أن تتوقف الأرض عن الدوران، خفتت الموسيقى والأضواء خشوعاً لتلك اللحظة، لثمها كما لو أنّ حياته متوقفة على شفيتها، قبّلها كعاشق لم يملأ قلبه سواها، بادلته ليلي التقبيل بشغفٍ واضح ودمعة تسيل على خدها حين حملها زياد بين ذراعيه بشفاهٍ لم تنقطع ليضعها على الكنبه، كانت قبلة تبادلا فيما كل ما حاولا أن يدارياه حتى عن أنفسهما طوال تلك الفترة.

مع كل لمسة تشعر ليلي بالراحة .. بينما زياد يشعر أنه على قيد الحياة، قبّلها زياد بقوة، ضمّها وكأنه يريد إدخالها بداخل قلبه وحبسها إلى الأبد .. شعر بالصداع بداخل رأسه يزداد يكاد أن يفتك به حين فتح عينيه، رآها غير واضحة أمامه بسبب الألم، ولكنها بدأت تتلاشى أمامه، بدأت صورتها تختفي بالتدرج وكانها تتحول شبحاً، أغلق زياد عيناه وفتحها مرة أخرى مردّداً: " ماتمشيش يا ليلي ... "

ليجد نفسه في غرفته المظلمة، نائماً منكمشاً على نفسه كجنين في بطن أمه، لم يجد ليلي بجانبه، لم يسمع Frank Sinatra ، لم يتبقّ له من الحلم سوى إحساسه بالألم، الخوف، وذلك الصداع اللعين .

(٨)

- دكتور زياد، إتفضل دكتور مصطفى مستني حضرتك .
- قام زياد متجهًا إلى الغرفة الخاصة بالكشف، فتح الباب ليدخل إلى غرفة هادئة إلى حد كبير بأضواء خافتة، واسعة لم يكن فيها إلا مكتب يجلس خلفه الدكتور مبتسمًا .. وأمامه كرسيان فقط .
- إتجه زياد ماديًا يده لمصافحة الدكتور الذي قام من كرسيه لتحية زياد قبل أن يجلسا ..
- قلب دكتور مصطفى بالأوراق أمامه للحظات قبل أن يُرْتَبِّها أمامه ممسكًا قلمه قبل أن يبدأ :
- إزيك يا دكتور زياد، أعذرني أنا قديم شوية وما بحبش أستعمل الكمبيوتر كثير، بفضل الورقة والقلم أكثر .. أتمنى ده ما يضايقكش .
- لا خالص، بالعكس أنا برضه زي حضرتك كده .
- بلاش حضرتك دي .. خرينا ناخذ راحتنا في الكلام، تسمحي أقولك زياد من غير دكتور ؟
- أكيد ..
- أنا باين قدامي هنا إنك زميل يعني، ف ده هيووفر علينا كثير، فقولي إنت تحب نبدأ منين ؟
- بصراحة مش عارف، يعني وأنا في الطريق جاي هنا كنت براجع نفسي وكذا مرة أقول هلف وأرجع تاني .

- ليه كده ؟
- عشان أنا ما بحبش أحس إني تعب،
- مش قصة إني رايح لدكتور نفسي أو غيره، بس أنا في العادي ما بحبش
- أحس إني تعب أصلاً ..
- بس أعتقد ده مش ضعف، من الشجاعة إنك تواجه نفسك بتعبك،
- ومن القوة إنك تاخذ قرار إنك تواجه مشاكلك وتحاول تحلها .
- يمكن ..
- قولي يا زياد . إنت علاقتك بأهلك أخبارها ايه ؟
- الحمد لله كويسة
- والدتك أقرب ليك ولا والدك ؟
- والدتي متوفية بقالها ٧ سنين .
- الله يرحمها ..
- ساد الصمت للحظات، بينما كان مصطفى يدوّن ملاحظاته، ثم أكمل :
- كانت علاقتك بيها كويسة ؟
- أيوة .
- أقدر أسألك إتوقّيت إزاي ؟
- فجأة، لا كانت مريضة ولا كانت بتشتكي من حاجة .. يمكن في آخر
- فترة كانت بتحس بضعف، بس كان ضعف بسبب السن عادي .
- ووالدك ؟ تقدر توصفلي علاقتك بيه ؟
- أبويا أنا بعتبره صاحبي يمكن أكثر ما بعتبره أب .
- طيب لما كنت بتحب تحكي كنت بتروح لمين فيهم ؟

- ولا حد ..
- مش بيّفهموك كفاية ؟
- مش بعرف أحكي، أنا أقدر أحكيك الموقف كويس جدًا بكل تفاصيله، بس دايمًا بتفضل حاجة جويا مش قادر أوصفها أو أعبر عنها بالكلام ..
- طيب وصحابك ؟
- نفس الكلام .
- طيب لما كنت بتحب تطلع إليّ جواك كنت بتعمل إيه ؟
- بكتب ..
- حلوه ده .. بتكتب إيه بقي ؟
- شعر، نثر ... وحاولت أكتب كذا قصة قصيرين كده .
- وحاولت تنشر الكتابات دي أو توربها لحد ؟
- لأ، بحفظ بيهم لنفسي، ما بحبش حد يشوفهم
- طيب ليه مش حابب الناس تشوفهم ؟ مش يمكن تبقى بداية ليك ككاتب ؟
- بصراحة مش مهتم، وما بحبش حد يدخل جوا تفاصيل حياتي، بحب دايمًا أسيب مسافة بيني وبين إليّ قدامي، أفضلّ إني أخلي الناس تشوف الجزء إليّ أنا أسمحهم بيه بس .
- إنت ما بتحبش الناس ؟
- مش عارف ، بس يمكن برتاح أكثر وأنا لوحدي ..

- طيب خليني أسألك السؤال بشكل تاني .. هل شايف إن الناس مش أهل للثقة ؟
- جدًا ..
- ليه ؟
- عشان الثقة بتجيب قرب، والقرب بييجيب إحتياج، والاحتياج بييجيب خوف .. وأنا ما بكرهش في حياتي قد إني أحس إني خايف .
- إنت عمرك حسيت إنك محتاج حد ؟
- سكت زياد وعقد ذراعيه، قبل أن يجيب .. :
- لأ .
- جسمك أخذ وضع دفاع قبل ما تجاوب، تحب تفكر تاني في الإجابة ؟
- مش حابب أتكلم في الموضوع ده ..
- بس أنا حابب إني أسمعك .
- سكت زياد مجددًا موجِّهًا نظره إلى الأرض، إنتظر مصطفى قليلاً، ثم قال:
- طيب نبقي نرجع للسؤال ده بعدين، بس عايزك تفكر في إجابته قبل ما نرجعله كويس وحاول لما تفكر في الإجابة تصارح نفسك قبل ما تصارحني، ماشي ؟
- تمام .
- قولتلي بقى إنك بتكتب، شايف نفسك في الشعر أحسن ولا في القصص ؟
- مش عارف أنهي أحسن بصراحة بس يمكن بحب الشعر أكثر

- إشمعني ؟
- أقصر، أسهل، وبيوصل للي بيسمعهه أسرع
- طب عايزك تفكر كده دقيقة وتقولِّي إيه أكثر بيت أو مقطع كتبته  
ويتحبه .
- لم يتطلب الأمر من زياد أكثر من ثواني ليبرد :
- " إني هكون على باب الجنة .. مستنيكي  
أصل الجنة بكل نعيمها ..
- مش ممكن تعمر غير بيكي "
- حلو أوي ده، تسمحلي أدونه عندي ؟
- أكيد ..
- أنا برضه بحب الشعر على فكرة، بس للأسف ما عنديش الموهبة إني  
اكتب عشان كده بحب أسمعاه جدًّا وأحتفظ بالأبيات إللي بتعجبني .
- أنا كمان، بس يمكن بحتفظ بالجمل إللي بتعجبني من أي مكان مش  
بس شعر، يعني أفلام، أغاني، روايات ..
- هو البيت ده من قصيدة أسمها ايه ؟
- " لو كنتي إستنيتي شوية "
- وتفتكر ما إستنيتيش ليه ؟
- سكت زياد، ولكن لم يمهله مصطفى فرصة التفكير لبياغته بالسؤال ..
- نرجع لسؤالنا إللي فات، أنا ما نسيتهوش خد بالك .. وبيتهياي إجابته  
بانته من عنوان قصيدتك، بس أقدر أعرف اسمها ؟
- ليلي ..

- حبيت قبلها ؟

شبك زياد أصابعه، أخذ نفسًا عميقًا وزفره كأنه يخرج معه ما في قلبه من ألم .. وروح، نظر لمصطفى صامتًا بلا رد، الذي يادر بالكلام :

- أوقات ما بنقاش قادرين نتكلم في مشاكلنا أو مش حابين ندخل للجزء ده جوانا، كل ما نفتحه بنحس إنه بييجيب وجع، يمكن وجع الفراق، يمكن وجع الظنون والأسئلة اللي ما بتخلصش .. بس أنا متأكد إنك كتير بتدخل المكان ده جواك وعلى قد ما بتحس فيه بوجع وشك على قد ما بتحس جواه إنك في مكانك ..

أنا عايزك تحاول، أنا عارف إن الكلام صعب، بس صدقني كل حرف هيطلع منك أنا هكون مصدقه وفاهمه كويس .

- عرفت قبلها بنات كتير، كنت معجب بيهم ؟ جايز .. بس عمري ما كنت الطرف إلي بيحب أكثر في العلاقة، دايمًا كنت الطرف إلي بيتحب أكثر - وبعدين ؟

- وبعدين جت هي، جت وخلتني أكسر كل الحاجات إلي عشت ببنها جوايا يمكن من غير ما أحس، خلتني لأول مرة أحس إنني فعلاً قادر أكون بحب واحدة بدون سبب، خلتني أحس إنني .. إنني عايش .

- إشمعني هي ؟ كانت حلوة ؟

- كانت في عيني أحلى من كل البنات، يمكن إلي بيشفوها بيقولولي في أحلى، في أحسن، بس دايمًا كنت بشوفها ..

- كاملة ؟

- جدًا ..

- الموضوع بدأ إزاي ؟
- صدفة .. أنا مقتنع إن كل حاجة حلوة بتبدأ صدفة، إحنا بنعيش طول حياتنا ندور ع إلي عايزينه وبنحبه، وبنحاول نخلي كل الظروف توصلنا ليه .. بس دايمًا الحاجة دي بتجيلك من السكة إلي عمرك ما فكرت تدور فيها، إحنا عمرنا ما بنلاقي إلي بنحبه بس هو دايمًا .. دايمًا بيلاقينا .
- طيب لو قولتلك إفتكر أول مرة قعدت معاها، تقدر تقولي ايه أول وصف لها ممكن بيعي في دماغك ؟
- مختلفة ..
- إزاي ؟
- مختلفة عشان قدرت تدخل جوايا بدون مجهود ويمكن من غير ما تحاول، عارف لما تحس إن الدنيا كلها وقفت، إن كل الأنوار إلي في الدنيا طفت وفضل نور فوقها هي بس ؟ كإن الدنيا بتقولك هي دي، إنت أخيرًا وصلت لي إنت عايزه ..
- غيِّرتك ؟
- عيَّشتني ..
- عارف يا زياد، بيقولوا الوقت بيغير حاجات كتير جَوَّانا، يمكن حاجة عمرك ما حبيتها بالوقت تتعود عليها، ويمكن حاجة عمرك ما تخيلت إنك تعيش من غيرها بقيت تشوفها عادي .. تفتكر الوقت خلاك تحبها أكثر ؟
- الوقت خلاني أتأكد إنني مقدرش أعيش من غيرها ..
- كنت بتفتحها قلبك ولا برضه بتطلع إلي جواك في الكتابة ؟

- أنا عمري ما فتحلتها قلبي، هي دايماً كانت بتقدر تدخله من غير إستئذان، كانت بتفهمني من غير ما أتكلم، كانت حتى " معلش " منها أحسن عندي ألف مرة من وقفة أي حد جنبي .

والكتابة أنا عمري ما لجأتها غير لما هي مشيت، أنا قبلها كنت دايماً بكتبم جوايا وبسكت، بس لما مشيت بقيت تايه .. لا أنا قادر أكتبم تاني جوايا، ولا قادر أحكي لغيرها ..

- كنت بترتاحلها ؟

- كانت .. بيت .

- تفتكر إنت كنت بالنسباليها كده ؟

- مش عارف

- طيب نرجع للقصيدة، تفتكر هي ليه ما إستنتش شوية ؟

- ده إللي لحد النهاردة مش قادر أفهمه .

إحنا في آخر فترة المشاكل بينا كترت، ما كناش قادرين نفهم بعض زي الأول، بس كنت دايماً بقول فترة وهتعدي وهنرجع زي زمان ..، بس لما سبنا بعض ما رجعناش زي زمان، أو تقدر تقول ما رجعناش أصلاً ..

- وتفتكر المشاكل دي كانت بسببها ولا بسببك ؟ يعني هل القصيدة دي

كانت إعتذار على غلط منك ولا عايزها ما تمشيش حتى لو هي غلطانة ؟

- الاتنين .. عارف، إحنا اول ما سبنا بعض كنت بقول إن الغلط

عندها، هي إللي مشيت وما إستحملتنيش .. مع إني ياما إستحملتها .

هديت، ولما فوقت من الغضب إللي جوايا لقيت نفسي بقول منا كمان

كنت بغلط وهي إستحملت كثير، بقيت بقول أكيد هي ليها حق تمشي، تهرب ..

## دكتور ستوكهولم

وما بين كمية اللوم إليّ جوايا لهما وكمية الندم إليّ جوايا على غلطاتي،  
لقيتني بقول لو كنتي إستيتي شوية، كنت يمكن أتغير، كان يمكن مشاكلنا  
هتتحل، كان يمكن نلاقي سبب يخلينا نرجع زي زمان .

- يعني لو إفترضنا يا زياد إنها هي إليّ غلطانة مش إنت، هتوافق ترجع؟
- من غير ما أتردد لحظة ..
- طب وليه ما حاولتس تكلمها ؟
- لأنه مبقاش ينفع .. هي خلاص عاشت حياتها وكملت من غيري،  
وبيتهياي أنا بس إليّ لسه واقف في مكاني .
- مين عارف مش يمكن هي كمان مست.....
- هي إتجوزت يا دكتور .
- نظر الدكتور إلى عيني زياد قليلاً، قبل أن يسأله :
- أنا شايف في إيدك دبرة ..
- اه مانا خاطب، وفرحي كمان شهر .
- مبروك .. اسمها ايه العروسة ؟
- نور
- طيب وايه عجبك في نور بقى ؟
- نور طيبة وجميلة بنت حلال ، و بتحبني ..
- وإنّ ؟ بتحبها ؟
- مش عارف .. اه
- أنا ما بحبش النوعية دي من الأسئلة، بس ممكن تقارن لي بينهم ؟

- بص .. نور بنت من إيلي بيقولوا عليهم ما فيهاش غلطة، مشكلتها الوحيدة إنها ..
- مش ليلى ..
- بالظبط .
- كان رد فعلك ايه لما عرفت إنها إتجوزت ؟
- حضرت فرحها .. !
- قالها زياد و هو يضحك ..
- تقدر توصفلي حسيت بإيه ساعتها ؟
- مش عارف، بس ده كان أصعب إحساس عدّى عليا في حياتي ..
- طب لو كنت تقدر تقولها حاجة يومها كنت هتقولها ايه ؟ هتعاتبها ؟
- هقولها إنها زي القمر ..
- سكت مصطفى وهو يدوّن بعض الملاحظات في الورقة، قبل أن يقوم من مكتبه مُتّجهاً ناحية زياد ..
- إنت بتحب المزيكَا ؟
- جدًّا
- طيب تقدر تقولي ايه الأغنية إيلي بتفكرك بيها ؟
- The Way You Look Tonight
- إنت بتحب الكلاسيكيات زي يعني ؟
- و مين ما يحماش ؟!

## دكتور ستوكهولم

- طيب أنا عايزك تغمض عينك، حاول تفضّي دماغك خالص من أي أفكار تيجي فيها، تخيل نفسك في أكثر مكان بتحبه أيّا كان، بس خلي المكان يكون فاضي ما فيهوش غيرك، وخليك كده لحد ما أقولك .. ماشي ؟  
- حاضر .

أغلق زياد عينيه بعد أن نزل في كرسيه قليلاً مُتَّخِذًا وضِعًا أكثر راحة، فيما ذهب مصطفى إلى جهاز تشغيل الاسطوانات بحثًا عن الأغنية التي أخبره عنها زياد، مرت دقيقة من الصمت قبل أن تبدأ الأغنية حين ذهب مصطفى إلى زياد ..

- دلوقتي تقدر تفتح عينك .

فتح زياد عينيه لينظر لمصطفى الذي طلب منه الوقوف فيه، قام زياد ليكمل مصطفى :

- عايزك تقف باصص للكرسي، غمض عينك لحظات وحاول تشوفها على الكرسي ده ..، لما تفتح عينك وتشوفها عايزك تكلمها، إعتبر إنها إدتلك الفرصة إنها تسمعك، إقنع عقلك إن المرة دي مفيش أي حاجز يمنعك من الكلام معاها ولا يمنعك تخرج حرف واحد بس من إللي جواك .. تقدر تبدأ من دلوقتي .

أغمض زياد عينيه متخيلاً ليلي، تجلس على الكرسي بفرسان أسود مكشوف الكتفين .. وشعرها المموج خلفها .. مع زمردته الحمراء التي تزين عنقها .. بأحمر شفاه بنفس لون الزمردة ..

كانت كما حفظ صورتها في عينيه، ملاك أخطأ طريقه ووصل إلى الأرض ليخطف قلبه، ابتسامتها التي لطالما حفظ ثناياها، شفاهها التي لم ينهل من

رحيقها يومًا، ولن يفعل .. كانت أمامه، تزداد إبتسامته تدعوه للحديث، للبوح بما في قلبه، لإخبارها بكل ما كتّمه في قلبه يومًا، وبكل ما دفه في ورق أصم لم يصل إلى عنوانها أبدًا ..

- أنا .. إنتي .. إنتي مشيتي ليه يا ليلي ؟ إحنا كنا نقدر، إللي جوانا كان أكبر من أي مشكلة .. أنا عارف إني ياما غلطت بس .. بس أنا ما غلطت يا ليلي، إنتي إللي ما إستحملتيني .. إنتي وعدتيني يا ليلي، وعدتيني إنك هتفضلي ..

بدأت دموع زياد في حفر طريقها على وجنتيه، صوته المرتعش وكأن قلبه ينتفض من الداخل، يصارع ألم طعنات لم يذق مثيلاً لها يومًا ..

- أنا إتغيرت ؟ بس إنتي كمان إتغيرتي .. إنتي إللي كنتي دايماً عايزة تمشي، ليه تخليني أحس إني ماسك فيكي وإنتي موجودة غصب عنك ؟ ليه تحسسيني إنك مجبرة على وجودك جنبي ؟

أنا .. إنتي سبتيني يا ليلي، والمشكلة إنك سبتيني في نص الطريق، مش فاهم العيب كان منك ولا مني، سبتيني لظنون بتوديني وتجيبي، بتنهش في دماغي وتضربني ألف مرة بسكينة تلمة تجرح ما تموّتش ..

عارفة، كان نفسي أبقى زيك، كان نفسي قلبي يبقى جامد على فراقك، يبقى قادر يشوف إن عدم وجودك " عادي " ، بس إنتي عمرك ما كنتي عادي يا ليلي .. عمرك ما كنتي عادي ..

أنا ما بموتش من غيرك يا ليلي، أنا مت من يوم ما سبتيني، محسوب على الناس عايش بشوية نفس داخل وخارج .. أنا شايف آخرتي فين، عارف طريقي

كويس، عارف إني عمري ما هعرف أحب غيرك مهما شوفت وقابلت، وحتى لو  
إتجوزت هيفضل قلبي ليكي إنتي لوحداك ..

عارفة، أنا كنت فاكِر نفسي هقدر أنساكي، أكرهك وألعن اسمك بعدد  
كل ثانية عشتمها في وجع بسببك ..

بس أنا مسامحك، أنا .. بحبك .

قالها زياد وسكت بعد أن استسلم لدموعه، دموع رجل عشق بحق،  
حاول زياد للملّة شتات نفسه ليتماسك ولكن خانتة عيناه، بدأت صورتها  
تتلاشى أمامه وعليها نفس الإبتسامة لم تتغير ..

- ممكن كفاية ؟

قالها زياد بصوت مرتعش كرعشة يديه التي لم تتوقف

- إتفضل أقعد يا زياد

استند زياد على الكرسي الذي كانت تجلس عليه ليلي منذ لحظات، جلس  
ناظرًا للأرض بعيون تحجّرت بفعل الدموع المحبوسة بداخلها وأنفاس  
متقطعة كأنفاس شخص يغرق في محيط لا قاع له ..

- شوف يا زياد، إنت طبعا فاهم إن دي حالة إكتئاب، إكتئابك جاي  
من إنك لسه متمسك بحاجة إنت عارف إنها بتوجعك، عقلك مصوّرك إن  
هو ده مكانك، مع إنه مش مكانك ولا كان من الأول ..

لم يعقب زياد حين أكمل مصطفى :

- أنا مش هقولك الإنسى وحب غيرها، هو مش زرار هتدوس عليه  
هتدسى وتعيش طبيعي، الموضوع كله قرار .. إنت لازم من جواك تقرّر إنك عايز

تبقى أحسن، إنك عايز تلاقي المكان إللي فعلاً يساعك وتحس فيه إنك مرتاح من غير وجع، من غير أسئلة تعذّبك بدون سبب ولا إجابات .  
ردّد زياد :

- الموضوع كله قرار ..

- أنا هكتبلك أدوية تمشي عليها بانتظام، وهستنى أشوفك تاني بعد أسبوع، في الإسبوع ده أنا عايزك تمشي على تمرينات النّفس إللي مشينا عليها. وعايزك أي فكرة تيجي في دماغك عنها أو عن أي حاجة تكتبها في كراسة صغيرة، وتجيها لي معاك المرة الجاية، وعايزك تفكر إزاي ممكن تبدأ واحدة واحدة تسيب الموضوع ده وتتخلى عنه، أوقات إنك تسيب أحسن بكثير من إنك تفضل ماسك ..

- " أوقات إنك تسيب أحسن بكثير من إنك تفضل ماسك "

- إحنا خلصنا النهاردة، حابب تقول حاجة ؟

- شكراً، شكراً إنك سمعت وما حكمتش، إنك ما قولتيليش إني خاين أو قدر، أنا عارف إني كده .. بس أنا تعبت من كتر ما بسمع ده من ناس غيبي، خصوصاً وإني كل ما ببص في المرآة ما بقدرش أشوف نفسي غير كده ..

قالها زياد وقام متجهاً للباب بدون أن ينتظر الرد من مصطفى، والذي ظل على مكتبه محققاً بالورقة أمامه ..

" أصل الجنة بكل نعيمها ..

مش ممكن تعمر غير بيكي "

(٩)

- يلا يا عريس بسرعة عشان ما نتأخرش .  
- حاضر يا بابا  
وقف زياد في غرفته ينظر للمرأة، يضبط وضع ربطة عنقه السوداء التي اختارتها له ليلي يومًا ما ..  
ينظر لنفسه في يومه المنشود، يوم أن ينتقل من حياة العزوبية لينتقل إلى بيت جديد وزوجة تعشقه، بيت سيبنى فيه أسرة تمتئى يومًا أن يشاركه فيها امرأة أخرى، امرأة عجيبة الملامح أسرت قلبه بسحرهم القديم ..  
وقف متأملًا ملامحه في مرآة لم تعرف يومًا الكذب، لم يكن من خصائصها أن تُظهر له ما ينبغي أن يكون، فقط تريه ما هو كائنٌ واقعٌ بحق ..  
بملامح باهتة وابتسامة حاول جاهدًا أن يتدرب ليجعلها حقيقية ولم ينجح في إخفاء إصفرارها أو كذبها ..  
فتح درج أخفى فيه الكثير من الأشياء التي لم يُرد أخذها لبيته الجديد، فهي تنتهي إلى هنا، إلى حيث سيعود يومًا ما ساهرًا يبكي بجانبها على حلم لم يتحقق، حياة لم يكن له الاختيار في أن يعيشها، آمال قتلها الزمن أمامه وهو مُكبَّل اليدين ... لم يقدر يومًا على إنقاذها من الموت ..  
أخرج زجاجة عطر ابتاعتها له .. لم يتبقَّ بها سوى بضع قطرات حافظ عليها ليضعها يوم زفافه من ليلي، ليخبرها أنه احتفظ بها طوال تلك المدة حتى

يضعها في يوم زفافهما، واليوم يضعها، على الأقل ليشعر أنها ترافقه في هذا اليوم؛ ليشعر بوجودها ..

خرج زياد إلى أبيه واحتضنه حزن طال عن المعتاد .. حزن فاق في حجمه الدنيا، وطالت مشاعره عنان السماء، حزن أب يودّع ابنه إلى حياة جديدة سيعيشها بعيداً عنه ... ليترك البيت فارغاً من سواه، وابن يتمنى لو أن يكمل بقية عمره بجوار هذا الرجل الذي لطالما رآه أباً وسنداً وصديقاً وأماناً ..  
نزلاً سويّاً إلى السيارة متجهين إلى الفرح، وضع أبيه إسطوانة الأغاني التي جهّزها خصيصاً لفرح ابنه في السيارة، ليغني و يرقص معها وسط ضحكات ابنه ..

- اوعي يا واد تتجوز وتهميِّص وتنسى أبوك
- يا حاج دانت الخير والبركة، أنساك إزاي بس !؟
- كلنا بنقول كده يا حبيبي ... وهوب نتجوز ونلاقي عروسة حلوة في البيت، ننسى أبونا و إللي خلفوه
- ده والله أسيب العروسة وأجي أبات عندك كل يوم .
- انت عبيط يابني ؟ عايز الناس تاكل وشّنا وتقول الواد خايب وبهرب يبات عند أبوه؟ داري خيبتك بعيد عني، أنا مالي
- ضحكا سويّاً قبل أن يهديء أبوه من صوت الكاسيت ..
- بص يابني ، أنا عارف أنا ربيتك إزاي .. أنا طول عمري مرّيتك تبقى راجل، والراجل إللي بجد ياخذ باله من أهل بيته، يبقى سندهم وراجلهم وبيتهم قبل البيت إللي ساكنين فيه ..
- مش محتاج توصيني يا أبو زياد، ابنك طالعلك.

## دكتور ستوكهولم

- ابني أحسن راجل في الدنيا، بس أنا هقولك كلمتين إوعى تشيلهم من راسك .

الست يابني لما تحب الراجل ما بتيقاش عايزة منه غير قلب يسمعها قبل ودنه، حضن يساعها لما الدنيا تضيق بيها، كتف تسند عليه وقت ما تحس بضعفها، إيد تطبطب ما تخوفش، وضحكة تنور البيت لما تشوفها ..  
أنا عارف إنك راجل وهتعامل ده وأكثر وهتبقى أحسن مني، بس .....

- مفيش حد في الدنيا هيبقى أحسن منك يا حاج، إنت سيد الرجالة كلهم.

- ما ينفعش، لو إنت ما طلعتش أحسن مني أبقى فشلت في مهمتي .  
أنا عايزك تطلع أحسن مني ومن كل الناس، وإنت لازم تعوز ولادك أحسن منك ومن أي حد .. صون مراتك يابني وشيلها في عينيك، الحاجات الصغيرة إللي بتطلبها هتديك قصادها الدنيا، الكلمتين الحلوين إللي هتقولهمولها هتديك قصادهم عينها، شيلها وقت ما تقدر هتشيلك وقت ما تعجز، الجواز يابني عامل زي الحصالة، على قد ما هتحوش فيه .. على قد ما لما تحتاج هتلاقي جواه ..

يا شيلت جواه ذهب شالك، يا شيلت جواه ورق أبيض غرقك وسابك لوحدك .

- حاضر يا بابا ..  
- يمكن يابني ربنا ما يدينيش العمر أعيش مع ولادك قدّ ما عيشت معاك ..

- بعد الشر عليك يا حاج

- يابني كلنا هنموت، عايزك تربيهم كويس، مش هقولك زي ما ربّيتك ...  
أنا أكيد غلطت معاك في حاجات كثير، والتربية في زمنك غير زمانهم .. بس  
هقولك حبيهم، إحترمهم مهما كانوا صغيرين، حسبّهم بحبّك لهم في كل فرصة  
قدامك، ولو ما لقيتَش إخلق إنت فرصة، ومهما كان بينك وبين أمهم مشاكل  
.. دايمًا قدامهم أمهم دي أحسن ست في الدنيا وما فيهاش عيبة .

أمسك زياد بيد أبيه يُقبّلها، قبل أن يُعقّب :

- ربنا يدك طولة العمر وتربيهم إنت يا عم الناس

- إتنيل .. أربي مين؟! أنا لو عرفت أربي أبوهم أساسًا مكانش قال لأبوه

يا عم الناس دي

ضحكا ورفع أبوه صوت الموسيقى ليرقصا سويًا قبل أن يصلا إلى الفيلا  
التي سيقام فيها حفل زفافهما، اختارت نور ذلك المكان ... فهي لم تحب  
القاعات المُغلقة أبدًا ..

كانت الفيلا بيضاء، تبدو للوهلة الأولى كأحد القصور التي شُيِّدت في  
عصر ملوك الأسرة العلوية، أمامها حمام سباحة تحسبه بحرًا من إتساعه ...  
تحيط به أرض خضراء تسع المدعوين وأكثر من عشرة أضعافهم .

اختارت نور الزهور البيضاء والوردية لتزيين الطاولات والأرضية، كانت  
الطاولات فارغة حيث رصت الكراسي أمام المكان الذي سيُقام فيه كتب  
الكتاب لصفين بينهما ممشى مصفوف بنفس الزهور التي وُضعت على  
الطاولات .

دخل أبيه بدلته الرمادية الداكنة إلى الفيلا ليطمئن على تجهيزات الطعام، بينما تجوّل زياد في المكان يتأمله وسط تهنئة بعض المدعوين الذين وصلوا مبكرًا ..

قابل زياد شريف الذي ناداه لجلسة التصوير بين العريس وصديقه في إنتظار العروسة وأصدقائها الذين – وهذا هو المتعارف عليه تقريبًا – لن يصلوا في ميعادهم أبدًا، وكأنّه عُرِفَ قديم أن تصل العروس متأخرة عن ميعادها ..

- أنا مش مصدق إن زياد هيتجوز أخيرًا

- صدقني يا بني ولا أنا

- بص يا بني أنا صاحبك وبقولك أهو .. ربنا يكون في عونك

- أنا مش فاهم دوتنا عن الناس كلها ما لقيتش غيرك إنت ببقى جنبي

يوم الفرح ..!

- إحنا محدش يفرقنا عن بعض أبدًا .. يا عووومري

قالها شريف وهو يحتضنه محاولاً تقبيله وسط مقاومة زياد الذي ظل يدفعه داعيًا أن تكتشف مروة حقيقة ميوله .

في الساعة الخامسة إتصل زياد بنور التي أخبرته أنها خمس دقائق

وستصل، وبالطبع فلم تصل قبل الخامسة والنصف ...

وقف زياد أمام المنضدة التي من المفترض أن يجلس خلفها المأذون ويقف

شريف خلفها بعيدًا عن صديقات العروسة، بعد أن رمقته مروة بنظرة يكاد

يجزم بشعوره ببعض الحروق بعدها ..

بدأت الموسيقى في الظهور حين دخلت نور مع أبيها، وقف كل المدعويين خشوعاً لتلك الفاتنة التي إقتربت بجمالها من " أفروديت " إلهة الجمال عند الإغريق .

كانت بفستانها الأبيض ذو الذيل الطويل، منقوشاً بورود صغيرة وحملاًلات رقيقة على كتفين يضاهاي بياضهم بياض فستانها، بينما ذلك التاج على رأسها يجعلها إحدى ملكات قصر باكنجهام ..

أمسكت بورود وردية يتوسطها دائرة صغيرة من الورود البيضاء، مُغلّفة بورق أبيض ورباطة وردية .

مشت نور متجهة إليه بخطوات رقيقة وإبتسامة جعلتها تضاهاي الملائكة جمالاً، بجوار أب حاول جاهداً أن يحبس دموعه .. فازدادت وجنتاه إحمراً .. مع كل خطوة تخطوها ينبض قلب زياد نبضة يكاد يشعر بها من خلال ضلوعه، ها هو سيصبح عريساً ، سيعود مع هذا الملاك إلى بيت يجمعهما إلى الأبد .

وقفت نور مع أبيها أمام زياد لتحتضنه وتُقَبِّله ليحاول إخفائها بداخله حتى لا تذهب إلى غيره، سلم على زياد مُسَلِّماً إياه يد عروسته التي قبَّل رأسها لتزداد ابتسامتها؛ أذنةً للشمس بان تبدأ في الرحيل، فها هي تلك الحسناء بتلك الإبتسامة تستطيع بدون أدنى شك أن تضيء الأرض مشرقاً ومغرباً بإبتسامتها.

نظر زياد إلى ساعته ليجد أنّ المأذون تأخَّر، أجلس عروسته على كرسيها على المنضدة مُتَّجِّهاً بعيداً عن الموسيقى ليتحدث مع المأذون، توجه زياد بعيداً

## دكتور ستوكهولم

ليبدأ بكتابة رقم المأذون على هاتفه قبل أن ينظر خلفه، رآها وسط أصدقائها مبتسمة.

كان يتساءل يوميًا لماذا أصرَّ على الإستمرار في تلك العلاقة ..  
أحبها، ولكنه يعلم علم اليقين أنه لم يُخلق لها، قلبه المشوّه المفتون  
بحب غيرها لن يرضى عن وجوده بجوارها وهو يراها امرأة غيرها كل يوم، لن  
يقبل بقلب ينبض بحب غيرها، محفور عليه صورتها واسمها، سيتزوجها،  
ستسكن قلبه، ولكنها ستظل مستأجرة له، لن تصبح مالكة له أبدًا .  
ظل ينظر إلى هاتفه طويلاً دون أن يتصل بالمأذون قبل أن يتذكر جلسته  
مع دكتور مصطفى حين قال له :

" أوقات إنك تسبب أحسن بكثير من إنك تفضل ماسك "  
نظر زياد إلى هاتفه نظرة أخيرة، قبل أن يغلقه .. ويتجه إلى سيارته .

(١٠)

ركب زياد سيارته، يقودها بسرعة لم يعتد أن يقود بها طوال حياته ..  
يحاول الهرب من ظلم فتاة لا تستحق المعاناة معه، من مصير لن  
يستطيع أن يتعايش معه، جحيم العيش بين حب مفروض وحب أذلي ينبض  
به قلبه منذ أن ولدته أمه .

يعرف حجم كارثته، يعرف كم سئعاني من موقفه، كم ستلعنه في  
صلواتها لرب عادل لا بد أن يقتصُّ لها منه يوماً .. رب عرف معاناته يوماً و لم  
يهده السبيل، لم يجعل قلبه قوياً على النسيان، لم يجعل عيناه تريان غيرها،  
عقله في كل إختبار يجد الإجابة في أربع حروف ..  
ليلى .

لم يَشْكُ زياد يوماً في رحمة الله و عدله، فالإله لم يخلقنا لنعاني، خلقنا  
لنعيش الإختبار كلُّ على حسب أسئلته، رب يعرف ما تجول به نفسك وما  
يدور في رأسك التي تدور أسرع من إلكترون جنَّ جنونه حول خليته ..  
بالتأكيد سيرحمه، إما بجنة فيما ما لا عين رأت ولا أذن سمعت ولا خطر  
على قلب بشر، فيما من النعيم، والأنهار، والفاكهة، والنخل، والرمان، والتين،  
والحور العين ما ينسيه غجربته الضائعة،  
أو نارًا يصلها خالدًا فيما .. تحرق قلبه فترحبه من عذابه الدنيوي الذي  
لم يتخلص منه مهما حاول .

وصل زياد إلى بيته، لم ينتظر المصعد .. ليجري على السلم بلياقة لم يلحظها فيه منذ سنين، وصل إلى السطح في الطابق الثاني عشر، وقف لا يعرف ما جاء به إلى هذا المكان .. ولكنه ظل واقفًا يتأمر الشمس وهي على أعتاب الرحيل، يتأمل ضوءها وهو يخفت شيئًا فشيئًا .. عاكسًا ضوءًا برتقاليًا حزينًا على شرفات البنايات .

أشعل زياد سيجارة و هو يتأمل الأرض على إتساعها أمامه، أرض لم يجد فيها ما يداوي جرحه، ما يعطيه سببًا حقيقيًا للإحتمال .. أو الحياة .  
أخرج زياد هاتفه، كتب عليه رسالة تركها لمن سيجد الهاتف ويسلمه لأبيه، حفظها في مقدمة الهاتف ليراها مباشرة ...

ثم فتح ألبوم أغانيه الكلاسيكية ليبدأ James Blunt في غناء رائعته  
، Goodbye My Lover

مع كل كلمة في الأغنية كان يمر شريط حياته أمام عينيه، حياة لم تحمل بصيصًا من الضوء إلا وأصرّت ان تطفئه، لم تترك له مساحة من الحرية ليختار مصيره .

و الآن ... ها هو ذا يعلن التمرد على مقدراته، على ما أمرته الحياة بأن يعيشه، أعلن حربه على ما حمله له القدر طوال تسعة وعشرين عامًا، يعلن ضربته القاضية التي ستقتل الملك ولن تترك له فرصة أخرى للنجاة أمام وزيره..

إن كانت الحياة أنهت أحلامه، فسينهي هو الحياة نفسها، الآن فقط ..  
سيعلن انتصاره .

وقف زياد على حافة السطح .. نافثًا دخان سيجارته في الهواء، ليترك  
آخر ما تبقي له من أثر في الدنيا به، نافثًا معه أحلامًا تبخّرت في الهواء مثله ..  
نظر زياد إلى السماء، مناجيًا أمه في سره أن تتلقّفه من الأسفل، أن  
يصطدم بالأرض .. فيصعد فورًا إلى أحضانها التي تفوق السماء إتساعًا،  
سيخبرها بكل شيء، سيعود طفلًا صغيرًا يرتعي بأحضانها .. يشكو بها ممًا  
فعلت به الدنيا .. يرجوها أن تشفع له عند إله لم يشعر يومًا أنه يحبه، لم يرَ  
نفسه إلا إبليسيًا طرده الله من رحمته التي وسعت كل شيء .

لم يكفر زياد لحظة .. فإيمانه بالله أقوى من أن يُزعزعه أي شيء، ولكنه  
يرجو حين يصعد إلى سماء الرب، أن يجد إجابةً لسؤال لم يجد إجابته يومًا  
على أرض بائسة، لا يريد إلا أن يفهم " كل ده كان ليه ؟ "  
سحب زياد آخر أنفاس سيجارته لينفثه في الهواء، فاتحًا ذراعيه على  
إتساعهما ليحتضن مصيره الذي ولأول مرة يختاره هو بمحض إرادته بدون  
إجبار.

ألقى زياد بجسده مغمضًا عينيه، مُتَّجِهًا إلى أرض يرجو أن تقترب أكثر في  
كل لحظة ..

غربت شمسُه في نفس اللحظة التي ودَّعت فيها الشمس أرضها، شمسُ  
ستشرق غدًا بينما شمسُه أشرقت في سماء ربه ..  
غربت شمسُه في نفس اللحظة التي علا فيها صوت هاتفه بأغنية بسؤال  
أخير جال في خاطره ..

..Would You Know My Name"

"If I Saw You In Heaven

ضرب جرس الباب بيت ليلي، لتجد مندوبًا يحمل طرد لها لم يكن مصحوبًا بأي شيء يدل على صاحبه، دخلت ليلي لغرفتها لتفتحه ..؛ لتجد فيه كتابًا جلدًا بدون أي عناوين أو اسم لكاتب، فتحتة لتجد عبارات أُقْتُصت من أفلام وأغانٍ وروايات ..

صورها مع زياد بتاريخ كُتب تحت كل صورة ..  
قَلَبت ليلي في الصفحات لتجد جواباتٍ تركها لها زياد ..  
" أزميرالدا ..

للمرة الأولى منذ سنوات أشعر برغبة في الإمساك بقلم وأوراق نسيتهم – أو تناسيتهم – لأبدأ بالكتابة، للمرة الأولى أشعر بقلبي ينبض بكلمات وأحاسيس بعد أن كان دوره يقتصر على ضخ الدماء الروتيني لجسم يأبى الحياة من الأساس .

أكتب جوابي هذا وأنا لا أعرف إن كانت ستقع عيناكي عليه يومًا ما ..  
والحقيقة أنني لست مهتمًا إن كنتِ ستقرأينه أم لا، ما يهمني هو كيف لفتاة أن تُثير هذا الكم الهائل من الأفكار بداخلي !  
كيف لواحدة من بنات حواء أن تقترح عقلي رافضة الخروج منه أو محو صورتها من ذاكرتي ؟

الحقيقة أنني أحد هؤلاء الذين يؤمنون بالصدفة، فالترتيبات الريبية والمحاولات الجاهدة للوصول إلى السعادة في رأيي لا تُجدي نفعًا بقدر ما يكون نتيجة لصدفة جميلة، لمفاجأة من القدر .. تجعل من سقف توقُّعاتك أرضًا لنتيجتها .

وكان اليوم كله صدفه، وكأنَّ العالم أراد السعادة لشخص كان قد فقد كل أسباب السعادة ..

فمع أنني لا أهوى التجمعات ولا الغرباء إلا أنني ولحسن حظي وافقت على الخروج فقط لأراكي .

كنتي مختلفة، وكأنَّ الدنيا قد رسمت فوق رأسك هالة معلنة عن وجودك .

لاحظت وجودك منذ خطواتك الأولى في المكان، فقد كان لحضورك قدسية لا يمكن إغفالها .

رأيتك .. وتوقَّفت الزمن حينها .. جميلة، إستثنائية، متمردة .. كحورية هربت من الجنة لتسكن الدنيا وتزيدها جمالاً، ضحككتك التي تنير ما بين المشرق والمغرب، وتشعُّ ضوءها في قلبي لتعيد له الحياة .

رقية كنسمات هواء لطيفة في ليالي الصيف، كحبات الندى وهي تُتَوَّج أوراق الأشجار كالأماس كل صباح .

كنتِ استجابة لكل صلواتي التي أردت فيها سبباً لأحيا لأجله، وبقدر ما تأخرت الإستجابة، بقدر ما كافأني الرب على صبري بتلك الحسناء الفجرية التي لم أر ولن أرى مثلها .

بقدر ما حاولت إظهار تجاهلي لوجودك، بقدر ما كنت أختلس النظرات لكِ وأنتِ تتحدثين،

لم أكن أبداً رسماً ناجحاً، ولكنني كنت أرسم كل تفصييلة في ملامحك بداخلي، أحفرها بداخل رأسي حتى لا يمحوها الزمن ولا النسيان ..

دائمًا ما أجد الصدفة بداية مثالية للسعادة على الرغم من أنني فقدت شغفي وقدرتي على الإنتظار منذ سنين، انسانًا يعيش لمجرد أنه مرغم على ذلك، يرى الحياة بلونيهما الأبيض والأسود طاغيًا الرمادي على أحداثها .. حتى جئت ..

رأيت حياة كاملة في عينيكي، رأيت الدنيا بألوانك، رأيت شريط حياتي كله أمامي والذي كانت لا بد أن تكون نتيجته أن أصل إليكي .. كنتي نهاية أجمل من أن أتخيلها، كنتي دعاءًا حلمت به ولم ينطقه لساني يومًا، كنتي أنتِ، أنتِ وحدك .. المعنى الأوحد والأجمل للسعادة .. كنتي الحياة ..

لم أشعر يومًا بكل تلك المشاعر المتضاربة بقدر ما أشعر بها الآن، ولا أعلم إن كانت ستظل وتبقى أم ستتلاشى بمرور الأيام، لا أعلم إن كانت تلك المرة الأولى والأخيرة التي سأراك فيها .. أم أنّ القدر قد يرتّب لنا مواعيد أخرى ..

ولكن الأكيد أنني في تلك اللحظة أشعر أنني أريدك، أشعر أن هذا الزاهد بداخلي قد خرج من محرابه باحثًا عنك في الطرقات مصليًا بإسمك، داعيًا ربه أن تكوني حظه من الدنيا ورزقه في الجنة،

أشعر ولأول مرة أنني أريد شخصًا أشاركه عالمي، أريه الدنيا كما أراها .. فيجعلها أجمل، أن أدخلك في قلبي الفارغ فتملكيه وتملأيه، أريدك أنتِ ولا شيء غيرك .

أزميرالدا، نعم أنا لا زلت متعلقًا بأفلام الكارتون، والحقيقة أن معظم الفتيات يتمنون أن يكنّ سندريلا الجميلة التي تزوجت الأمير بالنهاية، او بيلا التي روّضت الوحش وجعلت منه ملاكًا بين يديها ..

ولكن انتِ، كنتي تلك العجربة الخمرية بدون حتى أن تحاولي، كنتي ساحرة بكل تفاصيلك، وجميلة بدون أن تبذلي مجهودًا لتكوني كذلك .  
أنا هذا الإنسان الذي لم يخف يومًا، ربما كان خوفي الوحيد في هذه الدنيا هو أن أشعر بالخوف من الأساس .

ولكن الحقيقة أنني الليلة لأول مرة أشعر بالخوف، فأنا لا أعتبر نفسي أبدًا من المحظوظين، عشت حياتي كلها كأحدب نوتردام، ذلك المسكين الذي عاش أسير برجه طوال حياته .. وحين قررّ الخروج رأكي وعاد لبرجه تاركًا قلبه بين أصابعك.

الليلة فقط، أخشى أن أكون في هذه القصة أحدب نوتردام وليس الفارس الذي فاز بقلبك ،

ربما لم أكن يومًا فارسًا ولا فتى أحلام لأحد .. ولكنني أرغب أن أكون كذلك في عينيك .. أنتِ وحدك .

إن أراد القدر أن تكوني لي يومًا ما، فسأنتظر إلى أن نبليغ من العمر ما يجعل شعرنا فضيًّا، وأريكي هذا الجواب ..

سأنتظر أن تنتهي من قراءته لأخبرك أنني لا زلت أراكي كما رأيتك أول مرة، لأخبرك أنك كنتي فعلاً عجربة ساحرة لا يقوى الوقت على تبديل جمالك،

لأخبرك أنك كنت وستظلي الأجل بين كل النساء،  
لأخبرك أنك أنتِ، أنتِ فقط .. من استطاعت أن تملأ قلبي، أن تكون لي ..  
أزميرالدا ."

إلى الحلوة اللي ساكنة بعيد  
بداية القول ثلاث سلامات  
بعثلك كتير جوابات  
و كل جواب بأكد فيه هيبقى اخير  
لكن ربك ده اصله خبير  
وهبلي قلب متعلمش غير حبك  
و عقل تملي يختارك بدون تفكير  
فانا اسف على جوابات متتعديش  
و اسف لو بتقرهم على التأخير  
يا بنت الناس  
أنا بيعت و انا عارف مفيش فايده  
ولا جواباتي فيها جديد  
قرار البعد اتاخذ بقاله زمان  
وحبك راح بقاله كتير مش راجع  
و قلبك داس على الماضي بدون رحمة  
وعارف اني في عينيكى مجرد "حد"  
لكن بيعت و متعشم الاقي الرد  
عارفة ..  
اخذت قراري من بدري ابطل شعر  
رميت الورقة و الاقلام من الشباك  
و قلبي بيصرخ اتجننت ؟

بقى بترمي ضناك يا هبل ؟  
رميته بايدك الكافرة في عز البرد ؟  
و فكرك يعني لما رميته مشاكلك كلها اتحلت ؟  
ياريت كات ايدك اتشلت ..  
وفكرك رميه مالشباك ده هيفيدك ؟  
دي زي الدم فوريدك  
صورتها لسه موشومة على دراعك  
إذا نسيتهها بكام ورقة  
فانا بناديلها في الدقة  
٢٠٠ مرة  
ومش هنسى  
وإذا فاكر خلاص نسيانها صار اسهل و امر بسيط  
فانا اسف  
لكن عارف .. طلعت عبيط  
عارفة..  
قبل منك كنت دايمًا نمرة واحد  
والقليب اللي في ضلوعي ياما جرح في البنات  
كنت اسيهم كل ليلة بدون سبب  
والظنون تمش في روحهم بالبطيء  
كإن الموت ده كان عينيا شيء عادي  
كنت فعلا شخص سادي

كنت بجرحهم و برحل من سكات  
واترك الباقي في قلوبهم  
يتديح بالذكريات  
ويعيش بهرب مالوجع  
كان قلب عيل غره طيشه فاتخدع  
كان فاكر إنه لو جرح  
يصبح جدع  
لانا كنت غافل  
ولا قلبي كان صايبه العبي  
بس عمره في يوم ماشاف  
انا قلبي اشجع مالبشر  
بس شافك ، حن ، خاف  
بهرب يزيد من خطوته  
معرفةش انك سكته  
وان اللي يحاول يكتمه  
قدام عينيكى أوام بيان  
قلب عمره في يوم ماخاف  
قدام عينيكى أصبح جبان  
يا بنت الناس  
أنا عمر عيني ما دمعت  
غير يوم ما غيبتي

أنا كنت ماسك فيكي  
كالعيل في ايد أمه  
بس أنتي سييتي  
غيبتي  
وغابت ويا منك كل حاجة  
فرحتي وشمسي وأماني  
أنا لسه بسمع ضحكتك  
وسط الأغاني  
جوة كلمة نطقها عمرو  
وأهه طالعة بصوت منير  
والست لما قالتها مرة  
أنا عزة نفسي مانعاني  
يا بنت الناس  
إذا كنتي شوفتي الحل غيبة  
فانا قلبي عمره فيوم ما غاب  
رافض أكون في القصة أول حد ساب  
متصدقيش لو قالوا عايش بعد منك  
وإنك انتي صرتي عادي أو نسية  
أنا قلبي حالف إن حبك لو خطية  
يبقى آخر حد تاب  
خلاصة القول يا بنت الناس

أنا عايش على الأمل اللي مش موجود  
ومن ياسي بقول لو كنتي مش ليا  
يارب ألمح عينيكى الحلوة فى الجنة  
وهي الجنة ايه أصلاً إذا من غير عينيكى السود ؟  
يا بنت الناس  
يجوز لو كنا كملنا مكانتش تبقى نهاية أحلى  
أكيد المولى كان رايد نلاقي الخير  
لكن أنا لسه مستني  
و هبعت تاني الف جواب  
فانا أسف اذا مليتي من زني  
و أسف لو بتهتي  
لو بتقريهم  
على التأخير

" ليلى ..

أنا لسه فاكِر يوم ما كلمتك وقولتلك أنا ماليش غيرك، يمكن كنتي فاكِرَة  
ساعتها إنه كلام بقولها لك عشان بحبك .. بس أنا فعلاً مكنش ليا غيرك .  
لما مشيتي، كان حواليا الدنيا كلها .. بس كنت لوحدي .  
من يوم ما بعدتي وأنا بسأل نفسي في اليوم ألف مرة إحنا بعدنا ليه ؟  
مشاكل ؟ وياه يعني .. أكيد كان ممكن تتحل، أكيد كان في مليون حل غير  
الفراق ..

تعبيتي ؟

حقك .. أنا نفسي عارف إني صعب، عصبي، محدش في الدنيا ممكن يستحملني وقولتلك ده، ويومها مسكتي إيدي وقولتيلي إنك بتحبيني .. وأنا كنت عايز أتغير، كنت عايز أبقى أحسن عشانك قبل ما يبقى عشاني، كنت محتاجك جنبي تساعديني .. بس إنتي قررتي تمشي .

كل يوم بسأل نفسي ألف ليه، كل يوم بفكر ودايمًا ما بعرفش إذا كان العيب عندك ولا عندي، والمشكلة إنك ما إديتنيش فرصة أتغير ولا إديتيني فرصة إني أرجع .. إنتي مشيتي، وحرفيًا روجي راحت معاكي .

كل يوم بوصل لنفس النتيجة، لو كنتي غلطتي أنا مسامحك، ومش عايزك تتغيري، أنا بس عايزك ترجعي .. ولو أنا غلطان فأوعدك إني هتغير .. بس في الآخر كلها أفكار وعمرها ما هتبقى واقع .

عارفة ياليلي ..

المشكلة إني من يوم ما عرفتك وأنا ماشي كل الطرق إلي توصلني ليكي، بعمل كل حاجة تخليني أقدر أكمل حياتي معاكي .

لما مشيتي ، بقيت واقف في نص الطريق ... لا أنا قادر أرجع وأكمل حياتي زيك ولا مسموح لي أكمل طريقنا وأحاول تاني .

مش قادر أصدق لحد دلوقتي إنك خلاص بقيتي لحد تاني، حد غيري بيبحك، بيخاف عليكي، بتجري عليه وإنتي متضايقه وترتاحي في حضنه،

مجرد فكرة إن حد غيري هيكون أب لولادك بتقتلني، عامل زي المربوط إلي عمال يتضرب، لا الضرب بيقبل عليه ولا هو قادر يدافع عن نفسه .

كل مرة كنت ببص لنور كنت بشوفك، كنت بفتكر كل حاجة عيشناها  
سوا، نور بنت جميلة وطيبة وبتحبي .. بس مش انتي .

عارفة .. أنا عمري ما أخذت نور الأماكن إللي خرجنا فيها سوا، عمري ما  
سمعتها الأغاني إللي كنا بنسمعها، عمري ما كتبت عنها، كل حاجة حسيتها  
معاي وعدت نفسي إني ما أحسهاش مع حد غيرك، كل تفصيلة بيننا كان لازم  
تفضل خاصة بيكي إنتي لوحدك .

كنتي عاملة زي بيت العيلة إللي تروحه لوحدك وتقعدي في أوضتك تفتكر  
تفاصيل حياتك فيه عشان ترتاح .. وتمشي . تمشي تكمل حياتك وسط عالم  
مش بتاعك، وسط ناس مش ناسك، وسط ظروف إنت مجبر تعيشها  
وتتكيف عليها .

بقيت دكتور يا ليلي ... بس عمري ما حسيت إني ناجح، عمري ما كنت  
فخور ب ده، أنا عمري ما حسيت إني ناجح وفخور بنجاحي بحاجة زي ما  
كنت بقول حاجة تضحكك، لما كنت أشوفك متضايقة ونخرج نتفسح لحد  
ما تروحي وإنتي مبسوفة وناسية هم الدنيا، لما كنت أفهمك من عينيك من  
غير ما نتكلم، لما كنت أعاملك على إنك بنتي الصغيرة وأحس إنك متحامية فياً  
كأني باباكي ..

إنتي كبرتني يا ليلي، كبرتني في أفكارك، في أحلامك، بس ما كبرتنيش في  
عيني ..

تفتكري دي كانت المشكلة ؟

مش عارف ... ده السؤال الوحيد إللي عمري ما وصلت لإجابته .

النهاردة كان المفروض يكون فرحي، بس لو إنتي قدرتي تقفي في الفرخ مع راجل غيري أنا ما قدرتش أشوف غيرك جنبي، لما بصيتلها مقدرتش أشوف حياتي الجاية معاها، ما شوفتش نفسي في عينها يا ليلي .. أنا عمري ما شوفت نفسي غير في عينيكي .

عارف إني ظلمتها وأتمنى ربنا يعوّضها بإللي أحسن مني، هي فعلاً تستاهل حد أحسن مني، تستاهل واحد كامل قلبه معاها هي .. مش مع واحدة تانية، تستاهل واحد مشاعره مش مُشوّهة، تستاهل واحد يحبها زي ما هي، واحد يحبها زي مانا حبيتك .

وجودي في الدنيا ما بقاش ليه لزوم؛ لأنه أصلاً مفيش حياة من غيرك .. انتي كنتي الحياة كلها .

ربنا رحيم، وعارف إني لما أقابله أكيد عارف إللي جوايا وهيحاسيني على أساسه، بس وجودي هنا في الدنيا وأنا عارف إني عمري ما هكون ليكي عمري ما قدرت ولا هقدر أعيش بيه .

يجوز لما أموت روجي ترجع تاني مع شخص تاني غيري، بس ساعتها هعيش حياتي كلها بدور عليكي، وقتها أوعدك إني يوم ما ألاقكي هحافظ عليكي، هبقى أحسن، مش هكون سبب إنك في يوم من الأيام تقررني تمشي .  
سامحيني يا ليلي،

يمكن ده مش القرار الصح .. بس أنا أضعف بكثير أوي من غيرك، ما قدرتش أواجه الدنيا من غيرك، وبقيت بدعي إني حتى لو هكون في النار ألمح عينيكي مرة أخيرة قبلها .  
سامحيني يا ليلي ...

بس أنا عمري ما بطّلت أحبك ..

هتوحشيني "

قلبت ليلي الصفحات لتجد ورقة أخيرة، لم تكن مملوءة كاللاتي سبقتها،

فقد كتب فيها بخط صغير ..

"ولو نسيانك الجنة ..

هعيش مشتاق ..

وأموت مشتاق"

